

ማቶሴ ፃፊዳ ዩሱስ ኪሪስቶስ ዋንጌላ ጋላ ቆፋ

ማቶሳ ዋንጌላይ፡ ያና ጌቴቲዲ ኡፋይሳን ናጌቲያ አሼይሲ ዩሱሳ ጌዴይሳኔ ያሳይ ጋልዓ ጫቁዋን ባ አሳስ አሚዳ ኡፋይሳ ቃላ ፖሊዳይ ኢያ ባጋራ ጌዴይሳ ኦዲያ ዋንጌላ። ሃ ዋንጌላይ ዩሱሴ ኤንታ ጌደን ዩሌቲዲ ዲጩዳ አይሁዴታ ያላላሰ ጌደናሺን ኩሜላ አላሚያ ኡባሳ።

ማቶሳ ዋንጌላይ፡ ዳሮ ናጌቴላን ፃፊቲዳ ማፃፋ። ማቶሴ ባ ማፃፋ ዩሱሳ ዩሌቴላን ደሚዲ፡ ኢያ ፃማቁቴላኔ ኢያ ፓጩቴላ ኦዲ ሲሚዲ፡ ጋሊላን ኢ ሳባኪዳባ፡ ታማርሲዳባኔ ሃርጋንቾታ ፓሊዳባ ኦዴስ። ሄሳፊ ካሊዲ፡ ዩሱሴ ጋሊላፔ ዩሩሳላሚ ቢዳይሳኔ ኢ ሃ ሳዓን ዴዲዳ ዋዴ ወርሴላ ሳሚንታን ሃኒዳባታ ቆንጩሴስ። ሄሲካ ኢያ ካቁቴላ፡ ኢያ ሃይቁዋኔ ኢያ ዴንዲዋ ኦይኬስ።

ሃ ዋንጌላይ፡ ዩሱሴ ያሳ ሃጊያ ቢርሻናው ማቲ ዴዴይሳኔ ያሳ ካዋቴላባ ታማርሲያ ጌታ አሰታማሬ ኦሊዲ ሺሼስ። ኢያ ቲሚርቲያፊ ዳሪያ ባጋይ ዲማ ዲማ ማራን ጌጌቲዳ ኢቻሹ ኪፊሌታን ሻኬቴስ።

1. ያሳ ካዋቴላን ዴዲያ አሳ ሃኖቴላ፡ ኦሱዋ፡ ማታኔ ወርሴላ ቃዳ ኦዲያ ዴሪያ ቦላ ቲሚርቲያ (ሺም 5-7)።

2. ታማኔ ናዎቡ ታማሬቲ ዋንጌላ ሳባካናው ቢዳ ዋዴ ኤንታው አሜቲዳ ካሌሱዋ (ሺም 10)።

3. ያሳ ካዋቴላባ ታማርሳናው ሺቁዳ ዲማ ዲማ ሌሚሶታ (ሺም 13)።

4. ኢያ ታማሬ ጌደባ ቢርሼላ ኦዲያ ቲሚርቲያ (ሺም 18)።

5. ሃዲ አላሚያ ወርሴላኔ ያሳ ካዋቴላ ዩሳባ ኦዲያ ቲሚርቲያ (ሺም 24-25)።

ማቶሳ ዋንጌላ አይፌ ቆፋታ

ዩሱስ ኪሪስቶስ ዩሌቴላ ሱሳኔ ኢያ ዩሌቴላ 1:1-2:23

ፃማቁያ ዮሃኒሳ ኦሱዋ 3:1-12

ዩሱሳ ዪንቃቲያኔ ፓጩቴላ 3:13-4:11

ዩሱሴ ጋሊላን ባ ኦሱዋ ኦይኪዳይሳ 4:12-18:35

ጋሊላፔ ዩሩሳላሚ ጋካናው 19:1-20:34

ወርሴላ ሳሚንታ ዩሩሳሌም ሄራን 21:1-27:66
ጎዳ ሃይቆፕ ዴንዲዋኔ ቆንጩላ 28:1-20

ዩሱሳ ዩሌቴላ ሱሳ
(ሉቃ 3:23-38)

1 ሃይሳፌ ካሊዲ ፃፊቲዳይሲ ዳዊቴ ናዓ ኣብራሃም ናዓ ጊዲዳ ዩሱስ ኪሪሰቶሳ ዩሌቴላ።

2 ኣብራሃምይ ዩሳቃ ዩሊስ፤

ዩሳቂ ያይቆባ ዩሊስ፤

ያይቆቤ ዩሁዳኔ ኢያ ኢሻታ ዩሊስ፤

3 ዩሁዲ ተዒማሪፕ ፋሬሴኔ ዛራ ዩሊስ፤

ፋሬሲ ኣስሮም ዩሊስ፤

ኣስሮምይ ራም ዩሊስ፤

4 ራምይ ኣሚናዳቤ ዩሊስ፤

ኣሚናዳቤ ናዓሶና ዩሊስ፤

ናዓሶኔይ ሳልሞና ዩሊስ፤

5 ሳልሞኔይ ራዓቢፕ ቦዔዛ ዩሊስ፤

ቦዔዚ ኡሩቲፕ ኢዮቤዳ ዩሊስ፤

ኢዮቤዲ ኢሴዬ ዩሊስ፤

6 ኢሴዬይ ካዉዋ ዳዊቴ ዩሊስ፤

ዳዊቴይ ኦሪዮ ማቼፌ ሶሎሞኔ ዩሊስ፤

7 ሶሎሞኔይ ርቢዓማ ዩሊስ፤

ርቢዓማይ ኣቢያ ዩሊስ፤

ኣቢዬይ ኣሳፌ ዩሊስ፤

8 ኣሳፌ ኢዮሳፌፃ ዩሊስ፤

ኢዮሳፌፃይ ኢዮራም ዩሊስ፤

ኢዮራምይ ኦዚያኔ ዩሊስ፤

9 ኦዚያኔይ ኢዮዓታም ዩሊስ፤

ኢዮዓታምይ ኣካዛ ዩሊስ፤

ኣካዚ ሂዚቂያሳ ዩሊስ፤

10 ሂዚቂያሳ ሚናሴ ዩሊስ፤

ሚናሴይ ኣሞና ዩሊስ፤

ኣሞኒ ኢዮሲያሳ ዩሊስ፤

11 ኢሰራዔሌ ኣሳይ ዲዔቲዲ ባቢሎኔ ቢታ ቢዳ ዎዴ ኢዮሲያሳ ኢኮኒያናኔ ኢያ ኢሻታ ዩሊስ።

12 ባቢሎኔ ቢታ ኢሰራዔሌ ኣሳይ ዲዔቲዲ ቢዳፕ ጉዬ ኢኮኒያኒ ሳላቲያሌ ዩሊስ።

1:11 2ካዎ 24:14-15፤ 2ታሪ 36:10፤ ኤር 27:20

ሳላቲያሌይ ዜሩባቤላ ዩሊስ፤

13 ዜሩባቤሊ ኣብዲዩ ዩሊስ፤

ኣብዲዩይ ኤሊያቄሜ ዩሊስ፤

ኤሊያቄሜይ ኣዛራ ዩሊስ፤

14 ኣዛሪ ሳዶቄ ዩሊስ፤

ሳዶቄይ ኣኪሜ ዩሊስ፤

ኣኪሜይ ኤሊዩዳ ዩሊስ፤

15 ኤሊዩዳ ኣላዛራ ዩሊስ፤

ኣላዛሪ ማታኔ ዩሊስ፤

ማታኔይ ያይቆባ ዩሊስ፤

16 ያይቆቢ ዮሴፋ ዩሊስ፤

ዮሴፊ ኪሪስቶሳ ጊያ ዩሱሳ ዩሊዳ ማይራሚ ኣዚና።

17 ሂዛ፡ ዩሌቴላይ ኣብራሃሜፔ ዳዊቲ ጋካናው ታማኔ ኦይዳ። ዳዊቲፔ ቢዲ ባቢሎኔ ዲዑዋ ጋካናው ታማኔ ኦይዳ። ባቢሎኔ ዲዑዋፔ ቢዲ ኪሪስቶሳ ጋካናው ታማኔ ኦይዳ ዩሌቴላ ጊዳስ።

**ዩሱስ ኪሪስቶሳ ዩሌቴላ
(ሉቃ 2:1-7)**

18 ዩሱስ ኪሪስቶሳ ዩሌቴላ ታሪኬይ ሃይሳፊ ካሌይሳ። ኢያ ኣያ ማይራማ ዮሴፋስ ኦይሼታ ዳባሼ ዮሴፋራ ጋሄቶና ጌሻ ኣያናፔ ቃንላታሱ።

19 ዮሴፊ ጂሎ ኣሲ ጊዲዳ ጊሾ ኢዮ ኣሳን ኬሳናው ኮዩቤና። ያኒያ ጊሾ ቆሳን ኢዮ ኣጋናው ቆፒስ።

20 ኢ ሄ ቆፋን ዳባሼን ያሳ ኪታንቸይ ኣሙሆን ቆንጪዲ፡ «ዳዊቲ ናባው፡ ዮሴፋ፡ ማይራማ ቃንላቲዳይ ጌሻ ኣያናፔ ጊዲያ ጊሾ ኢዮ ኤካናው ያዮፋ» ያጊስ።

21 ኢያ ኣዳ ናባ ዩላና፡ ኢ ባ ዳሪያ ኤንታ ናጋራፔ ኣሺያ ጊሾ ኢያ ሱንላ ኔ ዩሱሳ ጋዳ ጃጋና።

22 ጎዳይ ናቢያ ኢሳያሳ ደናን፡

23 «ሂኮ ጌላዲያ ቃንላታና፤ ኣዳ ናባካ ዩላና፤ ኢያ ሱንላይ ኣማኑዔላ ጌቲታና» ጎይሲ ፖሌታና ሜላ ሃ ኡባይ ሃኒስ። ኣማኑዔላ ጌይሳስ ቢርሼላይ «ያሳይ ኑራ ዳዔስ» ጉሱ።

24 ዮሴፊ ጂስኮፊ ባርኪዲ ጎዳ ኪታንቸይ ኪቲዳይሳ ሜላ ማይራሞ ባ ሶ ኤፊስ።

25 ሺን ባ ባይራ ናባ ዩላና ጋካናው ኢዮ ቦቺቤና፤ * ዩሌቲዳ ናባካ ዩሱሳ ጊዲ ያጊሰ።

2

ዶሎሃፔ ዪዳ አሳታ

1 ካወዋ ሄሮዲሳ ዋዳን ዩሱሲ ዪሁዳ ቢታን ቤቴሌሜ ካታማን ዩሌቲዳይሳፊ ጉዬ ያለንቶ ታይቢያ አሳቲ ዶሎሃፔ ዩሩሳላሜ ዪዲ።

2 «ዩሌቲዳ አይሁዳ ካዋይ አዉን ዴዒ? ኑኒ ዶሎሃ ባጋራ ከዪዳ ኢያ ያለንቱዋ ቤዒዲ ኢያው ጎይናናው ዪዳ» ያጊዲ አይቺደሶና።

3 ካዋይ ሄሮዲሲ ሄሳ ሲዒዳ ዋዳ ዳጋሚሰ። ዩሩሳላሜን ዴዒያ አሳይ ኡባይካ ዳጋሚደሶና።

4 ሄሮዲሲ ካሂኔ ሃላቃታኔ ሂጌ አሰታማሬታ ባኮ ያጊዲ። «ከሪሰቶሲ አዉን ዩሌታንዴሻ?» ያጊዲ ኤንታ አይቺሰ።

5 ኤንቲካ፣ «ዪሁዳ ቤቴሌሜና፤ ናቤይ።

6 «ዪሁዳን ዴዒያ ቤቴሌሜ፣

ዪሁዳን ዴዒያ ጎባ ካታማታፔ፣

ኔኒ አይቢንካ ጉፃካ።

ታ ዴሪያ ኢሰራዔሌ አይሳናይሲ፣

ኔፔ ከያና፣ ጊዲ ፃፊሰ»

ያጊደሶና።

7 ሄሳፊ ጉዬ፣ ሄሮዲሲ ዶሎሃፔ ዪዳ አሳታ ጌማን ያጊዲ፣ ያለንቱዋ ኤንቲ ቤዒዳ ዋዲያ ኤንታፊ ጌሺዲ ኤሪሰ።

8 ኢ ኤንታና ቤቴሌሜ ዩዲሼ፣ «ቢዲ ዩሌቲዳ ናባ ሚንሲዲ ኮዩቲ፤ ኢያ ሂንቲ ዴሚዳ ዋዳ ታካ ባዳ ኢያው ጎይናና ሜላ ሲሚዲ ዪሼ ታው አዲቲ» ያጊሰ።

9 ኤንቲካ ካዋይ ሄሮዲሲ ጊዳይሳ ሲዒዲ ቢደሶና። ኤንቲ ዶሎሃ ባጋራ ቤዒዳ ያለንቶይ ኤንታና ካሌሴሼ ናባይ ዴዒያሱዋ ጋካናው ኤፊሰ።

10 ኤንቲ ሄ ያለንቱዋ ቤዒዳ ዋዳ ጊታ ኡፋይሲ ኡፋይቲደሶና።

11 ሶ ጌሊዲ ናባ ባ አዩ ማይራሚራ ዴዒይሳ ቤዒደሶና። ኢያው ጉልባቲዲ ጎይኒደሶና። ባንታ ሳዲያ ዶዩዲ ዋርቃ፣ ኢፃኔኔ ካርቤ ኢያው ኢሚደሶና።

* 1:25 ኢዮ ቦቺቤና፣ ማቺራ አዚናራ አቄይሳዳ ኢሲፊ አቄቦኮና ጉሱ። 1:25 ሉቃ 2:21 2:6 ሚክ 5:2

12 ኤንቲ ሄሮዲሳኮ ጉዬ ሲሞና ማላ ያሳይ አሙሆን ኤንታው ኦዲን፣ ሃራ ኦጌራ ባንታ ቢታ ሲሚደሰና።

ጊብፃ ባቃቱዋ

13 ዶሎሃ ባጋፌ ዩዳ አሳቲ ቢዳፔ ጉዬ፣ ጎዳ ኪታንቸይ ዮሴፋስ አሙሆን ቆንጨዲ፣ «ሄሮዲሲ ናዓ ዋቋናው ኮያ ጊሾ ዴንዳ፤ ኤሌሳዳ ናዓኔ ናዓ አዪው ኤካዳ ጊብፃ ቢታ ባ። ኔ ሲማና ዋዲያ ታ ኔው ኦዳና ጋካናው ያን ጋሞዓ» ያጊሰ።

14 ሄሳ ጊሾ፣ ዮሴፊ ሄ ቃማን ዴንዲዲ፣ ናዓኔ ናዓ አዪው ኤኪዲ ጊብፃ ቢሰ።

15 ናቢያ ዶናን ያሳይ፣ «ታኒ፣ ታ ናዓ፣ ጊብፃ ቢታፊ ጃጋስ» ጌቲቲዳ ቃላይ ፖሌታና ማላ ሄሮዲሲ ሃይቃና ጋካናው ኢ ያን ዴዒሰ።

16 ሄሳፊ ጉዬ፣ ዶሎሃ ባጋፌ ዩዳ አሳቲ ኢያ ጨሚዳይሳ ኤሪዳ ዋዳ ዳሮ ዩሎቲስ። ኢ ካሴ ኤንታፊ ሲዒዳይሳዳ ቤቲሌማኒኔ ሄ ሄራን ዴዒያ ናሞዑ ላይሊ ኩሚዳይሳታኔ ናሞዑ ላይላፊ ጋርሳን ዴዒያ አዳ ናይታ ኡባ ባ ዋታዳሬታ ዩዲዲ ዋዲሲሰ።

17-18 ናቢያ ኤርሚያሳ ዶናን፣

«ዩሆይኔ ዜሌልሰ፣

ራማ ካታማን ሲዔቲሰ።

ራሄላ ባ ናይታሰ ዩካዉሱ፤

ኤንቲ ሃይቁዳ ጊሾ

ሚኔታናው ዳንዳዓቡኩ»

ጊዲ ኦዲዳይሲ ፖሌቲስ።

ናዚሬቲ ሲሙዋ

19 ሄሮዲሲ ሃይቁዳፔ ጉዬ ጊብፃን ጎዳ ኪታንቸይ ዮሴፋስ አሙሆን ቆንጨዲ፣

20 «ናዓ ዋቋናው ኮያ አሳቲ ሃይቁዳ ጊሾ ዴንዳዳ ናዓኔ ናዓ አዪው ኤካዳ ኢሰራዔሌ ቢታ ሲማ» ያጊሰ።

21 ዮሴፊ ዴንዲዲ ናዓኔ ናዓ አዪው ኤኪዲ ኢሰራዔሌ ቢታ ሲሚሰ።

22 ሺን ኦርኬሊዮሲ ዩሁዳን ባ አዋ ሄሮዲሳ ቤሳን ካዋቲዳይሳ ሲዒዳ ዋዳ ያ ባናው ያዩሰ። ያሳይ አሙሆን ኢያው ቆንጨሲን ጋሊላ ቢታ ቢሰ።

23 ናቢታ ዶናን፣ «ናዚሬቲ አሲ ጌቲታና» ጊዲ ኦዳቲዳይሲ ፖሌታና ማላ ናዚሬቲ ካታማ ቢዲ ያን ዴዒሰ።

2:15 ሆሴ 11:1 2:17-18 ኤር 31:15 2:23 ማር 1:24፤ ሉቃ 2:39፤ ዮሃ 1:45

3

ፃማቂያ የሃኒሳ ተሚርቲያ
(ማር 1:1-8፤ ሉቃ 3:1-17፤ ዮሃ 1:19-28)

1-2 ሄ ዎዴ ፃማቂያ የሃኒሳ፡ «ጆሳ ካዎቴላይ ማታቲዳ ጊሾ ሂንቲ ናጋራፔ ሰሚቲ» ያጊዲ ሳባኪሼ ዪሁዳ ባዞ ቢታ ቢሰ፡

3 ናቢያ ኢሳያሲ የሃኒሳባ ኦዲዳይሳ ሜላ፡
«ባዞ ቢታን፡

ኢሰይ ባ ቃላ ቶቁ ኦሊዲ፡
ሳዳ ኦጊያ ገጊሲቲ፡፡
ኢያ ሆሮጋ ፒዲ ኦሊቲ፡ ገሰ»
ያጌቲዳይ ኢያሳ ያገሰ፡፡

4 የሃኒሲ ገማሌ ኢኪሴፔ ኦሴቲዳ ኣፊላ ማዔሰ፡፡ ባ ፃሳን ዳፎ ዳንጮኖ፡፡ ኢ ሚያ ካሳይካ ቦሌኔ ዳጌራ ኤሲ፡፡

5 ኣሳይ ሄ ዎዴ ዬሩሳላሜ ካታማፔ፡ ዪሁዳ ቢታ ኡባፌኔ የርዳኖሴ ሻፋ ሄራፔ ኢያኮ የሶና፡፡

6 ባንታ ናጋራ ፓዲዲ የርዳኖሴ ሻፋን የሃኒሳ ኩሼን ፃማቂቶሶና፡፡

7 የሃኒሲ፡ ዳር ፋሪሳዌቲኔ ሳዲቃዌቲ ፃማቂታናው ባኮ ዬይሳታ ቤዒዲ፡ ኤንታኮ፡ «ሃ ኢታ ሾሻቶ፡ ያና ጆሳ ሃንቁዎፊ ባቃታና ሜላ ሂንቲና ኦኔ ዞሪዳይ?»

8 ሂዛ፡ ሂንቲ፡ ሂንቲ ናጋራፔ ሰሚዳይሳ ኤሪሲያባ ኦሊቲ፡፡
9 ሂንቲ፡ ሂንቲ ዎዛናን፡ ሳክራሃሜይ፡ ኦ ኣዎይ ዳዔሰን ጊዲ ቆፖሬቲ፡፡ ሎይሊ ሰዒቲ፡ ጆሳይ ሃ ሹቻታፔ ኣብራሃሜሰ ናዓ ኬሳናው ዳንዳዔሰ፡፡

10 ቤዔይ ሚላ ፃጵዎን ገጊዲ ኡቲሰ፤ ሎዎ ኣይፊ ኣይፎና ሚላ ኡባይ ቃንዔቲዲ ታማን ዬጌታና፡፡

11 «ሂንቲ፡ ሂንቲ ናጋራፔ ሰሚዳይሳ ኤሪሳናው ታኒ ሂንቲና ሃላን ፃማቃይሰ፡፡ ሺን ታፔ ጉዬራ ዬይሲ ሂንቲና ጌሻ ኣያናኒኔ ታማን ፃማቃና፡፡ ኢ ታፔ ዳር ዎልቃሜሰ፤ ታኒ ሃሪ ኣቶሺን ኢያ ጫማ ቶካናግባ ቤሲኬ፡፡

12 ካላ ጌሺያ ፒሌይ ኢያ ኩሼን ዳዔሰ፡፡ ካላ ሎይሊ ጌሼሰ፤ ገሰቲያ ባ ሻሊያን ቆላና፡ ሺን ፑኩዎ ቶዖና ታማን ፀጋና» ያገሰ፡፡

ዬሱሳ ፃማቂቲሳ
(ማር 1:9-11፤ ሉቃ 3:21-22)

13 ሄ ዎዴ ዩሱሲ የሃኒሳ ኩሼን ፃማቄታናው ጋለላፔ የርዳናሴ ሻፋ ቢሰ።

14 ሺን የሃኒሲ ኢያ ዲጋናው ኮዪድ፣ «ታኒ ኔናን ፃማቄታናው ኮሺሺን ኔኒ ታኮ ያይ?» ያገሰ።

15 ሺን ዩሱሲ ዛሪዲ፣ «ፆሳይ ኑፔ ኮያባ ኡባ ኑ ፖላናው ቤሲያ ገሾ ሃዒ ታው ኤሮ ጋ» ያገሰ። የሃኒሲ ኢያው ኤሮ ገዲ ኤከሰ።

16 ዩሱሲ ፃማቄቲዳ ማላ ሃላፌ ከዩሰ። ኢራካ ሳሎይ ዶዩቲን ፆሳ ኢያናይ ሆሌዳ ዩሺን ቃሲ ባ ቦላ ዎልዓሚዲ ዎዲሺን ቤዒሰ።

17 ሄ ዎዴ «ታ ዶሲያ፣ ኢያን ታና ኡፋይሲያ ታ ናዒይ ሃይሳ» ያገያ ቃላይ ሳሎፔ ዩሰ።

4

ዩሱሳ ፓጩቴሳ

(ማር 1:12-13፤ ሉቃ 4:1-13)

1 ሄሳፌ ጉዬ፣ ፃላሄይ ዩሱሳ ፓጩና ማላ ጌሻ ኢያናይ ዩሱሳ ባዞ ቢታ ኤፊሰ።

2 ኦይታሙ ቃማኔ ኦይታሙ ጋላሰ ፆሚዳፔ ጉዬ ኮሻቲሰ።

3 ፃላሄይ ዩሱሳኮ ዩዲ «ኔኒ ፆሳ ናዒ ገዲኮ፣ ኣኔ ሃ ሹቻቲ ኡይሌ ገዳና ማላ ከታ» ያገሰ።

4 ዩሱሲ ዛሪዲ፣ « ኣሲ ፆሳ ዶናፔ ከያ ቃላ ኡባን ዳናፔ ኣቲን ኡይላ ፃላላን ዳዔና) ጌቲቲዲ ፆሳ ቃላን ፃፌቲሰ» ያገሰ።

5 ካሊዲካ፣ ፃላሄይ ዩሱሳ ጌሻ ካታማ ኤፊዲ፣ ፆሳ ከላ ሁዒያ ከሲዲ፣

6 «ኔኒ ፆሳ ናዒ ገዲኮ፣ ኣኔ ዳጌ ሳዒን ኩንዳ። ኣይሰ ገኮ፣ ኣኔ ቶሆይ ሹቻን ጱቤቲ ዳሹቶና ማላ፣

ባንታ ኩሺያን ኔና ዳንላና ማላ፣

ፆሳይ ባ ከታንቸታ ኔ ገሾ ከታና)

ጌቲቲዲ ፆሳ ቃላን ፃፌቲሰ» ያገሰ።

7 ዩሱሲ ኢያኮ፣ «ቃሲካ፣ (ፆሳ ቃላን ኔ ጎዳ፣ ኔ ፆሳ ፓጩፋ) ያገቲዲ ፃፌቲሰ» ገዲ ዛሪሰ።

8 ጠርሴላን ፃላሄይ ዩሱሳ ኢሲ ዎልቃማ ዳሪያ ሁዒ ከሲዲ ኣላሚያ ካዎቴሳታ ኤንታ ቦንቹዎራ ኢሲፌ ቤሲዲ፣

9 «ኔ ታው ኩንዳዳ ጎይኒኮ ታ ኔው ሃ ኡባ ኢማና» ያገሰ።

3:17 ማቶ 12:18፤ 17:5፤ ማር 1:11፤ ሉቃ 9:35 4:1 ኢብ 2:18፤ 4:15

4:4 ዛሬ 8:3 4:6 ማዝ 91:11 4:7 ዛሬ 6:16

10 ዩሱሲ ዛሬዲ፡ «ሃ ፃላሂያው፡ ታፔ ሃካ! ሩኔ ጎዳ፡ ኔ ያሳ ጎይና፡ ኢያ ፃላላ ሃጋዛ) ጌቴቲዲ ያሳ ቃላን ፃፊቲስ» ያገሰ።

11 ሄሳፌ ጉዬ፡ ፃላሂይ ኣገዲ ቢስ፤ ኪታንቸቲ ዪዲ ኢያ ሃጋዚደሶና።

ዩሱሳ ቲሚርቲያ
(ማር 1:14-15፤ ሉቃ 4:14-15)

12 ዩሱሲ፡ ዮሃንሲ ቃሼቶይሳ ሲዒዳ ዎዴ ጋሊላ ቢታ ቢስ።
13 ናዚሬቴ ካታማ ኣገዲ ዛቢሎናኒኔ ኒፍታሌማ ሄራን፡ ኣባ ማታን ዴዒያ ቁፊርናሆማ ካታማ ቢዲ ያን ዴዒስ።

14 ሄሲ ሃኒዳይ ናቢያ ኢሳያሳ ደናን፡
15 «ዛቢሎኔ ቢታን፡ ኒፍታሌማ ቢታን፡
ዮርዳኖሴ ሻፋፔ ሄፊንፋን፡
ኣባ ኦጊያ ጋፃን ዴዒያ፡
ኣይሁዴ ገደና ዴሬይ ዴዒያ ጋሊላን፡

16 ቶማን ዴዒያ ዴሬይ፡
ዎልቃማ ፖያ ቤዒስ።
ሃይቆ ኩያ ቢታን፡
ዴዒይሳታስ ፖያይ ኬዩስ»

ያገዲ ኦዴቲዳ ቃላይ ፖሌታና ማላሳ።

17 ሄ ዎዴፔ ዶሚዲ ዩሱሲ፡ «ያሳ ካዎቴላይ ማታቲዳ ገሾ ሄንቲ ናጋራፔ ሰሚቴ» ያገዲ ቃላ ሳባኬስ።

ኮይሮ ታማሬታ ዪጌቴላ
(ማር 1:16-20፤ ሉቃ 5:1-11)

18 ዩሱሲ ጋሊላ ኣባ ማታራ ኣጲሼ ናምዑ ኢሻታ፡ ጳዒርሳ ጌቴቲያ ሲሞናኔ ኢያ ኢሻ ኢንዲሪያሳ ቤዒስ። ኤንቲ ሞሎ ኦይኬይሳታ ገዲዳ ገሾ ባንታ ጌቲያ ኣባን ዩሳሶና።

19 ዩሱሲ ኤንታና፡ «ሃ ዪቴ፤ ታና ካሊቴ! ሞሎ ኦይሌ ኣቶሺን፡ ታ ሄንቲና ኣሴ ኦይሌ ታማርሳና» ያገሰ።

20 ኤንቲካ፡ ኤሌሲዲ ባንታ ጌቲያ ዩጊ ኣገዲ ዩሱሳ ካሊደሶና።

21 ዩሱሲ ያፔ ቡሮ ጌዴ ሰንሐ ኣጲሼ ሃራ ናምዑ ኢሻታ፡ ዛብዲዮሳ ናይታ፡ ያይቆባኔ ዮሃንሳ ቤዒስ። ባንታ ኣዎ ዛብዲዮሳራ ኢሲፌ ዎሳሉዎ ገደን ባንታ ጌቲያ ገሊሴይሳታ ዪገሰ።

4:10 ዛሬ 6:13 4:12 ማቶ 14:3፤ ማር 6:17፤ ሉቃ 3:19-20 4:13 ዮሃ 2:12 4:15 ኢሳ 9:1-2 4:17 ማቶ 3:2

22 ኤንቲካ፣ ኤሌሲዲ ባንታ ዎሳሉዎኔ ባንታ ኣዎ ኣጊዲ ዬሱሳ ካሊደሶና።

ዬሱሲ ሃርጋንቸታ ፓሊስ
(ሉቃ 6:17-19)

23 ዬሱሲ ኣይሁዳ ዎሳ ኬላታን ታማርሲሼ፣ ሳሎ ካዎቴላ ዎንጌላ ኦዲሼኔ ዲማ ዲማ ሃርጊያፌ ኣሳ ፓሊሼ ጋለላ ቢታ ኡባን ዩዩስ።

24 ሄሳፌ ዳንደይሳን ኢያ ሱንላይ ሶሪያ ቢታ ኡባን ኬዩስ። ዲማ ዲማ ሃርጊን ኦይኬቴዳይሳታኔ ዎዬቴይሳታ፣ ቱና ኣያናን ኦይኬቴዳይሳታ፣ ሸጩ ዩጊያ ሃርጊን ኦይኬቴዳይሳታ፣ ጉንዳታ ኢያኮ ኤሂደሶና፤ ኣካ ኤንታና ፓሊስ።

25 ኣሳይ ጋለላፔ፣ ታሙ ካታማታፔ፣ ዬሩሳላሚፔ፣ ዩሁዳፔኔ ዮርዳኖሴ ሻፋ ሄፊንላን ዳዒያ ቢታፌ ዩዳ ዳር ኣሳይ ኢያ ካሊደሶና።

5

ዬሱሲ ዳሪያ ቦላ ታማርሲዳ ቲሚርቲያ

1 ዳር ዳሬይ ሸቂዳይሳ ዬሱሲ ቤዒዳ ዎዳ ዳሪያ ቦላ ኬዩዲ ኡቲስ። ኢያ ታማሬቲ ኢያኮ ሸቂን፣

2 ሃይሳዳ ያጊዲ ታማርሲስ፡

ቱማ ኡፋይሳ
(ሉቃ 6:2-23)

3 «ባንታ ኣያናን ማንቆቲ ኣንጃቲዳይሳታ፣ ሳሎ ካዎቴላይ ኤንታሳ።

4 ዬኬይሳቲ ኣንጃቲዳይሳታ፣ ኤንቲ ሚንሌሶ ዳማና።

5 ባንታ ዎዛናን ኣሸኬቲ ኣንጃቲዳይሳታ፣ ኤንቲ ሳዓ ላታና።

6 ዲሎባ ኦላናው ኮሻቴይሳቲኔ ሳዎቴይሳቲ ኣንጃቲዳይሳታ፣ ኤንቲ ካላና።

7 ማሬይሳቲ ኣንጃቲዳይሳታ፣ ኤንቲ ማርቴሊ ዳማና።

8 ዎዛና ጌሻቲ ኣንጃቲዳይሳታ፣

- ኤንቲ ያሳ ቤዓና።
- 9 ሲጌሌይሳቲ እንጃቲዳይሳታ።
ኤንቲ ያሳ ናይታ ጌቴቲ ጭታና።
- 10 ዲሎባ ኦሲያ ጊሾ ጊዲ።
ጎዴቴይሳቲ እንጃቲዳይሳታ።
ሳሎ ካዎቴላይ ኤንታሳ።
- 11 «አሳይ ሂንቴና ታ ጊሾ ጊዲ ጫያ ዎዴ ጎዲያ ዎዴኔ ሂንቴ ቦላ ኢታባ ኡባ ዎርዶን ኦዲሲያ ዎዴ ሂንቴ እንጃቲዳይሳታ።
- 12 ሂንቴ ዎይቶይ ሳሎን ጊታ ጊዲያ ጊሾ ኡፋይቴቴ፣ ሃሹ ጌቴ። ሂንቴፊ ካሴ ዴዒያ ናቤታ ሂሳዳ ጎዲዶሶና።

ማዒኔኔ ፖዎ

- 13 «ሂንቴ ቢታሰ ማዒኔ፤ ማዒኔይ ባ ማዒኔቴላ አጊኮ፣ ባ ማልዎቴላ ዋቲ ዛሪ ዴማኔ? ካሪ ሆሊን አሳን ዩዴታናፔ ኣቲን ኣይቢሰካ ማዴና።
- 14 «ሂንቴ ቢታሰ ፖዎ፤ ዴሬ ቦላ ዴዒያ ካታሚያ ቆሴታናው ዳንዳቡኩ።
- 15 ዎምፔ ኦይሊዲ ሶን ዴዒያ አሳ ኡባሰ ፖዓና ሜላ ዶቃ ሶን ዎሌሲፔ ኣቲን ዳሎ ጊዶን ዎሌይ ባዎ።
- 16 ሄሳ ሜላ አሳይ ሂንቴ ሎዎ ኦሱዎ ቤዒዲ፣ ሳሎን ዴዒያ ሂንቴ አዎ ቦንቻና ሜላ ሂንቴ ፖዎይ አሳ ሲንሳን ፖዎ።

ሙሴ ሂጊያ

- 17 «ታኒ ሙሴ ሂጊያኔ ናቤታ ቃላ ሻራናው ዪዳ ሂንቴው ዳናፖ። ታኒ፣ ኤንቲ ኦዲዳይሲ ቱማ ጊዴይሳ ቆንጨሳናው ያሲፔ ኣቲን ሻራናው ያቢኬ።
- 18 ታ ሂንቴው ቱማ ኦዳይሰ፤ ሳሎይኔ ሳዓይ አጳና ጋካናው ሂጌ ኡባይ ፖሌታናፔ ኣቲን ሂጊያፌ ኢሲ ቃላይ ዎይኮ ፒዳሌይ አዴና።
- 19 ሄሳ ጊሾ፣ ሃ ኪታታፔ ጉዲያ ኢሲ ኪታ ሜንሱያ ኦኒካ ቃሲ ሃራታ ሄሳላ ኦላና ሜላ ታማርሴይ ኦኒካ ሳሎ ካዎቴላን ኡባፌ ጉላ ጊዳና። ሸን ሃ ኪታ ፖሌይሰኔ ሃራታካ ፖላና ሜላ ታማርሴይ ሳሎ ካዎቴላን ጊታ ጊዳና።
- 20 ታ ሂንቴው ኦዳይሰ፤ ሂንቴ ዲሎቴላይ ፋሪሳዌታ ዲሎቴላፊኔ ሂጌ ኣሰታማሬታ ዲሎቴላፊ ኣዶና ኢዲኮ፣ ሳሎ ካዎቴላ ጌሌኬታ።

5:8 ማዘ 24:3 5:10 1ጴ፬ 3:14 5:11 1ጴ፱ 4:14 5:12 2ታሪ 36:16፤ ሃ.ኦ 7:52 5:13 ማር 9:50፤ ሉቃ 14:34-35 5:14 ዮሃ 8:12፤ 9:5 5:15 ማር 4:21፤ ሉቃ 8:16፤ 11:33 5:16 1ጴ፱ 2:12 5:18 ሉቃ 16:17

ዎጲባ

21 «ሂንቴ ማይዛታሰ፡ ለዎጲፒቴ፤ ሸምፖ ዎጲዳ ኦኒካ ፒርዳታና) ጌቴቶይሳ ሰዒዲዳታ።

22 ሺን ታ ሂንቴው ኦዲይሰ፤ ባ ኢሻ ሃንቁቴያ ኡባይ ፒርዳታና። ባ ኢሻ ጫያ ኦኒካ ዳይና ሲንሉ ፒርዳሰ ሸቃና። ባ ኢሻኮ፡ (ኤያይ) ጌያ ኦኒካ ቃሲ ጋናሜ ታማን ፒርዳታና።

23 «ሂሳ ጊሾ፡ ኔኒ ኔ ያርሹዋ ያርሺያ ዎዴ ኔ ኢሻ ቆሂዳባይ ኔው ኦኩኩቴኮ።

24 ኔ ያርሹዋ ሄ ቤሳን ኦጋዳ ባ፤ ኮይርታ ባዳ ኔ ኢሻራ ጊጋ፤ ያታ ሲማዳ፡ ኔ ያርሹዋ ያሳሰ ያርሻ።

25 «ኔና ሞቴይሳራ ፒርዳ ኩሉ ባሼ ኦጌ ቦላ ኢያራ ጊጋ። ሄሲ ኦቶ ጊኮ ኢ ኔና ዳይና ሲንሉ ኤፋና። ዳይናይ ኔና ቃቼይሳሰ ኦሉ ኢማና፤ ኢ ኔና ዎይኔን ይጋና።

26 ታ ቱማ ኦዲይሰ፤ ኔ ቦላ ፒርዳቲዳ ኦጩዋ ኢሲ ሳንቴሜይ ኦቶና ጨጋ ኦንጋና ጋካናው ቃሾ ኩላፌ ኬያካ።

ላይማቴላባ

27 «ሃይሳፌ ካሴ፡ ለላይማቶፒቴ) ጌቴቶይሳ ሰዒዲዳታ።

28 ሺን ታ ሂንቴው ኦዲይሰ፡ ማጫሰ ዪሊዲ፡ ኦሞቲዳ ኡባይ ባ ዎዛናን ኢራ ላይማቴሰ።

29 ኔ ኡሻቻ ኦይፌይ ኔው ናጋራሰ ጋሶ ጊዲኮ፡ ኬሳ ሆላ። ኔ ኦሳቴላይ ኩሜሉ ጋናሜ ታማን ዎዳናፔ ኔ ኦሳቴላፌ ኢሶይ ዳዪኮ ኔው ሎዎ።

30 ኔ ኡሻቻ ኩሼይ ኔው ናጋራሰ ጋሶ ጊዲኮ፡ ኢያ ቃንፃ ሆላ። ኔ ኦሳቴላይ ኩሜሉ ጋናሜ ታማን ዎዳናፔ ኔ ኦሳቴላፌ ኢሶይ ዳዪኮ፡ ኔው ሎዎ።

ማቺ ኦዚና ቢሌላባ

(ማቶ 19:9፤ ማር 10:11-12፤ ሉቃ 16:18)

31 « ሳ ማቺው ዩዲያ ኦኒካ ኦንጃ ዋርቃቲያ ኦሞ) ጌቴቲሰ።

32 ሺን ታ ሂንቴው ኦዲይሰ፤ ባ ማቺያ ላይማቶና ዴዒሺን ቢሊያ ኦኒካ ኢያ ላይማታና ሜላ ኦሌሰ። ሄሳዳካ፡ ኦንጃቲዳ ማጫሲው ኤኪያ ኡባይ ላይማቴሰ።

5:21 ኬሳ 20:13፤ ዛሬ 5:17 5:27 ኬሳ 20:14፤ ዛሬ 5:18 5:29 ማቶ 18:9፤ ማር 9:47 5:30 ማቶ 18:8፤ ማር 9:43 5:31 ማቶ 19:7፤ ማር 10:4 5:32 ማቶ 19:9፤ ማር 10:11-12፤ ሉቃ 16:18፤ 1ቆር 7:10-11

ጫቆባ

33 «ሂንቴ ማይዛታኩ፥ ለዋርደን ጫቆፊቴ፤ ሂንቴ የሳ ሲንፋን ጫቂዳይሳ ፖሊቴ» ጌቴቴዳይሳ ሲባይ።

34 ሺን ታ ሂንቴው ኦዳይስ፤ ኡባራካ ጫቆፊቴ። የሳይ ኡቴያ ኦራታ ጊዲያ ጊሾ ሳሎን ጫቆፊቴ።

35 ኢያ ቶሆይ ዩቂያ ሶ ጊዲያ ጊሾ ሳዓንካ ጫቆፊቴ። ጊታ ካወዋ ካታማ ጊዲያ ጊሾ ዩሩሳላሜንካ ጫቆፊቴ።

36 ሂንቴ ቢናናፔ ኢሱዋካ ቦሊ ዋይኮ ካሬሊ ኦሳናው ዳንዳየና ጊሾ ሂንቴ ሂንቴ ሁዔንካ ጫቆፊቴ።

37 ሄሳ ጊሾ፥ ሂንቴ ቃላይ፥ ሌ) ዋይኮ ላካይ) ጊዶ። ሄሳፊ ካሬ ከዩይ የላሄፔ ዩስ።

ሃሎ ኬያናው ኮሼና

38 « ላይፊ ጊሾ ኣይፊ፤ ኣቻ ጊሾ ኣቼ» ጌቴቴዳይሳ ሲባይ።

39 ሺን ታ ሂንቴው ኦዳይስ፤ ሂንቴ ቦላ ኢታባ ኦሊያ ኡራራ ኤቄቶፊቴ። ኦኒካ ኔ ኡሻቻ ሻካላ ባቂኮ ኔ ሃዲርሳ ሻካላካ ቤሳ።

40 ኢሲ ኣሲ ኔ ሻሚዚያ ኤካናው ኔና ሞቴኮ፥ ኔ ኮቴያ ጉጃዳ ኢማ።

41 ኢሲ ኣሲ ኔና ዋልቃን ባባ ቶሲዲ ኢሲ ሳቴ ኦጌ ባራ ባና ማላ ኔና ኡንዔሊኮ፥ ኢያራ ናሞዑ ሳቴ ኦጌ ባ።

42 ዋሲያ ኦዳስካ ኢማ፤ ኔፔ ታልዓናው ኮያ ኦናካ ዲጎፋ።

ኔ ሞርኬታ ሲቃ (ሉቃ 6:27-28፣ 32-36)

43 « ኔና ዶሴይሳ ዶሳ፤ ኔና ኢዔይሳ ኢዓ) ጌቴቶይሳ ሲባይ።

44 ሺን ታ ሂንቴው ኦዳይስ፤ ሂንቴ ሞርኬታ ዶሲቴ፤ ሂንቴና ቆሄይሳታሰ ዋሲቴ።

45 ሄሳሉ ሂንቴ ኦሊኮ፥ ሳሎን ዳዒያ ሂንቴ ኣዋስ ሂንቴ ናይታ ጊዳና። ኢ ኢታታሲኔ ሎዎታሰ ኣዋ ኬሴስ፤ ዒሎታሲኔ ናጋራንቾታሰ ባ ኢራ ቡኪሴስ።

46 ሂንቴና ዶሲያ ኣሳ የላላ ሂንቴ ዶሲኮ፥ ሂንቴው ኣይ ዋይቶይ ዳዒ? ሃሪ ኣቶሺን፥ ቃራፃ ቃንዒሴይሳቴካ ሄሳ ኦሎሶና።

47 ሂንቴ፥ ሂንቴ ኢሻታ የላላ ሳርሊኮ፥ ሃራታፔ ኣይ ሃራ ኣቂያባ ኦሊዳቴ? ሃሪ ኣቶሺን፥ የሳ ኣማኖና ኣሳይካ ሄሳ ኦሎሶና።

5:33 ለዌ 19:12፤ ታይ 30:2፤ ዛሬ 23:21 5:34 ማቶ 23:22 5:35 ኢሳ 66:1፤ ማዝ 48:2 5:38 ኬሳ 21:24፤ ለዌ 24:20፤ ዛሬ 19:19

48 ሂዛ፡ ሳሎን ደዒያ ሂንቴ አዋይ ፖሎ ገደይሳዳ ሂንቴካ ፖሎ ገደዱቴ።

6

ማንቆታስ አዋባ

1 «አሲ ቤያ ገደዱ ሂንቴ ሎያ ኦሱዋ አሳ ሲንፋን አላናዳ ናጌቴቴ። ሄሳሉ ሃኖና ኢዲኮ ሳሎን ደዒያ ሂንቴ አዋፔ ዎይቶ ደሜኬታ።

2 «ሂንቴ ማንቆታስ አሚያ ዎይ አሳ ሲንፋን ቦንቼታናው ገደዱ ጨቦቴ ኦጊያ ደናኒኔ አይሁዳ ዎሳ ኬላታን አሌይሳዳ አሲ ቤያ ገደዱ አላፊቴ። ታ ሂንቴው ቱማ ኦዳይሰ፤ ኤንቴ ባንታ ኩሜላ ዎይቱዋ ኤኪደሶና።

3 ሺን ሂንቴ ማንቆታስ አሚያ ዎይ ሂንቴ ኡሻቻ ኩሼይ አሌይሳ ሂንቴ ሃዲርሳ ኩሼይ ኤርፖ፤

4 ሂንቴ አዋይ ጌማን ገደ። ጌማን አሌይሳ ቤዒያ ሂንቴ አዋይ ሂንቴው ዎይቱዋ ቆንጨን አማና።

ዎሳባ

(ሉቃ 11:2-4)

5 «ዎሳ ዎሲሼ ጨቦታሉ ሃኖፒቴ። ኤንቴ፡ ባንታና አሲ ቤያ ገደዱ አይሁዳ ዎሳ ኬላኒኔ ኦጊያ ደናን ኤቂዲ ዎሴይሳ ደሶሶና። ታ ሂንቴው ቱማ ኦዳይሰ፤ ኤንቴ ባንታ ኩሜላ ዎይቱዋ ኤኪደሶና።

6 ሺን ኔኒ ዎሲያ ዎይ ኔ ሶ ጌላ፡ ዉላ ጎርዳዳ ጌማን ደዒያ ኔ አዋኮ ዎሳ፤ ጌማን ኦሴቲዳይሳ ቤዒያ ኔ አዋይ ኔው ዎይቱዋ አማና።

7 ሂንቴ ዎሲያ ዎይ አማኖና አሳሉ ጮ ቃላ ደርሲዲ ዎሶፊቴ። ኤንቴ አዲሲ ዎሲን ምሳይ ሲዔሰ ገደዱ ቆፖሶና።

8 ሄሳ ገሾ፡ ኤንታይሳዳ ሃኖፒቴ። አይሰ ጊኮ፡ ሂንቴ አዋይ ሂንቴው አይ ኮሺያኮ ሂንቴ ዎሳናፔ ሲንፋቲዲ ኤሬሰ።

9 «ሂዛ፡ ሂንቴ ያገደዱ ዎሲቴ፡

ሳሎን ደዒያ ኑ አዋው፡

ኔ ጌሻ ሱንፋይ አንጃቶ።

10 ኔ ካዎቴላይ ዮ፡

ኔ ሼኔይ ሳሎን ሃኒዳይሳዳ

ሳዓንካ ሃኖ።

- 11 ጋላሳ ካላ ሃቺ ሃቺ ኩስ ኢማ።
- 12 ኑኒ ኑና ቆሂዳይሳታ፣ አቶ ጌይሳዳ፣ ኩስካ ኑ ቆሁዋ አቶ ጋ።
- 13 ኑና ኢታፔ አሻፌ አቲን ፓጩን ጌልሶፋ።

[ካዎቴላይ፣ ዎልቃይኔ ቦንቾይ ማሪናው ኑሳ። አሚንዲ።]

- 14 «ሂንቴ ሂንቴና ቆሂዳይሳታ አቶ ጊኮ፣ ሳሎን ዳዲያ ሂንቴ አዎይ ሂንቴ ቆሁዋካ አቶ ጋና።
- 15 ሺን ሂንቴ ሃራ አሳ ናጋራ አቶ ጎና ኢዲኮ ሂንቴ አዎይ ሂንቴ ናጋራ አቶ ጌና።

ጾማባ

- 16 «ሂንቴ ጾሚያ ዎዴ ጩቦታላ ካዮቶፊቴ። አይስ ጊኮ፣ ኤንቲ ጾሚይሳ አሲ ኤራና ማላ ባንታ ሶምዑዋ ቂታዮሶና። ታ ቱማ ኑዳይስ፤ ኤንቲ ባንታ ዎይቱዋ ኤኪደሶና።
- 17 «ሺን ኑኒ ጾሚያ ዎዴ ኑ ሶምዑዋ ማጫ፣ ኑ ሁዲያ ቲዬታ።
- 18 ሄሳዳ ኑ ኦላኮ ኑ ጾሚያ ጾማይ አሳፔ ጌሚዳይሳ፣ ሺን ጌማን ዳዲያ ኑ አዎይ ኤሪያ ጾማ ጊዳና። ጌማን ኦሴቲዳይሳ ቤዲያ ኑ አዎይ ኑው ዎይቱዋ ኢማና።

ሳሎን ሻሎ ሺሾ

- 19 «ቢሊ ሚያሶን፣ ቢራቲ ሺዲያሶን፣ ካይሶይ ቦኪዲ ኤኪያሶን፣ ሃ ሳዒን፣ ሂንቴው ሻሎ ሺሾፔቴ።
- 20 ሺን ቢሊ ሞናሶን፣ ቢራቲ ሺያሶን፣ ካይሶይ ቦኪዲ ኤኮናሶን ሳሎን ሂንቴው ሻሎ ሺሺቴ።
- 21 ኑ ሻሎይ ዳዲያሱዋን ኑ ዎዛናይ ዳዒና።
- 22 «አይፌይ አሳቴላስ ጾምቴ። ሄሳ ጊሾ፣ ኑ አይፌይ ፓፃ ጊዲኮ ኑ ኩማላ አሳቴላይ ፖፃ ጊዴስ።
- 23 ኑ አይፌይ ሃርጋንቾ ጊዲኮ ኑ ኩማላ አሳቴላይ ቋማ ጊዴስ። ሂዛ፣ ኔናን ዳዲያ ፖፃይ ቋማ ጊዲኮ፣ ቋማይ አይ ማላ አቋዲ ቋማንዴሻ!
- 24 «ኢሲ አሲ ናምዑ ጎዳስ ሃሪታናው ዳንዳዒና። ኢሱዋ ደሲኮ ሃንኩዋ ኢዳስ፤ ዎይኮ ኢሱዋ ቦንቺኮ ሃንኩዋ ካዴስ። ጾሳሲኔ ሚሼስ ሃሪታናው ዳንዳዒኬታ።

ኡንዔቶፊቴ
(ሉቃ 12:22-31)

25 «ሂዛ፡ ሲዒቴ! ሂንቴ ዴጋን ዳናው፡ ላይ ማኔ? ኣይ ኡያኔ? ኣይ ማዓኔ?» ጊዲ ኡንዔቶፊቴ፤ ዴጋይ ካላፊ ዎይኮ ማጋፔ ኣጴኔ?

26 ሳሎ ካፎታ ፃሊቴ፤ ኡንቴ ዜርኮና፡ ቡጮኮና፡ ሻሌን ዩጎኮና፡ ሺን ሂንቴ ሳሎ ኣዎይ ኡንታ ሙዜስ። ሂንቴ ኡንታፊ ከሂ ኣጴከቴ?

27 ሂንቴ ጊዶፊ ዳር ኡንዔቲዲ ባ ላይላ ቦላ ኢሲ ጋላስ ጉጃናው ዳንዳዔይ ዴዒ?

28 «ቃሲ ሂንቴ ማዒያባስ ኣይስ ኡንዔቴቴ? ኣኔ ጨሻታ ቤዒቴ፡ ኦሶን ዳቡርኮና ዎይኮ ሱቆኮና።

29 ሲዒቴ! ሃሪ ኣቶሺን፡ ካዉዋ ሶሎሞኔይ ባ ቦንቾ ኡባን ሃ ጨሻታፔ ኢሱዋ ማላካ ማዒቤና።

30 ሂንቴና፡ ኣማኖይ ፓጨዳይሳቶ፡ ያሳይ ሃቺ ቤንቴዲ ዎንቶ ታማን ዎቆናው ዴዒያ ማታ ያቴዲ ማይዚያባ ጊዲኮ፡ ሂንቴና ኡንታፊ ኣሊዲ ዋቴ ማይዜኔ?

31 ሂሳ ጊሾ፡ ላይ ማኔ? ኣይ ኡያኔ? ኣይ ማዓኔ?» ጊዲ ኡንዔቶፊቴ።

32 ሄ ኡባ ያሳ ኣማኖና ኣሳይ ዳርሲዲ ዴማናው ኡንዔቶሶና። ሂንቴ ሳሎ ኣዎይ ሄ ኡባይ ሂንቴው ኮሺይሳ ኤሬስ።

33 ሺን ኡባፊ ሲንፉ ያሳ ካዎቴላኔ ኢያ ፃሎቴላ ኮዩቴ፤ ሄ ኡባይ ሂንቴው ጉጃ ኢማታና።

34 ሂሳ ጊሾ፡ ዎንቶስ ቆፒሼ ኡንዔቶፊቴ። ዎንቶይሲ ዎንቶስ ኣቆ፤ ኢሲ ኢሲ ጋላሳይ ባው ጊዲያ ማቶራ ዴዒስ።

7

ሃራታ ቦላ ፒርዶፊቴ
(ሉቃ 6:37-42)

- 1 «ሂንቴ ቦላ ፒርዳቶና ማላ ሃራታ ቦላ ፒርዶፊቴ።
- 2 ኣይስ ጊኮ፡ ሃራታ ቦላ ሂንቴ ፒርዳይሳዳ ሂንቴ ቦላ ፒርዳታና፤ ሂንቴ ሃራታስ ማኪዳባን ሂንቴው ዛሪ ማኬታና።
- 3 ኔ ኣይፊን ዴዒያ ቱሱ ዳኔይሳ ቤያና ኔ ኢሻ ኣይፊን ዴዒያ ቡሪያ ኣይስ ቤዓይ?

6:29 1ካዎ 10:4-7፤ 2ታሪ 9:3-6 7:2 ማር 4:24

4 ኔ አይፊን ቱሲ ዳዒሺን ኔ ኢሻ አይፊን ዳዒያ ቡሪያ ኬሶ ጋናው ዋና ዳንዳዒያ?

5 ኔኖ ጩቡዋው፡ ኮይርታዳ ኔ አይፊን ዳዒያ ቱሲ ዳኔይሳ ኬሳ። ኢያፔ ጉዬ፡ ኔ ኢሻ አይፊን ዳዒያ ቡሪያ ኬሳናው ኔ ጌሻ ጻላና።

6 «ጉዬ ሲሚዲ ሂንቴና ሳጾና ማላ ጌሻባ ካናታሰ ዩጎፊቴ። ባንታ ቶሁዋን ዩጲዲ ኢሶና ማላ ሂንቴ ኣልፆ ኢንቁዋ ጉዲንታ ሲንሳን ዩጎፊቴ።

ዋሲቴ፡ ኮዩቴ፡ ጻጌቴ
(ሉቃ 11:9-13)

7 «ዋሲቴ ሂንቴው ኢሜታና፡ ኮዩቴ ሂንቴ ዳማና፡ ካሬ ዩዲ ጻጌቴ ሂንቴው ደዩታና።

8 ዋሲያ ኦዳሰካ ኢሜታና፡ ኮያ ኦዳሰካ ቤንታና፡ ካሬ ዩዲ ጻጌያ ኦዳሰካ ደዩታና።

9 «ሂንቴ ገደፊ ባ ናዒ ኡይሉ ዋሲኮ ሹቺ ኢሜይ ኦኔ?

10 ዋይኮ ሞሎ ዋሲኮ ሹሺ ኢሜይ ዳዒ?

11 ያቴን ሂንቴ ኢታ ገዲሽ ሂንቴ ናይታሰ ሎፆባ ኢሞ ኤሪኮ፡ ሂንቴ ሳሎ ኣዋይ ባና ዋሴይሳታሰ ሎፆባ ዋቲ ዳርሲዲ ኢሜኔ?

12 ሃራቲ ሂንቴው ኦላና ማላ ሂንቴ ኮያባ ኡባ ሂንቴካ ሃራታሰ ኦሉቴ። ኣይሰ ገኮ፡ ሙሴ ሃጌይኔ ናቤቲ ታማርሴይ ሃይሳ።

13 «ፀንሳ ዉላራ ጌሊቴ፤ ኣይሰ ገኮ፡ ጳዮሰ ኤፊያ ኦጌይ ዋጋ፡ ዉላይካ ዳልጋ። ኢያራ ጌሊያ ኣሳይካ ዳር።

14 ሺን ዳዑዋኮ ኤፊያ ኦጌይኔ ዉላይ ፀንሳ፤ ያ ጌሊያ ኣሳይካ ጉላ።

ሚሉ ባ አይፊን ኤሬቴሰ
(ሉቃ 6:43-44)

15 «ቦላ ባጋራ ደርሴ ዳኒዲ ባንታ ጋላን ቡጵሜ ገዲዲ ሂንቴ ገደ ጌሊያ ዋርዳንቸ ናቤታፔ ናጌቲቴ።

16 ሂንቴ ኤንታ፡ ኤንታ ኣይፊያፔ ኤራና፤ ኣጉንሳፊ ዋይኔይ፡ ከንቸቴፔ ላዳይ ማጻቴና።

17 ሄሳ ሚላ ሎፆ ሚሉ ኡባይ ሎፆ ኣይፊ ኣይፊሰ፤ ኢታ ሚሉ ኢታ ኣይፊ ኣይፊሰ።

18 ሎፆ ሚሉ ኢታ ኣይፊ ኣይፊና፡ ቃሲ ኢታ ሚሉ ሎፆ ኣይፊ ኣይፋናው ዳንዳዒና።

19 ሎዎ አይፊ አይፎና ሚሊ ኡባይ ቃንጻቲዲ ታማን ፀጌታና።

20 ሄሳ ጊሾ፣ ሂንቴ ኤንታ፣ ኤንታ አይፊያን ኤራና።

21 «ሳሎን ዳዒያ ታ አዋ ሸኒያ ኦሊያ ኡራይ ሳሎ ካዋቴሊ ጌላናፔ አቲን ጮ ታና ሳዳው፣ ጎዳው፣ ጊያ ኡባይ ሳሎ ካዋቴሊ ጌሊና።

22 ፐርዳ ጋላስ ዳሮቲ፣ ሳዳው፣ ጎዳው፣ ኔ ሱንላን ቲንቢቲ ኦዲቦኮ? ኔ ሱንላን ቱና አያናታ ኬሲቦኮ? ኔ ሱንላን ማላታታ ኦሊቦኮ?» ያጋና።

23 ሄ ዎዴ ታኒ፣ ሩታ ሂንቴና ኡባራካ ኤሪኬ፣ ሂንቴ ኢታ ኦሌይሳቲ ታፔ ሃኪቲ» ያጋና።

24 «ሂዛ፣ ሃ ታ ቃላ ሲዒዲ ኦሊያ ኦኒካ ባ ኬላ ሹቻ ቦላ ኬዲዳ ዎዛናማ አሳ ማላ።

25 ኢራይ ቡኪስ፣ ዲያይ ዲዒስ፣ ጫርኮይካ ጫርኪዲ ሄ ኬላ ሱጊስ። ሸን ኬላይ ሹቻ ባሶ ቦላ ኬጻቲዳ ጊሾ ኩንዲቤና።

26 ሃ ታ ቃላ ሲዒዲ ኦላና ኦኒካ ባ ኬላ ሻፌ ቦላ ኬዲዳ ኤያ ኡራ ማላ።

27 ኢራይ ቡኪዲ፣ ዲያይ ዲዒዲ፣ ጫርኮይካ ጫርኪዲ፣ ሄ ኬላ ሱጊን፣ ሄ ኬላይ ኩንዲስ፤ ኢያ ኩንዴላይካ ዎልቃማ» ያጊስ።

28-29 ዩሱሲ ባ ኦዳ ኦንጊዳ ዎዴ ኢያ ቲሚርቲይ ሂጌ አስታማራታ ማላ ጊዶና ማታራ ጊዲያ ጊሾ አሳይ ኢያ ቲሚርቲያን ማላሌቲዶሶና።

8

ዩሱሲ ባር ሃርጋንቸዎ ፓሊስ (ማር 1:40-45፤ ሉቃ 5:12-16)

1 ዩሱሲ ዳሪያፔ ዎዲያ ዎዴ ዳር አሳይ ኢያ ካሊደሶና።

2 ሄኮ ኢሲ ባር ሃርጋንቸይ ኢያኮ ሸቂዲ፣ ኢያ ሲንላን ጉልባቲዲ፣ «ጎዳው፣ ኔ ሸኔ ጊዲኮ ታና ጌሻዳ ፓላናው ዳንዳዓሳ» ያጊስ።

3 ዩሱሲ ባ ኩሺያ ዩዲዲ ኢያ ቦቸዲ፣ «ኤ፣ ታ ሸኔ፣ ፓፃ» ያጊስ። ኡራይ ኢራካ ጌዬ አጊስ።

7:19 ማቶ 3:10፤ ሉቃ 3:9 7:20 ማቶ 12:33 7:23 ማዝ 6:8 7:28-29 ማር 1:22፤ ሉቃ 4:32

4 ዩሱሲ ኢየሱስ፡ «ኔ ፓፀዋ ኦዴሰካ ኦድፓ። ሺን ባዳ ኔ ጌያዳ ፓያይሳ ካሂኔ ቤሳ። ኔ ፓፀዋሰ ማርካ ጊዳና ሜላ ባዳ ሙሴይ ከቲዳ ያርሹዋ ያርሻ» ያገለገለ።

ማቶ ሃላቃ አማኑዋ

5 ዩሱሲ ቁፊርናሆሜ ካታማ ጋኪዳ ዋዴ ኢሲ ማቶ ሃላቃይ ኢያኮ ሸቂዲ፡

6 «ጎዳው፡ ታ አይሌይ አሳቴላይ ጉንዲን ዳር ሃርጌቲዲ፡ ሶን ዘንዲዲ ዴዴሰ» ያገለገለ።

7 ዩሱሲ ዛሬዲ፡ «ታኒ ባዳ ኢያ ፓላና» ያገለገለ።

8 ሺን ማቶ ሃላቃይ ዛሬዲ፡ «ጎዳው፡ ኔ ታ ሶ ጌላናው ቤሲያ አሲ ጊዲኬ፡ ሺን ኔ ሃን ኡታዳ ቃላ ፃላላ ኦዳ፡ ታ አይሌይ ፓፃና።

9 አይሰ ገኮ፡ ታፔ ቦላራ ታ ከቴቲያ አሳቲ ዴዎሶና፡ ቃሲ ታፔ ጋርሳራ ታው ከቴቲይሳቲ ዴዎሶና። ኤንታፌ ኢሱዋ፡ «ሳ» ጊያዴ ቤሰ፤ ሃንኩዋ ቃሲ «ሃያ!» ጊያዴ ዩሰ። ታ አይሊያ፡ «ሃይሳ ኦላ» ጊያዴ አሉሰ» ያገለገለ።

10 ዩሱሲ ሄሳ ሲዲዳ ዋዴ ማላሌቲዲ፡ ባና ካሊያ አሳኮ፡ «ታ ሂንቴው ቱማ ኦዳይሰ፤ ታኒ ሃይሳ ሜላ አማኖ ኢሰራዴሌ አሳንካ ቤዓቢኬ።

11 ታ ሂንቴው ኦዳይሰ፤ ዳርቲ ደሎሃፔኔ ዉሎሃፔ ዩዲ፡ ሳሎ ካዎቴላን ኣብራሃሜራ፡ ዩሳቃራኔ ያይቆባራ ኢሲፌ ኢማቶ ቦላ ኡታና።

12 ሺን ሳሎ ካዎቴላ ላታናው ቤሲሺን አቲዳይሳቲ ካሬ ቆማን ሆሌታና። ያን ኤንታው ዩሆኔ አቻ ጋርጨዳ ጊዳና» ያገለገለ።

13 ዩሱሲ ማቶ ሃላቃኮ፡ «ኔ ሶ ባ፡ ኔ አማኑዋላ ኔው ሃኖ» ያገለገለ። ኢያ አይሌይ ሶሁዋራ ፓፂ አገሰ።

ዩሱሲ ዳር ሃርጋንቸታ ፓሉሰ
(ማር 1:29-34፤ ሉቃ 4:38-41)

14 ዩሱሲ ጳዳሮሳ ሶ ጌሊያ ዋዴ ጳዳሮሳ ማቼ ኣያ ቆዖ ሚሻ ሃርጌን ሳኬታዳ ዘንዲዳር ቤዲሰ።

15 ዩሱሲ ኢ ኩሺያ ቦቺዳ ዋዴ ቆዖይኔ ሚሻይ ኣገ አገሰ። ፓፃ ዴንዳዳ ኢያ ሞካሱ።

16 ሄ ዋዴ አማርሲ ቱና ኣያናን ኦይኬቲዳ ዳር አሳታ፡ አሳይ ዩሱሳኮ ኤሂደሶና። ኢካ ቱና ኣያናታ ባ ቃላን ኬሲሰ፡ ሃርጋንቸታ ኡባ ፓሉሰ።

17 ሄሳንካ ናቢያ ኢሳያሲ፥
 «ኢ ኑ ሃርጊያ ባው ኤኪሰ፥
 ኢ ኑ ሃርጊያ ቶኪሰ»
 ጊዳ ቃላይ ፖሌተሰ።

ዬሱሳ ካሎይ ጨገሲያ ጋቲያ
 (ሉቃ 9:57-62)

18 ዬሱሲ ዳር አሳይ ኢያ ዩሹዋን ኤቁዳይሳ ቤዒዲ፥ አባፌ ሄፊንሌ ፒናና ሜላ ባ ታማሬታ ኪቲሰ።

19 ሂጌ አስታማሬታፕ ኢሶይ፥ «አስታማሬያው፥ ኔ ቢያሶ ኡባ ታ ካላና» ያገሰ።

20 ዬሱሲ ኢያኮ «ዋርካናታሰ ኦሊ ዳዔሰ፥ ሳሎ ካፎታሰ ኮሌ ዳዔሰ። ሺን አሳ ናዓሰ ባ ሁዒያ ሹምፒሲያ ቤሲ ባዋ» ያገሰ።

21 ዬሱሳ ካሊያ አሳታፕ ኢሶይ፥ «ጎዳው፥ ታኒ ሲንሳታ ባዳ ታ አዋ ዋጋዳ ያና» ያገሰ።

22 ሺን ዬሱሲ፥ «ሃይቁዳይሳቲ ባንታ ሃይቆታ ዋጎ፤ ኔኒ ታና ካላ» ያገሰ።

ዬሱሲ ሆቢያ ሲዒ ኦሌሰ
 (ማር 4:35-41፤ ሉቃ 8:22-25)

23 ዬሱሲ ባናው ዋጎሉዋን ጌሊዳ ዋዳ ኢያ ታማሬቲካ ኢያራ ባናው ጌሊደሶና።

24 ኤንቲ ቆፖና ዳዒሺን፥ ዋልቃማ ሆቤይ ሃላ ቦላ ዳንዲን ዋጎሎይ ሚቲታናው ጋኪሰ። ሺን ዬሱሲ ጁሰኪሰ።

25 ኢያ ታማሬቲ ኢያኮ ሺቁዲ ኢያ ባርኮሌዲ፥ «ጎዳው፥ ኑ ቆዮሰ ኑና አሻርኪ» ያገደሶና።

26 ዬሱሲ ኤንታኮ፥ «ሂንቴኖ፥ አማኖይ ፓጨዳይሳቶ፥ አይሰ ያዬቲ?» ያገሰ። ዳንዲዲ፥ ሆቢያኔ ጎቲያ ኤሲሰ። ኤሌሲዲ ኡባባይ ሲዒ ገሰ።

27 ኢያ ታማሬቲ ማላሌቲዲ፥ «ሃይሲ፥ ሃሪ አቶሺን፥ ሆቤይኔ ጎቴይ ኪቴቴይሲ ዋኒዳ አሴ?» ያገደሶና።

ቱና አያናይ ኦይኪዳ ናምዑ አሳታ
 (ማር 5:1-20፤ ሉቃ 8:26-39)

28 ዬሱሲ አባፌ ሄፊንላን ዳዒያ ጌርጌሶኔ ጊያ ቢታ ጋኪዳ ዋዳ ቱና አያናይ ኦይኪዳ ናምዑ አሳቲ ዱፎፕ ኮዪዲ ኢያራ ጋሄቲደሶና። ኤንቲ ዳር ኢታኔ ያሺያ አሳታ ጊዲያ ገሾ አሲ ሄ ቤሳራ አቆናው ዳንዳዒና።

29 ኤንቲካ፣ «ጾሳ ናዓው፣ ኑናኔ ኔና ኣይቤ ጋሌይ? ዋዳይ ጋኮና ዳዒሺን ኑና ፐርዳናው ያዲ?» ጊዲ ዋሲዶሶና።

30 ኤንታፌ ዳር ሃኮና ጉዲንሎ ዉዳይ ሄሜቲስ።

31 ቱና ኣያናቲ ዮሱሳ፣ «ኔ ኑና ከሳናባ ጊዲኮ፣ ሂኒ ጉዲንሎ ዉዲያ ጊዶ ዮዳርኪ» ያጊዲ ዋሲዶሶና።

32 ዮሱሲ፣ «ቢቲ» ያጊሰ። ቱና ኣያናቲ ኣሳታፔ ከዪዲ ጉዲንሎታን ጌሊዶሶና። ጉዲንሎቲ ኡባይ ኣፎ ዶናራ ዲርጊዲ ቢዲ ኣባን ሚቲቲዲ ሃይቂዶሶና።

33 ጉዲንሎ ዉዲያ ሄሜይሳቲ ባቃቲዲ ካታማ ቢዲ፣ ሂኒዳባኔ ቱና ኣያናይ ኦይኪዳ ኣሳታ ቦላ ኦሴቲዳባ ኡባ ኦዲዶሶና።

34 ያቲን፣ ካታማን ዳዒያ ኣሳ ኡባይ ዮሱሳ ቤዓናው ከዪዶሶና። ኤንቲ ዮሱሳ ቤዒዳ ዋዳ ባንታ ቢታፌ ከዪዲ ባና ማላ ዋሲዶሶና።

9

ጉንዳ ኡራ ፓፁዋ

(ማር 2:1-12፤ ሉቃ 5:17-26)

1 ሄሳፌ ጉዬ፣ ዮሱሲ ዋሳሉዋን ጌሊዲ፣ ኣባ ፒኒዲ ባ ካታማ ቢስ።

2 ሂኒዳ ጉላ ኣሳቲ ኢሲ ጉንዳ ኡራ ኣልጋራ ቶኪዲ ዮሱሳኮ ኤሂዶሶና። ዮሱሲ ኤንታ ኣማኑዋ ቤዒዲ፣ ጉንዳ ኡራ፣ «ታ ናዓው፣ ያዮፋ! ኔ ናጋራይ ኣቶ ጌቲቲስ» ያጊሰ።

3 ሄ ሳቲያን፣ ኣይሁዳ ሂጌ ኣሰታማሬታፔ ኢሶቲ ኢሶቲ፣ «ሃይሲ ጾሳ ጫሼ ጊዳኔ» ያጊዲ ባንታ ዋዛናን ቆፒዶሶና።

4 ዮሱሲ ኤንታ ቆፋ ኤሪዲ፣ «ኢታባ ሂንቴ ዋዛናን ኣይሰ ቆፒቲ?

5 ሃኖሺን፣ ሳ ናጋራይ ኣቶ ጌቲቲስ) ጌይሳፌኔ «ዳንዳ ኤቃዳ ባ) ጌይሳፌ ኣዉሲ ካዉዪ?

6 ሺን ሳዓ ቦላ ናጋራ ኣቶ ጋናው ኣሳ ናዓስ ማቲ ዳዒይሳ ታ ሂንቴና ኤሪሳና» ያጊዲ፣ ጉንዳ ኣዲያኮ፣ «ዳንዳ ኤቃ፣ ኔ ኣልጋ ቶካዳ፣ ኔ ሶ ባ» ያጊሰ።

7 ጉንዳ ኡራይ ዳንዲዲ ባ ሶ ቢስ።

8 ዳሬይ ሄሳ ቤዒዲ ማላሌቲዶሶና። ሄሳ ማላ ማታ ኣሳስ ኢሚዳ ጾሳ ጋላቲዶሶና።

ማቶሳ ዪጌቲላ

(ማር 2:13-17፤ ሉቃ 5:27-32)

9 ዩሱሲ ያፔ ዳንዲዲ ቢሼ ማቶ ፲፮ ጌይሳ ቃራፃ ቃንዲሲያ ቤሳን ኡተዳሺን ቤዒዲ፡ «ታና ካላ» ያገሰ።

ኢካ ዳንዲዲ ካሊሰ።

10 ዩሱሲ ማቶ ሶን ጋይታ ቦላ ኡተዳሺን፣ ቃራፃ ቃንዲሲያ ዳሮ አሳቲኔ ናጋራንቸቲ ዩዲ ኢያራኔ ኢያ ታማሬታራ ኢሲፌ ማናው ኡተዳሶና።

11 ኢሲ ኢሲ ፋሪሳዌቲ ሄሳ ቤዒዲ፣ ዩሱሳ ታማሬታ፣ «ሂንቲ አስታማሬይ ቃራፃ ቃንዲሲይሳታራኔ ናጋራንቸታራ ኣይሰ ሚ?» ያገደሶና።

12 ዩሱሲ ሄሳ ሲዒዲ፣ «ጳሌ ኮሼይ ሃራጋንቸታሳፌ ኣቲን ፓፃታሳ ገደና።

13 ሺን ሂንቲ ቢዲ፣ «ታኒ ሂንቲ ያርሹዋ ገደናሺን ሂንቲ ሃራታ ማራና ማላ ኮያይሰ» ጌቲቲዲ ፃፌቲዳይሲ ዋይ ጉሴኮ ኤሪቲ። ኣይሰ ገኮ፣ ታኒ ናጋራንቸታ ፃጋናው ያሰፔ ኣቲን ዓሎታ ፃጋናው ያሰኬ» ያገሰ።

ዩሱሲ ያማባ ኣይሼቲሰ

(ማር 2:18-22፤ ሉቃ 5:33-39)

14 ሄ ዋዴ ዮሃንሳ ታማሬቲ ዩሱሳኮ ሸቂዲ፣ «ኮኔ ፋሪሳዌቲ ያሞሰ፣ ሺን ኔ ታማሬቲ ኣይሰ ያሞኮና?» ያገዲ ኣይቺደሶና።

15 ዩሱሲ ዛሪዲ ኤንታኮ፣ «ሙሹራይ ኤንታራ ዳዒሺን ፃጌቲዲ ዩዳ አሳይ ካዮታናው ዳንዳዖና? ሙሹራይ ኤንታ ማታፔ ኤኬታና ዋዴይ ያና፣ ኤንቲ ሄ ዋዴ ያማና።

16 «ኦራላ ማፖፔ ፔጲዲ ጋልዓ ማፖ ቦላ ሲኬይ ኦኒካ ባዋ። ሄሳላ ኦሊኮ ኦራላይ ጋልዓ ፔጴሰ። ፔጴላይካ ጉጂ ዳልጌሰ።

17 ኦራላ ዋይኔ ጋልዓ ኦጎሮን ቆሊያ ኦኒካ ባዋ። ሄሳላ ኦሊኮ ኦራላ ዋይኔይ ጋልዓ ኦጎሮዋ ጴሴሰ ዋይኔይካ ጉኬሰ፤ ኦጎሮይካ ናሞዓንሶ ማደናባ ገደሰ። ሺን ኦራላ ዋይኔይ ኦራላ ኦጎሮን ቆሊታናው ቤሴሰ። ሄሳላ ኦሴቲኮ ናሞዓይካ ኢቶና ናጌቶሶና» ያገሰ።

ሃይቂዳ ናዒዉኔ ዩሱሳ ኣፊላ ቦቺዳ ማጫሲው

(ማር 5:21-43፤ ሉቃ 8:40-56)

18 ዩሱሲ ሄሳ ኦዶ ቦላ ዳዒሺን፣ ኣይሁዴ ሃላቃታፔ ኢሶይ ኢያኮ ዩዲ፣ ኢያ ሲንላን ጉልባቲዲ፣ «ታ ናዒያ ሃዒ ሃይቃሰ።

ሺን ኢያ ፓፃና ማላ ኔኒ ያዳ ኔ ኩሺያ ኢ ቦላ ዋላርኪ» ጊዲ ዋሲሰ።

19 ዬሱሲ ዳንዲዲ ኢያራ ቢሰ፤ ኢያ ታማራቲካ ካሊደሶና።

20 ኢ ቢሺን ታማኔ ናምቡ ላይሌ ኩሚሌ ሱሌ ጎጊዲ ዋይሲያ ኢሲ ማጨሲያ ጉዬራ ሺቃዳ ዬሱሳ ኣፊላ ማጨራ ቦቻሱ።

21 ኢያ ባ ዋዛናን፥ «ታ ኢያ ኣፊላ ማጨራ ፃላላ ቦቹያኮ ፓፃና» ያጋዳ ቆፓሱ።

22 ዬሱሲ ጉዬ ሲሚ ኢዮ ጂሊዲ፥ «ታ ናቲ፥ ያዮፋ! ኔና ኔ ኣማናይ ፓሌሰ» ያጊሰ። ማጨሲያ ሶሁዋራ ፓፃ ኣጋሱ።

23 ዬሱሲ ኣይሁዴ ሃላቃ ሶ ጋኪያ ዋዴ ዛዬ ፑኔይሳታኔ ዬኬይሳታ ቤዒዲ፥

24 «ኣኔ ኪቺቲ፤ ጉላ ናዒያ ጲሰካሱፔ ኣቲን ሃይቃቡኩ» ያጊሰ። ሺን ኣሳይ ኢያ ቦላ ሚጨደሶና።

25 ኣሳ ካሬ ኬሲዳፔ ጉዬ ሶ ጌሊዲ፥ ናዔ ኩሺያ ኦይኪሰ፥ ናዒያ ዳንዳ ኤቃሱ።

26 ሄ ዋሬይ ሄ ቢታ ኡባ ጋኪሰ።

ዬሱሲ ናምቡ ቆቄታ ጂሊሲሰ

27 ዬሱሲ ያፔ ዳንዲዲ ጌዴ ሲንሌ ቢያ ዋዴ ናምቡ ቆቄቲ ባንታ ቃላ ቶቄ ኦሌዲ፥ «ዳዊቲ ናዓው፥ ኑና ማራርኪ» ያጊሼ ኢያ ካሊደሶና።

28 ዬሱሲ ሶ ጌሊዲ ዋዴ ቆቄቲ ኢያ ካሊዲ ዪደሶና። ዬሱሲ ኤንታኮ፥ «ታኒ ሄሳ ኦላናው ዳንዳዔይሳ ሂንቲ ኣማኔቲ?» ያጊሰ።

ኤንቲካ፥ «ኤ፥ ጎዳው» ያጊዲ ዛሬደሶና።

29 ሄሳፌ ጉዬ፥ ዬሱሲ ኤንታ ኣይፊያ ቦቹዲ ኤንታኮ፥ «ሂንቲው፥ ሂንቲ ኣማኑዋሶ ሃኖ» ያጊሰ።

30 ኤንታ ኣይፊይካ ደዬቲሰ። ዬሱሲ ኤንታኮ፥ «ሃይሳ ኦዴሰካ ኦደፒቲ» ያጊዲ ሚንሌ ኦዲሰ።

31 ሺን ኣሳቲ ቢዲ ዬሱሳባ ሄ ቢታ ኡባን ኦዲደሶና።

32 ኤንቲ ያፔ ኬያ ዋዴ ኣሳይ ቱና ኣያናይ ኦይኪዲ ሙሚሲዳ ኢሲ ኣሲ ዬሱሳኮ ኤሂደሶና።

33 ቱና ኣያናይ ኬዪዳፔ ጉዬ ሙሚ ኡራይ ኦደቲሰ። ዳሬይካ ማላሌቲዲ፥ «ሃይሳ ማላ ኦራላባይ ኢሰራዔሌ ቢታን ሃኒቤና» ያጊደሶና።

34 ሺን ፋሪሳዊቲ፥ «ቱና ኣያናታ ሃላቃን ቱና ኣያናታ ኬሴሰ» ያጊደሶና።

ዬሱሲ ኣሳሰ ቃዴቲሰ

35 ዩሱሲ አይሁዳ ዋሳ ከላታን ታማርሲሼ፣ ሳሎ ካዎቴላ ዋንጌላ ሳባኪሼ፣ አሳ ሃርጌ ኡባፌ ፓሊሼ ካታማታኒኔ ጉታ ኡባን ዩዩሰ።

36 ዳሮ ዳሬይ፣ ሄሚያ አሲ ባይና ደርሳዳ ኤንታና ቤዒያ አሲ ጳዩን ኡንዔቲዲ ዳዔይሳታ ቤዒዲ ኤንታው ቃጴቲሰ።

37 ባ ታማሬታኮ፣ «ሺቃና ካላይ ዳሮ፣ ሺን ካላ ሺሺያ አሳይ ጉላ።

38 ሄሳ ጊሾ፣ ጎዳይ ካላ ሺሺያ ኦሳንቸታ ዩዳና ሜላ ዋሲቲ» ያገሰ።

10

ዩሱሲ ከቲዳ ታማኔ ናምዑ ሃዋሬታ (ማር 3:13-19፤ ሉቃ 6:12-16)

1 ዩሱሲ ታማኔ ናምዑ ታማሬታ ባኮ ጄጊዲ፣ ቱና አያናታ ኬሳና ሜላኔ ሃርጌ ኡባ ፓላና ሜላ ኤንታው ማታ ኢሚሰ።

2 ዩሱሲ ከቲዳ ታማኔ ናምዑ ሃዋሬታ ሱንላይ፣ ኮይሮይ ጳዔሮሳ ጊያ ሲሞናኔ ኢያ ኢሻ ኢንዲሪያሳ፣ ዛብዲዮሳ ናዓ ያይቆባኔ ኢያ ኢሻ ዮሃኒሳ።

3 ፊልጶስ፣ ባርቶሎሚዮሳ፣ ቶማሳኔ ቃራፃ ቃንዲሲያ ማቶሳ፣ ኢልፊዮሳ ናዓ ያይቆባ፣ ታዲዮሳ።

4 ባ ቢታሰ ሚሼቲያ ሲሞናኔ ዩሱሳ አሊ ኢሚዳ አሰቆርታ ዩሁዳ።

5 ሄ ታማኔ ናምዓታ ዩሱሲ ከቲዲ ዩዲሼ፣ «አይሁዳ ጊደና ዳሪያኮ ቦፒቲ፣ ቃሲ ሳማሬታ ካታማካ ጌሎፒቲ።

6 ሺን ኢሰራዔል ከላፌ ጊዲዳ ሂኒ ጳዩዳ ደርሳታኮ ቢቲ።

7 ያ ቢዲ፣ «ሳሎ ካዎቴላይ ማታቲሰ» ጊዲ ኦዲቲ።

8 ሃርጋንቸታ ፓሊቲ፣ ሃይቂዳይሳታ ሃይቆፔ ዳንሊቲ፣ ባሮ ሃርጋንቸታ ጌሺ ፓሊቲ፣ ቱና አያናታ ኬሲቲ። ሂንቲ ጮ ኤኪዳይሳ ጮ ኢሚቲ።

9 ሂንቲ ከሴን ዎርቃ፣ ዎይኮ ቢራ ሳንቲሜ ኦይኮፊቲ።

10 ሂንቲ ኦጊያሰ ካርዒቶ፣ ናምዑ አፊላ፣ ዎይኮ ጫማ ዎይኮ ፃምዓ ኦይኮፊቲ፤ ኦሳንቸዋሰ ጋላሳ ካሊ ኮሼሰ።

9:35 ማቶ 4:23፤ ማር 1:39፤ ሉቃ 4:44 9:36 ታይ 27:17፤ 1ካዎ 22:17፤ 2ታሪ 18:16፤ ሂዝ 34:5፤ ማር 6:34 9:37 ሉቃ 10:2 10:7 ሉቃ 10:4-12
10:10 1ቆሮ 9:14፤ 1ጊሞ 5:18

11 «ሂንቴ ኢሲ ካታማ ወይኮ ጉታ ጌሊያ ዎዴ ሂንቴና ሞኪዲ ኤካናው ኡፋይቲያ ኡራ ኮዪዲ ኢያ ሶን ሸምፒቴ፤ ሂንቴ ባና ጋካናው ያን ጋምባቴ።

12 ቃሲ ኦዴ ሶካ ጌሊሼ ሳርሊቴ።

13 ሄ ከላይ ሂንቴና ሞኪኮ ሂንቴ ሳርሊዳ ሳርይ ኤንታና ጋኮ። ሺን ኤንቲ ሞኮና ኢዲኮ ሂንቴ ሳርሊዳ ሳርይ ሂንቴው ጉዬ ሲሞ።

14 ኢኒካ ሂንቴና ሞኮናኔ ሂንቴ ኦዲያባ ሲዖና ኢዲኮ ሄ ከላፊ ወይኮ ሄ ካታማፔ ከዪሼ ሂንቴ ቶሁዋን ዴቢያ ባና ፒቴዲ ከዪቴ።

15 ታ ሂንቴው ቱማ ኦዲይሰ፤ ያሳ ፒርዳ ጋላሳን ሄ ካታማፔ ሶዶሜሲኔ ጋምራ ካታማታሰ ፒርዳይ ካዉያና።

16 «ታ ሂንቴና ዶርሳታዳ ሱቋሜታ ገዶ ዬዳና። ሄሳ ገሾ። ሾሻዳ ጪንጫታ፣ ሆሌዳ ኣዳታ ገዲቴ።

17 ኣሳይ ሂንቴና ፒርዳ ዳይናታሰ ኣሊ ኢማና፣ ቃሲ ኣይሁዴ ዎሳ ከላን ሂንቴና ጋራፋና። ሄሳ ገሾ፣ ኤንታፊ ናጌቴቴ።

18 ታ ገሾ ገዲ ሂንቴና ዴሪያ ሃሬይሳታ ሲንሌኔ ካዎታ ሲንሌ ኤፋና። ኤንታ ሲንሳኒኔ ኣይሁዴ ገዶና ዴሪያ ሲንሳን ኤቁዲ ሂንቴ ታባ ማርካታና።

19 ሺን ሂንቴና ፒርዳሰ ኣሊ ኢሚያ ዎዴ ወይገዲ ዛሪና ገዲ ኡንዴቶፊቴ፤ ሄ ሳቲያን ሂንቴ ጋናባ ያሳይ ሂንቴው ኢማና።

20 ኣይሰ ገኮ፣ ሂንቴናን ሃሳዬይ ሂንቴ ኣዎ ጌሻ ኣያናፔ ኣቲን ሂንቴና ገዴከታ።

21 «ኢሻይ ባ ኢሻ፣ ኣዎይ ባ ናዓ፣ ሃይቆስ ኣሊ ኢማና፣ ናይቲ ባንታና ዬሊዳይሳታ ቦላ ዴንዲዲ ኤንታና ዎቋሳና።

22 ታ ገሾ ገዲ ኣሳ ኡባይ ሂንቴና ኢፃና፣ ሺን ዉርሴሊ ጋካናው ሚኒዳይ ኣታና።

23 ኢሲ ሄራፔ ሂንቴና ኤንቲ ጎዲኮ ሃራ ካታማ ባቃቴቴ። ታኒ ሂንቴው ቱማ ኦዲይሰ፤ ኣሳ ናዓይ ያና ጋካናው፣ ሂንቴ ኢሰራዔሌ ካታማ ኡባ ካንሌከታ።

24 «ታማሬይ ባ ኣሰታማሪያፔ፣ ኣይሌይ ባ ጎዳፔ ኣቋና።

10:14 ሃ.ኦ 13:51 10:15 ማቶ 11:24፤ ሜዴ 19:24 10:16 ሉቃ 10:3
10:17 ማር 13:9-11፤ ሉቃ 12:11-12፤ 21:12-15 10:21 ማር 13:12፤
ሉቃ 21:16 10:22 ማቶ 24:9፤ ማር 13:13፤ ሉቃ 21:17፤ ማቶ 24:13፤ ማር
13:13 10:24 ሉቃ 6:40፤ ዮሃ 13:16፤ 15:20

25 ታማሪይ ባ አስታማሪያ፡ አይሌይ ባ ጎዳ ዳኒኮ ኢያው ጊዳና። ከላዋ ቢዔልዜቡላ ጊኮ ኢያ ሶ አሳ ዋኒዲ ኢሲዲ ያጌኔ?

26 «ሂዛ፡ አሳስ ያኖፊቴ። ካመቲዳባይ ቆንጮና፡ ቆሴቲዳባይ ጌሺ ከዮና አቴና።

27 ታኒ ሂንቴው ቋማን ኦዲያባ ሂንቴ ፖጋን ኦዲቴ፤ ታ ሂንቴው ሃይላን ካልካሺዳባ ዳባባን አዋጂቴ።

28 አሾፕ አቴን ሸምፖ ዋቋናው ዳንዳጋይሳታስ ያኖፊቴ። ሺን ሸምፕዋኔ አሾዋ ጋናሜን ቋይሳናው ዳንዳዲያ ያሳሰ ያዩቴ።

29 ናምዑ ቡቤቲ ኢሲ ሳንቲሜን ባይዜቶኮናዬ? ሃኖፕ አቴን፡ ኤንታፌ ኢሲናካ ሂንቴ ያሳይ ጎና ዳዲሺን ሳባን ዋቋኩ።

30 ሃሪ አቶሺን፡ ሂንቴ ሁዔ ቢናናይካ ፓይዳቲዲ ዳዔስ።

31 ሂዛ፡ ዳሮ ቡቤታፕ ሂንቴ አቋያ ጊሾ ያኖፊቴ።

32 «አሳ ሲንላን ታው ማርካቲያ ኡባሰ ታኒካ ሳሎዋን ዳዲያ ታ አዋ ሲንላን ማርካታና።

33 ሺን አሳ ሲንላን ታና ካዳይሳ ታኒካ ሳሎን ዳዲያ ታ አዋ ሲንላን ካዳና።

34 «ታኒ ሳባን ሳሮ ኤሃናው ዪዳ ሂንቴው ዳኖፖ። ታኒ ቶራፔ አቴን ሳሮቴሊ ኤሃናው ያቢኬ።

35 ታኒ ዪዳይ፡ ሩናዓ አዋፕ

ማጫ ናዲው አዬፕ ሩና ማቸው አዚና አዬፕ ሻካናሳ።

36 አሳስ ሞርኬቲ ኢያ ሶ አሳታ ጊዳና።»

37 «ታፕ አሊዲ ባ አዋ ዋይኮ ባ አዪው ደሴይ፡ ታባ ጊዳናው ቤሴና። ባ አዳ ናዓ ዋይኮ ባ ማጫ ናዲው ታፕ አሊዲ ደሴይ፡ ታባ ጊዳናው ቤሴና።

38 ባ ማሰቃሊያ ቶኪዲ ታና ካሎና ኦኒካ ታባ ጊዳናው ቤሴና።

39 ባ ሸምፕዋ አሻናው ኮዬይ ቋይሳና፡ ሺን ባ ሸምፕዋ ታ ጊሾ አሊ ኢሜይ አሻና።

40 «ሂንቴና ሞኬይ ታና ሞኬስ፡ ታና ሞኬይ ቃሲ ታና ከቲዳይሳ ሞኬስ።

10:25 ማቶ 9:34፤ 12:24፤ ማር 3:22፤ ሉቃ 11:15 10:26 ማር 4:22፤ ሉቃ 8:17 10:33 2ዲሞ 2:12 10:35 ሚክ 7:6 10:38 ማቶ 16:24፤ ማር 8:34፤ ሉቃ 9:23 10:39 ማቶ 16:25፤ ማር 8:35፤ ሉቃ 9:24፤ 17:33፤ የሃ 12:25 10:40 ሉቃ 10:16፤ የሃ 13:20፤ ማር 9:37፤ ሉቃ 9:48

41 ናቢያ ናቢ ሱንላን ሞኬይ፣ ናቢያሉ ወይቲታና፤ ቃሲ ዲሉዋ ዲሎ ሱንላን ሞኬይ፣ ዲሉዋሉ ወይቲታና።

42 ታ ሂንቲው ቱማ ኦዲይስ፤ ሃ ታ ታማሬታፔ ጉዲያ ኢሱዋስ ታና ካሊያ ጊሾ ሃሪ ኣቶሺን ጉላ ኢርፃ ሃሌ ኢሚኮ ኢያ ወይቶይ ቆዩና» ያጊሰ።

11

ፃማቂያ ዮሃንሲ ከቲዳ ኣሳታ
(ሉቃ 7:18-35)

1 ዬሱሲ ታማኔ ናሞዑ ታማሬታ ከታ ኣንጊዳፔ ጉዬ ያፔ ዴንዲዲ ታማርሳናውኔ ሳባካናው ጋሊላ ካታማታ ቢስ።

2 ዮሃንሲ ቃሾ ከላን ዴዲሼ ከሪስቶሲ ኦሌያባታ ሲዲዲ፣ ባ ታማሬታፔ ኢያኮ ከቲዲ።

3 «ያና ጌቲቲዳይ ኔኔዬ? ወይኮ ኦኒ ሃራ ናጊኖ?» ያጊዲ ኦይቺስ።

4 ዬሱሲ ኤንታኮ ዛሪዲ፣ «ቢዲ ሂንቲ ሲዲያባኔ ሂንቲ ቤዲያባ ዮሃንሳስ ኦዲቲ።

5 ቆቄቲ ዳሎሶና፣ ዋቤቲ ሃሙቶሶና፣ ባር ሃርጋንቸቲ ፓፆሶና፣ ቱሌቲ ሲፆሶና፣ ሃይቁዳይሳቲ ሃይቆፔ ዴንዶሶና፤ ማንቆታስ ዋንጌላይ ሳባከቲስ።

6 ታናን ቆቤቶናይ ኣንጃቲዳይሳ» ያጊሰ።

7 ዮሃንሳ ታማሬቲ ጉዬ ሲሚዲ ቢን፣ ዬሱሲ ዴሪያስ ዮሃንሳባ ኦዲሼ፣ «ሃ ባዙዋ ኣይ ቤዳናው ከዪዴቲ? ጫርኮይ ቃሌያ ማቃ ቤዳናው ዪዴቲዬ?

8 ያቲን፣ ኣይ ቤዳናው ከዪዴቲ? ከቲ ማፆ ማዲዳ ኣሴ ቤዳናሴዬ? ከቲ ማፆ ማዲዳይሳቲ ካዎታ ከላን ዴፆሶና።

9 ያቲን፣ ኣይ ቤዳናው ከዪዴቲ? ናቤ ቤዳናሴዬ? ሄኮ፣ ሂንቲ ናቤፔካ ኣጴይሳ ቤዴታ።

10 «ኔ ኦጊያ ኔ ሲንላን ጊጊሲያ ታ ከታንቸዋ ኔፔ ሲንሌ ከታና»

ጌቲቲዲ ፃፊቲዳይ ኢያሳ።

11 ታ ሂንቲው ቱማ ኦዲይስ፤ ማጫሳፔ ዬሌቲዳይሳታ ጊዶፊ ዮሃንሳፔ ኣጴይ ኦኒካ ባዋ፤ ሳሎ ካዎቲላን ኡባፊ ጉዳይ ኢ፣ ኢያፔ ኣቆና።

12 ፃማቂያ ዮሃንሳ ወዲያፔ ደሚዲ ሃቺ ጋካናው ሳሎ ካዎቲላይ ዳር ናቄቲስ፣ ሚኒዳ ኣሳቲ ዋልቃን ያ ጌላና።

13 ናቤቲ ኡባይኔ ሙሴ ሂጌይ ዮሃንሳ ወደ ጋካናው ሳሎ ካዎቲላባ ቲንቢቲ ኦዲደሶና።

14 ሂዛ፣ ሂንቴ ኤንታ ኪታ ኣማናና ገዲኮ፣ ያና ጌቴቲዳ ኤሊያሲ፣ ኢ ዮሃንሳ።

15 ሂዛ፣ ሲዒያ ሃይሊ ዴዔይ ሲያ።

16 «ሂዛ፣ ሃ ወዲያ ዩሌቴላ ኣይቢራ ዳኒሶ? ገያ ገደን ኡቲዲ ዋሊ ዪገዲ፣

17 ሉ ሂንቴው ሱሱልዔ ፑኒን፤

ሂንቴ ዩዳኬታ።

ኑ ሳቢዲ ዘሌሊን፤

ሂንቴ ዩኬኬታ)

ያገያ ናይታ ዳኖሶና።

18 ፃማቂያ ዮሃንሲ ሞናኔ ኡዮና ዩን፣ ሉቴና ኣያኒ ዴዔሰ) ያገዴታ።

19 ኣሳ ናዓይ ሚሼኔ ኡዩሼ ዩን፣ ኣያራሞባኔ ኡሻንቸ፣ ቃራፃ ቃንዲሴይሳታኔ ናጋራንቸታ ዳቦ) ያገዴታ። ሂዛ፣ ጨንጫቴላ ቱማቴላይ ኢያ ኦሱዋን ቆንጨኖስ» ያገሰ።

ኣማናና ኢዲዳ ካታማታ

(ሉቃ 10:13-15)

20 ሄሳፌ ጉዩ፣ ዩሱሲ ዳሮ ማላታታ ኦሊዳ ካታማታን ዴዒያ ኣሳቲ ባንታ ናጋራፔ ሲሚዲ ማሮታን ጌሎና ኢዲዳ ገሹ ኤንታና።

21 «ኣዩ ኮራዚኔ ካታማው፣ ኣዩ ቤቴሳይዳ ካታማው፣ ኣይሰ ጊኮ፣ ሂንቴ ገደን ኦሴቲዳ ማላታቲ ዪሮሳኒኔ ሲደናን ኦሴቲዳ ገዲያኮ፣ ኤንቴ ቤኒ ቢዶ ቲዩቲዲ፣ ካሌ ማዒዲ ባንታ ናጋራፔ ሲሚ ኣጋና።

22 ሺን ታ ሂንቴው ኦዲይሰ፤ ፐርዳ ጋላሰ ሂንቴፌ ኣሊዲ ዪሮሳሲኔ ሲደናሰ ፐርዳይ ካዉያና።

23 ቃሲ፣ ቁፊርናሆሜ፣ ኔኒ ፑዴ ሳሎ ኬያናው ኮያይ? ሃኔና! ኔኒ ሲዖሌን ዩጌታና። ኣይሰ ጊኮ፣ ኔ ገደን ኦሴቲዳ ማላታቲ ሶዶሜን ኦሴቲዳባ ገዲያኮ፣ ሶዶሜይ ሃቺ ጋካናው ዴዓናሺን።

24 ሺን ታ ኔው ኦዲይሰ፤ ፐርዳ ጋላሰ ኔፔ ኣሊዲ ሶዶሜሰ ፐርዳይ ካዉያና» ያገዲ ሃንቁቲስ።

ኪሪሰቶሳን ዴዒያ ሸምፖ

(ሉቃ 10:21-22)

11:14 ሚል 4:5፤ ማቶ 17:10 11:21 ኢሳ 23:1-18፤ ሂዛ 26:1-28:26፤
ኢዩ 3:4-8፤ ኣሞ 1:9-10፤ ዛካ 9:2-4 11:23 ኢሳ 14:13 11:24 ማቶ
10:15፤ ሉቃ 10:12

25 ሄ ዎዴ ዩሱሲ፡ «አዋው፡ ሳሉዋኔ ሳዓ ጎዳው፡ ኔኒ ሃይሳ ኤራንቸታፕቴ ጨንጫታፕቴ ገንፋዳ ናይታሰ ቆንጨሲዳ ጊሾ ኔና ጋላታይሰ።

26 ኤ፡ ታ አዋው፡ ሃይሲ ኔ ሎዖ ሸኒያዳ ሃኒሰ።

27 «ኡባይ ታው ታ አዋፕ ኢሜቲሰ። አዋፕ ሃሪ ናዓ ኤሬይ ባዋ፡ ናዓፕቴ ኢ ኤንታው ቆንጨሳናው ኮዩይሳታፕቴ ሃሪ አዋ ኤራናው ዳንዳዔይ ባዋ።

28 «ሂንቴኖ፡ ዳቡራንቸቶ፡ ቶሆይ ዳዒዳ ኡባይ ታኮ ሃ ዪቴ፤ ታኒ ሂንቴና ሸምፕሳና።

29 ታኒ ታ ዎዛናን አሸኬኔ አዳ ጊዲያ ጊሾ ታ ቃምባራን ጌሊቴ፡ ታፕቴ ታማሪቴ፤ ሂንቴ፡ ሂንቴ ሸምፕዋሰ ሸምፕ ዳማና።

30 ታ ቃምባራይ ሊቆ፡ ቃሲ ታ ቶሆይካ ካዉሼ» ያገሰ።

12

ሳምባታ ቦንቻናው ቤሲ?

(ማር 2:23-28፤ ሉቃ 6:1-5)

1 ሄሳፌ ጉዬ፡ ሳምባታ ጋላሰ፡ ዩሱሲ ጋዴ ጊዶራ አጼሰ። ዩሱሳ ታማሬቲ ኮሻቲዳ ጊሾ ቲያ ባንጋ ሸሪኪዲ ሞሶና።

2 ሸን ፋሪሳዌቲ ሄሳ ቤዒዲ ዩሱሳኮ፡ «ሄኮ፡ ኔ ታማሬቲ ሳምባታ ጋላሰ አፋናው ቤሶናባ አሉሶና» ያገደሶና።

3 ዩሱሲ ኤንታኮ ዛሪዲ፡ «ዳዊቴይ ኮሻቲዳ ዎዴ ኢያራ ዳዔይሳታራ አይ አሊዳኮ ናባቢቤኬቲ?

4 ዳዊቴይ ያሳ ኬሊ ጌሊዲ ካሂኔታ ዓላላፕ አቲን ኢኔ ኢያራ ዳዔይሳታሰ ቤሶና ጌሻ ዳቡዋ ሚሰ።

5 ዎይኮ ካሂኔቲ ሳምባታ ዎጋ ሻሪዲ ያሳ ኬላን ሳምባታ ጋላሰ አሶ አሊኮ ኤንታው ባላ ጊደናይሳ ሙሴ ሂጊያን ናባቢቤኬቲ?

6 ሸን ሰዒቲ! ያሳ ኬላፌ አጼይ ሃይሳን ዳዔሰ።

7 ታኒ ሂንቴ ያርሹዋ ጊደናሸን ሂንቴ ሃራታ ማራና ሜላ ኮያይሰን ጊያ ቃላይ ዎይ ጉሴኮ ሂንቴ ኤሪዳኮ ዒሎ አሳ ቦላ ፕርዳኬታ።

8 አሳ ናዓይ ሳምባታ ጎዳ» ያገሰ።

9 ዩሱሲ ያፕ ቢዲ አይሁዳ ዎሳ ኬሊ ጌሊሰ።

11:27 ዮሃ 3:35፤ ዮሃ 1:18፤ 10:15 11:29 ኤር 6:16 12:1 ዛሬ 23:25
12:3 1ሳው 21:1-6 12:4 ሉዌ 24:9 12:5 ታይ 28:9-10 12:7
ማቶ 9:13፤ ሆሴ 6:6

10 ያን ኩሼይ ጉንዲዳ ኢሲ ኡራይ ዳዔስ። ዩሱሳ ሞታናው ጋሶ ኮያ አሳቲ፣ «ሳምባታ ጋላስ ፓላናው ቤሲ ቤሴኔ?» ያጊዲ ኦይቺዶሶና።

11 ኢ ኤንታኮ፣ «ሂንቲ ጊዶፊ ኢሱዋስ ዶርሲ ሳምባታ ጋላስ አፎን ወሊኮ፣ ጎቺዲ ኬሶናይ ኦኔ?»

12 ያቲን አሲ ዶርሳፊ ዋኒዲ ዳሮ አጴኔ? ሄሳ ጊሾ፣ ሳምባታ ጋላስ ሎዖባ ኦሶይ ቤሴስ» ያጊሰ።

13 ሄሳፊ ጉዩ፣ ዩሱሲ አዲያኮ፣ «ኔ ኩሺያ ፒዲ ኦላ» ያጊን፣ ኡራይ ፒዲ ኦሊስ። ኢያ ኩሼይ ፓዲ ሃንኮ ኩሺያዳ ሃኒስ።

14 ሺን ፋሪሳዊቲ ያፔ ካሬ ከዪዲ፣ ዩሱሳ ዋቲ ዋጳኔኮ ማቄቲዶሶና።

ፆሳይ ዶሪዳ አይሊያ

15 ዩሱሲ ኤንታ ቆፋ ኤሪዲ ሄ ቤሳ አጊዲ ሃራ ሶ ቢስ። ዳሮ አሳይ ኢያ ካሊዲ ቢዶሶና፣ ሃርጋንቸታ ኡባ ፓሊስ።

16 ዩሱሲ፣ «ታባ ሃራ ኦዳሰካ ኦዶፒቲ» ያጊዲ ሚንሏ ኦዲስ።

17 ሄሲካ ናቢያ አሳያሲ፣

18 «ሄኮ ታ ዶሪዳ አይሊይ፣

ታ ዶሴይሲ፣ ታና ኡፋይሴይሲ፣

ታኒ ታ አያና፣ ኢያ ቦላ ሸምፕሳና፤

ኢ፣ አይሁዳ ጊዶና ዳሪያስ ሱሬ ፒርዳባ አዋጃና።

19 ኢ ፓላሚና ዋይኮ ካጩና፤

ባ ቃላካ ዳንባን ጮ ሲሴና።

20 ሱሬ ፒርዳን ፆና ዳማና ጋካናው፣

ዲንጩቲዳ ማቃ ሚንሴና፣

ጩዪያ ሙቃዳ ቶይሴና።

21 አይሁዳ ጊዶና ዳሬይ ኡባይ ኢያን ኡፋይሲ ዋላና» ያጊዲ ፃፊዳይሲ ፖሌታና ሜላሳ።

ዩሱሳኔ ቢዔልዜቡላ (ማር 3:20-30፤ ሉቃ 11:14-23)

22 ሄሳፊ ጉዩ፣ ቱና አያናን አይኬቲዳ ቆቄኔ ሙሜ አሴ ዳዔይሳ ኢያኮ ኤሂዶሶና። ዩሱሲ ኡራ ፓሊን፣ ኡራይ ቤዒሲኔ ኦዳቲስ።

23 አሳ ኡባይ ማላሌቲዲ፣ «ሃይሲ ዳዊቲ ናባ ጊዳንዳሻ?» ያጊዶሶና።

24 ሺን ፋሪሳዊቲ ሄሳ ሲዲዲ፡ «ሃ ኡራይ ቱና ኣያናታ ኬሴይ ቱና ኣያናታ ሃላቃ ቢዔልዜቡላ ዋልቃና» ያገደሶና።

25 ዬሱሲ ኤንታ ቆፋ ኤሪዲ፡ «ዋሊ ገደን ሻኬቲያ ካዎቴላ ኡባይ ኩንዳና፤ ቃሲ ዋሊ ገደን ሻኬቲያ ካታማይ ዎይኮ ኬላይ ሚኒዲ ኤቄና።

26 ፃላሄይ ፃላሄ ኬሲያባ ገዲኮ ባ ገደን ሻኬቲሰ ጉሱ። ሄሳሉ ሃኒያባ ገዲኮ ኢያ ካዎቴላይ ዋኒዲ ሚኒዲ ኤቃናው ዳንዳዒ?

27 ታኒ ቱና ኣያና ኬሴይ ቢዔልዜቡላ ዋልቃን ገዲኮ ሂንቴና ካሊያ ኣሳቲ ኦዴ ዋልቃን ኬሳኔ? ሄሳ ገሾ፡ ሂንቴና ካሊያ ኣሳቲ ሂንቴና ፐርዳና።

28 ሺን ታኒ ቱና ኣያናታ ኬሴይ ፆሳ ኣያናን ገዲኮ፡ ፆሳ ካዎቴላይ ሂንቴኮ ዩሰ።

29 «ዎይኮ ኢሲ ኣሲ ዋልቃማ ኣሳ ሶ ጌሊዲ ኢያ ሻሉዋ ቦንቃናው ኮይኮ ኮይርቲዲ ሄ ኡራ ቃቾና ኢዲኮ ዋቲዲ ዳንዳዒ? ያቲኮ ኢያ ሻሉዋ ቦንቃናው ዳንዳዒሰ።

30 «ታራ ገደናይ ኦኒካ ታራ ኤቄቲሰ፤ ቃሲ ታራ ኢሲፌ ሺሾና ኡባይ ላሌሰ።

31 ሄሳ ገሾ፡ ሲዲቲ፤ ኣሳይ ኦሊያ ኣይ ናጋሪኔ ጫሻ ቃሊ ኡባይ ኣቶ ጌቲታና፡ ሺን ጌሻ ኣያና ጫያ ኦዴሰካ ኢያ ናጋሪይ ኣቶ ጌቲቲና።

32 ኦኒካ ኣሳ ናባ ቦላ ኢታባ ኦዴቲኮ ኢያው ኣቶ ጌቲታና፡ ሺን ጌሻ ኣያና ቦላ ኢታባ ኦዴቲያ ኦዴሰካ ሃ ሳባን ገዲን ያና ኣላሚያን ኢያ ናጋሪይ ኣቶ ጌቲቲና።

33 «ሎዎ ሚላይ ሎዎ ኣይፌ ኣይፌሰ፤ ቃሲ ኢታ ሚላይ ኢታ ኣይፌሰ። ሂዛ፡ ሚላይ ኤሬቲይ ባ ኣይፊያና።

34 ሂንቴና፡ ሾሻ ናይቶ፡ ሂንቴ ኢታ ገዲሼ ዋኒዲ ሎዎባ ኦዴታናው ዳንዳዒቲ? ኣሲ ባ ዋዛናን ኩሚዳባፔ ደናን ኦዴቲሰ።

35 ሎዎ ኣሲ ባ ዋዛናን ዋሊዳ ሎዎባፔ፡ ሎዎባ ኬሴሰ፤ ኢታ ኣሲ ባ ዋዛናን ዋሊዳ ኢታባፔ፡ ኢታባ ኬሴሰ።

36 ሺን ሲዲቲ፡ ኣሳይ ኦዴቲያ ጮ ኦዳ ኡባሰ ፐርዳ ጋላሰ ዘር ኢማና።

37 ኣይሰ ገኮ፡ ኔ ኦዴቲያ ኔ ቃላን ዓላና፤ ኔ ኦዴቲያ ኔ ቃላይ ኔ ቦላ ፐርዳና» ያገሰ።

12:24 ማቶ 9:34፤ 10:25 12:30 ማር 9:40 12:31 ሉቃ 12:10
12:32 ሉቃ 12:10 12:34 ማቶ 3:7፤ 23:33፤ ሉቃ 3:7፤ ማቶ 15:18፤ ሉቃ 6:45

ማላታ ቤዓናው ሸቂዳ ኦይሻ
(ማር 8:11-12፤ ሉቃ 11:29-32)

38 ሄሳፌ ጉዬ፥ ኢሲ ኢሲ ፋሪሳዊቲኔ ሂጌ ኣስታማሬቲ ዩሱሳኮ፥ «ኣስታማሪያው፥ ኔጌ ማላታ ኦሳዳ ኑና ቤሳ» ያጊደሶና።

39 ሺን ዩሱሲ ዛሪዲ፥ «ኣማኔቶናኔ ኢታ ዩሌቴላይ ማላታ ኮዩሰ። ሺን ናቢያ ዮናሳ ማላታፔ ሃራ ማላቲ ኢያው ኢሜቴና።

40 ዮናሲ ጌታ ሞሎ ኡሎን ሄዡ ጋላሲኔ ሄዡ ቃማ ጋምዒዳይሳ ማላ ኣሳ ናዓይ ሄዡ ጋላሲኔ ሄዡ ቃማ ቢታ ጋርሳን ጋምዓና።

41 ናናዌ ኣሳይ ፒርዳ ጋላሰ ዴንዲዲ ሃ ዩሌቴላ ቦላ ፒርዳና፤ ኣይሰ ጌኮ፥ ኤንቲ ዮናሳ ሲብካቲያ ሲዒዲ ባንታ ናጋራፔ ሲሚደሶና። ሄኮ፥ ዮናሳፔ ኣዴይሲ ሃይሳን ዴዔሰ።

42 ፒርዳ ጋላሰ ዲጌሃ ካዊያ ዴንዳዳ ሃ ዩሌቴላ ቦላ ፒርዳና፤ ኣይሰ ጌኮ፥ ኢያ ሶሎሞኔ ጨንጨቴላ ሲዓናው ቢታ ጋፃፔ ያሱ። ሄኮ፥ ሶሎሞኔፔ ኣዴይ ሃይሳን ዴዔሰ።

43 «ቴና ኣያናይ ኣሳፔ ከዩዳፔ ጉዬ ባው ሸምፒያሶ ኮዩዲ ሃላ ባይና ማላ ቤሳን ዳቡሬሰ፥ ሺን ባ ኮያ ሸምፑዋ ዴሜና።

44 ያኒን፥ ትታ ኣጋ ከዩዳ ከላ ሲማዳ ባና ያጌሰ። ኢ ሲሚያ ዋዴ ከላይ ካይሰ ጌዴይሳኔ ፒቴቲዲ ገጊ ኡቲዳይሳ ዴሜሰ።

45 ሃዛ፥ ሲሚ ቢዲ፥ ባፔ ኢቲያ ሃራ ላፑን ኢታ ኣያናታ ኤኪዲ ዩሰ፤ ኤንቲካ ኡራ ጊዶ ጌሊዲ ዴዖሶና። ሄ ኡራሰ ካሴይሳፌ ጉዩይሲ ዳሮ ኢቴሰ። ሃ ኢታ ዩሌቴላ ቦላ ሄሳ ማላ ሃናና» ያጊሰ።

ዩሱሳ ኣዩዉኔ ኢያ ኢሻታ
(ማር 3:31-35፤ ሉቃ 8:19-21)

46 ዩሱሲ ዴሪያሰ ኦዳ ቦላ ዴዒሺን ኢያ ኣያኔ ኢያ ኢሻቲ ኢያ ኦዲሳናው ኮዩዲ ካሬን ኤቂደሶና።

47 ኢሲ ኣሲ ኢያኮ፥ «ኔ ኣያኔ ኔ ኢሻቲ ኔና ኦዲሳናው ኮዩዲ ካሬን ኤቂደሶና» ያጊሰ።

48 ዩሱሲ ዛሪዲ፥ «ታ ኣያ ኦኔ? ታ ኢሻቲካ ኦናንቴ?» ያጊሰ።

49 ባ ኩሺያራ ታማሬታ ማሊሹ፥ «ቤዒቴ፥ ታ ኣያኔ ታ ኢሻቲ ሃይሳታ።

50 ሳሎን ዴዒያ ታ ኣዋ ሸኒያ ኦሊያ ኡባይ ታ ኢሻ፥ ታ ሚኾኔ ታ ኣዮ» ያጊሰ።

12:38 ማቶ 16:1፤ ማር 8:11፤ ሉቃ 11:16 12:39 ማቶ 16:4፤ ማር 8:12
12:40 ዮሃ 1:17 12:41 ዮሃ 3:5 12:42 1ካዋ 10:1-10፤ 2ታሪ 9:1-12

13

ዘሬሌ ዘሪያ ኡራ ለሚሶ
(ማር 4:1-9፤ ሉቃ 8:4-8)

- 1 ሄ ጋላስ ዩሱሲ ሶፔ ከዩዲ ኣባ ጋፃን ኡተሰ።
- 2 ዳሮ ዳሬይ ኢያ ዩሹዋን ሸቂን ኣሳ ኣባ ጋፃን ኣገጊዲ ዋሳሎን ጌሊዲ ኡተሰ።
- 3 ኣሳሰ ዳሮባ ለሚሶን ያጊዲ ኦዲሰ።
«ኢሲ ጎሻንቸይ ዘሬሌ ዘራናው ከዩሰ።
- 4 ኢ ዘሪያ ዋዴ ኢሲ ኢሲ ዘሬላቲ ኦጌ ጋፃን ዋዲዶሶና፤ ኤንታካ ካፎቲ ዩዲ ማዲ ሚዶሶና።
- 5 ኢሲ ኢሲ ዘሬላቲ ጋርሳን ሻሎይ ዳዒያ ቢታ ቦላ ዋዲዶሶና። ዳሮ ቢቲ ባይና ጊሾ ኤሌሲዲ ዶሊሰ።
- 6 ሺን ኣዋይ ከዩን ሹሊሰ፤ ፃጶይ ባይና ጊሾ ማሊሰ።
- 7 ኢሲ ኢሲ ዘሬላይ ኣጉንፋ ጊዶን ዋዲሰ፤ ኣጉንፋይ ዲጨዲ ሄ ዶላ ጩሊሰ።
- 8 ሃራቲ ቃሲ ኣራዳ ቢታ ቦላ ዋዲሰ፤ ዶሊዲ ኣይፌ ኣይፊሰ። ኢሶይ ፃታ፣ ኢሶይ ኡሱቸን ታማ፣ ኢሶይ ቃሲ ሃሰታማ ኣይፊሰ።
- 9 ሰዒያ ሃይሌ ዳዒያ ኡራይ ሰያ» ያጊሰ።
- 10 ዩሱሳ ታማሬቲ ኢያኮ ሸቂዲ፣ «ኣይሰ ኔኒ ዳሪያሰ ለሚሶን ኦዳይ?» ያጊዲ ኦይቸዶሶና።
- 11 ኢ ዛሪዲ፣ «ሂንቴው ሳሎ ካዋቴፋ ፀራ ኤራይ ኢማቲሰ። ሺን ኤንታው ኢማቲቤና።
- 12 ዳዒያ ኡባሰ ጉዠታና፣ ኢያው ዳራና፣ ሺን ባይናይሳፌ ሃሪ ኣቶሺን ኢያው ዳዒያራካ ኤኬታና።
- 13 ሄሳ ጊሾ፣ ታኒ ኤንቲ፣ ፃሊሽ ዳሞና ማላ፣ ሰዒሽ ሰያና ማላ ዋይኮ ኣኬኮና ማላ ኤንታው ለሚሶን ኦዳይሰ።
- 14 «ኢሳያሲ ባ ማፃፋን ኦዲዳይሲ ኤንታ ቦላ ፖሌቲሰ። ኢ ኦዲሽ፣
ኣሂንቴ ሲሳ ሰዒታ፣ ሺን ኣኬኬኬታ፤
ሂንቴ ፃሌታ፣ ሺን ቤዒኬታ።
- 15 ኣይሰ ጊኮ፣ ሃ ኣሳ ዋዛናይ ዘልዑሚሰ፤
ባንታ ሃይላ ኤሪሽ ቴሊሲዶሶና፣
ባንታ ኣይፊያ ጎዚዶሶና።
ሄሲ ባይኔኮ ኤንቲ ባንታ ኣይፊያን ቤዒዲ፣
ባንታ ሃይላን ሰዒዲ፣

ባንታ ዋዛናን እኩኪዲ፥

ታኮ ሰማና፥

ታካ ኤንታ ፓላናሺን» ያገሰ።

16 «ሺን ሂንቴ አይፊቴ ቤዲያ ጊሾኔ ሂንቴ ሃይላቲ ሲዲያ ጊሾ ሂንቴ አንጃቲዳይሳታ።

17 ታ ሂንቴው ቱማ ኦዲይሰ፤ ዳር ናቤቲኔ ዪሎ አሳቲ ሂንቴ ቤዴይሳ ቤዳናወኔ ሂንቴ ሲዴይሳ ሲዳናው አሞቲዶሶና፥ ሺን ኤንታው ሃኒቤና።

18 «ሂዛ፥ ሃ ዜሬላ ዜሬያ ኡራ ሌሚሱዋ ሲዲቲ።

19 እኔ ጋፃን ዋጂዳ ዜሬላ ሌሚሶይ ሃይሳ፡ ሳሎ ካዎቴላ ቃላ ሲዲዲ እኩኮና ኡራ ዋዛናፔ ፃላሄይ ዪዲ ኢያ ዋዛናን ዳዲያ ዜሬላ ማፂ ዲጌሰ።

20 ሻሎይ ጋርሳን ዳዲያ ቢታ ቦላ ዜሬቲዳይሲ ቃላ ሲዲዲ ኤሌሲዲ ኡፋይሳን ኤኬይሳታ።

21 ሺን ፃጸ ዩዳናው ዳንዳፖና ጊሾ ዳር ጋሞፖኮና። ቃላ ጋሶን ማቶይ ዋይኮ ጎዴቴሌ ያ ዋዴ ኤሌሲ ጴቤቶሶና።

22 አጉንሳ ጋሳን ዜሬቲዳይሲ ቃላ ሲዲሰ፡ ሺን ሃ አላሚያ ዲሳ ሂርጋይኔ ዲሬቴላ ቆፋይ ቃላ ጩሊያ ጊሾ አይፊ አይፎና አቴሰ።

23 ሺን አራዳ ቢታን ዜሬቲዳ ዜሬላይ እኩካን ቃላ ሲዲያ ኡራ። ኢ አይፊ አይፊሰ፤ ኢሶይ ዪታ፥ ኢሶይ ኡሱፑን ታማ ኢሶይ ቃሲ ሃሰታማ አይፊሰ» ያገሰ።

ሌሹዋ ሌሚሶ

24 ዩሱሲ ኤንታው ሃራ ሌሚሶ ኦዲሰ፥ «ፆሳ ካዎቴላይ ባ ጎሻን ሎፖ ዜሬሌ ዜሬዳ ኡራ ዳኔሰ።

25 ሺን አሲ ኡባይ ጂሰኪን ኢያ ሞርኬይ ዪዲ ገሰቲያ ገደን ሌሾ ዜሬዲ ቢሰ።

26 ገሰቲይ ዲጩዲ አይፊያ ዋዴ ሌሾይ ኢያ ገደን ቤንቲሰ።

27 «ጋዲያ ጎዳ አይሌቲ ጎዳኮ ቢዲ፥ (ጎዳው፥ ኔ ጎሻን ኔ ሎፖ ዜሬሌ ዜሬቢኪሾ? ያቲን፥ ሌሾይ አጫፔ ዪዴ?) ያገደሶና።

28 «ኢ ኤንታኮ፥ (ሃሳ ሞርኬይ ኦሊሰ) ያገሰ።

«አይሌቲ ጎዳኮ፥ (ኑ ቢዲ ሌሹዋ ሾዳና ማላ ኮያይ?) ያገደሶና።

29 «ሺን ኢ፥ (አቶ ቦቾፊቴ፤ ሂንቴ ሌሹዋ ሾዳይሰ ጊሺን ገሰቲይ ሾዴታና።

30 ቦቾፊቴ፤ ጫካ ዋዴይ ጋካናው ኢሲፌ ዲጮ። ሄ ዋዴ ጫኪያ አሳታ ሌሹዋ ሲንፋተዲ ማዲዲ ታማን ፀጋናው ሚርቁን ሚርቁን ቃቸቴ። ሺን ጊሰቲያ ሺሺዲ ታ ሻሊያን ቆሊቴ። ያጋና» ያጊሰ።

ጉላ ሚሴ ሌሚሶ
(ማር 4:30-32፤ ሉቃ 13:18-19)

31 ቃሲ ሃራ ሌሚሶ ያጊዲ ኦዲሰ፤ «ሳሎ ካዎቴላይ ኢሲ አሲ ባ ሳሻን ባኪዳ ጉላ ሚሴ አይፌ ዳኔሰ።

32 ሄ ሚሴ አይፌይ ሃራ ሚሳ አይፌታፔ ጉላ፣ ሺን ኢያ ዶላ ዲጪዳ ሃራ ሚሳታ ኡባፌ አቆ ጊታታዉሱ። ኢ ታሺያን ካፎቴ ኬዲዲ ኡታና ጋካናው ዋልቃማ ሚሴ ጊዳዉሱ» ያጊሰ።

ኢርሾ ሌሚሶ
(ሉቃ 13:20-21)

33 ካሊዲካ፣ ዬሱሲ ሃራ ሌሚሶ ኦዲሰ፤ «ሳሎ ካዎቴላይ ኢሲ ማጫሲ ሄቹ ጋባቴ ቋሌ ኤካ ሙኑቃዳ፣ ሙኑቃይ ዴንዳና ሜላ ኢያን ጉጁዳ ኢርሾ ዳኔሰ» ያጊሰ።

34 ዬሱሲ ዴጋያሰ ሄ ሌሚሶ-ዋ ኡባ ኦዲሰ። ሌሚሶይ ባይና ኢሲባካ ኦዲሴና።

35 ናቤይ ባ ማፃፋን፣
«ታኒ ታ ዶና፣ ሌሚሶን ዶያና፤
ሳሎይኔ ሳዓይ ሜዴቶሳፔ፣
ጌሚዳይሳ ኦዲይሰ»
ያጊዲ ኦዲዳይሲ ሄሳን ፖሌቲሰ።

ሌሾ ሌሚሶ-ዋ ቢርሼላ

36 ዬሱሲ ዴጋያ ሞይዚዲ ሶ ጌሊሰ። ኢያ ታማሬቲ ኢያኮ ሸቂዳ፣ «ሳሻን ዴዒያ ሌሹዋ ቢርሼላ ኦሰ ኦዲ» ያጊደሶና።

37 ኢ ዛሪዲ፣ «ሎ? ዜሬላ ዜሬዳይ አሳ ናዓ።

38 ሳሻይ ሃ አላሚያ። ሎ? ዜሬላይ ሳሎ ካዎቴላ ናይታ። ሌሾይ ፃላሄ ናይታ።

39 ሌሹዋ ዜሬዳይ ሞርኪያ ፃላሄ። ጫካ ዋዴይ፣ ዋዲያ ወርሴላ። ጫኬይሳቲ ኪታንቾታ።

40 «ሌሾይ ማፄቲዲ ታማን ፀጌቴይሳ ሜላ ዋዲያ ወርሴላን ሄሳዳ ሃናና።

41 እሳ ናዓይ ባ ኪታንቸታ ኪታና። ኤንቲ ናጋራስ ጋሶ ጊዳይሳታኔ ኢታ ኦሊያ ኡባ ማዲኒ ኢያ ካዎቴላፊ ኬሳና።

42 ማዲ ሺሺዲ ዩሆይኔ ኣቻ ጋርጩላ ዳዒያ ቶዖና ታማን ዩጋና።

43 ሄ ዎዴ ዲሎቲ ባንታ ኣዎ ካዎቴላን ኣዎዳ ፖዓና። ሲዒያ ሃይላ ዳዒይ ሲዖ!

44 «ዖሳ ካዎቴላይ ጎሻን ሞጌቲዳ ሚሼ ዳኔስ። ኢሲ ኣሲ ሄ ሚሺያ ዳሚዲ ዛሪ ሞጊስ። ዳሮ ኡፋይቲዲ ቢዲ ባው ዳዒያባ ኡባ ባይዚዲ ሄ ጎሻ ጋዲያ ሻሚስ።

45 «ሄሳዳካ፣ ቃሲ ሳሎ ካዎቴላይ ኢንቆ ጊያ ኣልዖ ሹቻታ ኮያ ዛልዓንቸ ዳኔስ።

46 ዳሮ ኣልዖ ኢንቁዎ ዳሚዲ ቢዲ ባው ዳዒያባ ኡባ ባይዚዲ ኢያ ሻሚስ።

ሞሎ ኦይኪያ ጊቲ ሌሚሶ

47 «ቃሲ ዖሳ ካዎቴላይ ኣባን ዩጌቲዳ ዲማ ዲማ ቆሞ ሞሎ ኦይኪያ ጊቲያ ዳኔስ።

48 ሞሎ ኦይኪያ ኣሳቲ ሞሎይ ጊቲያን ኩሚን ኣባፊ ጋዖ ኬሲዶሶና። ያን ኡቲዲ ሎዑዎ ቆሪ ቆሪ ዳቸን ዩጊዶሶና፣ ሺን ኢታ ሞሎታ ዎራ ሆሊዶሶና።

49 ዎዲያ ዉርሴላን ሄሳሉ ሃናና። ኪታንቸቲ ዩዲ ናጋራንቸታ ዲሎታፔ ሻኪዲ፣

50 ዩሆይኔ ኣቻ ጋርጩላ ዳዒያ ቶዖና ታማን ዩጋና።

51 «ሃ ኡባይ ሂንቲው ጌሊዴ?» ያጊዲ ኤንታ ኦይቸስ።

ኤንቲ ዛሪዲ፣ «ኤ» ያጊዶሶና።

52 ዩሱሲ፣ «ሃዛ፣ ሳሎ ካዎቴላ ኤራ ኤኪዲ ሂጊያ ታማርሲያ ኡባይ፣ ባ ሚንጂዳ ሻሎዎፔ ኦራላኔ ጋልዓ ኬሲያ ኣሴ ዳኔስ» ያጊስ።

ዩሱሲ ናዚሬቴን ኢዳቲስ

(ማር 6:1-6፤ ሉቃ 4:16-30)

53 ዩሱሲ ሃ ሌሚሱዎ ኦዲ ዉርሲዳፔ ጉዬ ያፔ ዳንዲዲ ቢስ።

54 ባ ዩሎቲዳ ቢታ ቢዲ ኣይሁዳ ዎሳ ኬላን ዳሪያ ታማርሲስ። ኤንቲ ማላሎቲዲ፣ «ሃ ኡራይ ሃ ጨንጫቴላኔ ሃ ማላታታ ኦሊያ ዎልቃ ኣዉፔ ኤኪዴ?»

55 ሃይሲ ኣናዲያ ናዓ ጊዳኔዬ? ኢያ ኣዬ ሱንላይ ማይራሞ ጊዳኔ? ኢያ ኢሻቲ ያይቆባ፣ ዮሴፋ፣ ሲሞናኔ ዩሁዳ ጊዶኮናዬ?

56 ኢያ ሚቼቲ ኑራ ዳዖሶና ገደኮና? ያቲን፣ ሃ ኡራይ ሃ ኡባ ኣዉፔ ኤኪዴ?» ያገደሶና።

57 ሄሳ ገሾ፣ ኢ ገያባ ኤኮና ኢዲደሶና።

ሺን ዩሱሲ፣ «ናቤይ ባ ዩሌቲዳ ቢታኒኔ ባ ሶ ኣሳ ማታን ቦንቼቲና» ያገሰ።

58 ኤንቲ ኣማኖና ኢዲዳ ገሾ ዳሮ ማላታታ ሄ ቤሳን ኦሊቤና።

14

ፃማቂያ ዮሃንሳ ሃይቁዋ

(ማር 6:14-29፤ ሉቃ 9:7-9)

1 ሄ ዎዴ ጋለላ ኣይሲያ ሄሮዲሲ * ዩሱሳባ ሲዒሰ።

2 ባ ኣይሌታኮ፣ «ሃይሲ ፃማቂያ ዮሃንሳ፤ ኢ ሃይቆፔ ዴንዲሰ። ያኒዳ ገሾ ሃ ኡባ ማላታታ ኢ ኦሌስ» ያገሰ።

3 ኢ ሄሳ ገዳይ ሄሮዲሲ ባ ኢሻ ፊልጶሳ ማቼ ሄሮዲያዲ ጋሶን ዮሃንሳ ቃሾ ኬሊ ጌልሲዳ ገሾሳ።

4 ዮሃንሲ ሄሮዲሳ፣ «ኔ ኢዮ ኤካናው ዎጋ ገዴና» ያገሰ።

5 ሄሮዲሲ ዮሃንሳ ዎቆናው ኮዩሰ፣ ሺን ዳሬይ ዮሃንሳ ናቤ ኦሊዲ ቤዒያ ገሾ ያሹቲሰ።

6 ሄሮዲሲ ባ ዩሌቲዳ ጋላሳ ቦንቼያ ዎዴ ሄሮዲያዳ ናዒያ ኣሳ ሲንሳን ዩላን ዱራዳ ኢያ ኡፋይሳሱ።

7 ያቲን፣ ኢ፣ «ኢያ ኮያባ ኡባ ኢማና ገዲ» ጨቂሰ።

8 ናዒያ ባ ኣዬ ዘሪያ ሲዒዳ ሄሮዲሳኮ፣ «ፃማቂያ ዮሃንሳ ሁዒያ ኬሬን ዎላዳ ታው ኣማ» ያጋሱ።

9 ኢያ ያገን ካዎይ ቁርቲሰ፣ ሺን ባ ጨቁዋ ገሾኔ ባራ ዳዒያ ኢማላታ ገሾ ገዲ ኢ ኦይሻይ ፖሌታና ማላ ከቲሰ።

10 ካዎይ ኣሴ ከቲዲ ዮሃንሲ ቃሾ ኬላን ዳዒሺን ኢያ ቆጲያ ጎይሪሲሰ።

11 ሁዒያ ኬሬን ዎላ ኤሄዲ ናዒሰ ኢሚደሶና፤ ናዒያካ ኤካዳ ባ ኣዩሰ ኤፋሱ።

12 ዮሃንሳ ታማሬቲ ዩዲ ኢያ ኣሃ ኤፊዲ ሞገደሶና። ኢያፔ ጉዬ ሃኒዳባ ኡባ ቢዲ ዩሱሳሰ ኦዲደሶና።

ዩሱሲ ኢቻሹ ሙኩሉ ኣሳ ሙዚሰ

(ማር 6:30-44፤ ሉቃ 9:10-17፤ ዮሃ 6:1-14)

13:57 ዮሃ 4:43 * 14:1 ሄሮዲሲ፡ ሃይሲ ካዉዋ ሄሮዲሲ ኣንቲጳሳ። ኢ ዩሁዳኔ ፔሪያ ከሪሰቶሲ ዩሊታናፔ ሲንሌ 4-39 ሞ.ል. ጋካናው ሃሪሰ። ኢ ካዉዋ ሄሮዲሳሰ ናዒ። 14:4 ሉቃ 3:19-20፤ ለዌ 18:16፤ 20:21

13 ዩሱሲ ሃኒዳባ ሲዒዳ ዎዴ ዎጎሉዎን ጌሊዲ ሄ ቤሳፌ ኢሲ ጌሚያ ሶ ባርካ ቢሰ። ኣሳይ ሄሳ ሲዒዲ ካታማታፔ ዴንዲዲ ቶሆን ኢያ ካሊደሶና።

14 ዩሱሲ ዎጎሉዎፔ ዎዲዲ ዳሮ ኣሳ ቤዒዲ ኤንታው ቃዴቲሰ። ኤንታ ጊደን ዴዒያ ሃርጋንኛታ ፓሊሰ።

15 ሳዓይ ኦማርሲሼ ቢያ ዎዴ ዩሱሳ ታማሬቲ ኢያኮ ሺቂዲ፥ «ሃ ቤሳይ ኣሲ ባይና ቤሲ፥ ሳዓይካ ቃሚሰ። ያኒያ ጊሹ፥ ሄራን ዴዒያ ጉታታ ቢዲ ባንታው ሻሚዲ ማና ሜላ ዴሪያ ዩዳ» ያጊደሶና።

16 ሺን ዩሱሲ ኤንታኮ፥ «ዴሬይ ሞና ባናው ኮሼና፤ ኤንቲ ማናባ ሂንቲ ኢሚቲ» ያጊሰ።

17 ኤንቲ ዛሪዲ፥ «ኮሰ ሃይሳን ኢቻሹ ኡይላፌኔ ናምዑ ሞሎፔ ሃሪ ባዎ» ያጊደሶና።

18 ኢካ፥ «ኣኔ ኤንታ ሃ ኤሂቲ» ያጊሰ።

19 ካሊዲካ፥ ዴሬይ ማታን ኡታና ሜላ ኦዲሰ። ኢቻሹ ኡይላኔ ናምዑ ሞሎታ ኤኪዲ፥ ሳሎ ያሊዲ ጋላቲ ሲሚዲ፥ ኡይላ ሚንሊዲ ባ ታማሬታሰ ኢሚሰ፤ ኤንቲ ቃሲ ዴሪያሰ ኢሚደሶና።

20 ኡባይ ሚዲ ካሊደሶና። ዩሱሳ ታማሬቲ ሚሺን ኣቲዳይሳ ታማኔ ናምዑ ጋይታ ዴንሊደሶና።

21 ካላ ሚዳ ኣሳይ ማጫሳይኔ ናይቲ ኣቲን ኢቻሹ ሙኩሉ ጊዴሰ።

ዩሱሲ ኣባ ቦላራ ሃሙቲሰ
(ማር 6:45-52፤ ዮሃ 6:15-21)

22 ዩሱሲ ባ ታማሬቲ ዎጎሉዎን ጌሊዲ ባፔ ሲንላቲዲ ኣባፌ ሄ ፊንሊ ፒናና ሜላ ኪቲዲ ባው ዴሪያ ሞይዛናው ጉዬ ኣቲሰ።

23 ዴሪያ ሞይዚ ሲሚዲ ባርካ ዎሳናው ኢሲ ዴሪያ ቦላ ኬዩሰ። ሳዓይ ቃሚንካ ኢ ባርካ ያን ጋምዒሰ።

24 ሄ ዎዴ ዎጎሎይ ኣባ ቦላ ቢሺን ሲንላ ባጋራ ጫርኮይ ዴንዲን ሆቤይ ዎጎሉዎ ኡንዔሊሰ።

25 ዎንቲማላ ቦላ ዩሱሲ ኣባ ቦላ ሃሙቲሼ ባ ታማሬታኮ ዩሰ።

26 ኢያ ታማሬቲ፥ ኢ ኣባ ቦላ ሃሙቲሼ ባንታኮ ዩይሳ ቤዒዲ ያዩደሶና። ኤንቲካ፥ «ሃይሲ ሞይቲሌ» ጊዲ ያዩዲ ሞሲደሶና።

27 ሺን ዩሱሲ ኤሌሲዲ፥ «ኣይኮይ ባዎ! ያዮፊቲ! ታናባይ» ያጊሰ።

28 ያዲርሲ ኢያኮ፥ «ጎዳው፥ ኔና ጊዲኮ፥ ታኒ ሃላ ቦላራ ሃሙታዳ ኔኮ ባና ሜላ ታና ኪታ» ያጊሰ።

29 ዩሱሲ ጳጳሮሳኩ፡ «ሃያ» ያገለገለ።
ጳጳሮሲ ዋሳሎቸው ዋዲያ ሃሳብ ለላራ ሃሙተኛ ዩሱሳኩ ቡሱ
አይከሰ።

30 ሺን ዋልቃማ ጫርኩዋ በዓዲያ ያዩሰ። ሃሳን ሚቴቴላ
አይከዳ ዋዴ «ጎዳው፡ ታና አሻርኪ» ያገረዱ ዋሲሰ።

31 ዩሱሲ ኤሌሲያ ባ ኩሺያ ዩዲ ኢያ አይከዲ፡ «ኔኖ፡
አማኖይ ፓጪዳይሶ አይሰ ሲቆይ» ያገለገለ።

32 ዩሱሳራኔ ጳጳሮሳራ ዋሳሎዋን ጌሊዳ ዋዴ ጫርኮይ ሲዒ
ገሰ።

33 ዋሳሎቸው ገደን ዳዒያ ኢያ ታማራቴ፡ «ኔኔ ቴማካ ያሳ ናዓ»
ገዲ ጎይኒደሶና።

34 ኤንቴ አባ ፒኒዲ ገንጎሬዴ ቢታ ጋኪደሶና።

35 ሄ ቢታን ዳዒያ አሳይ ዩሱሳ ኤሪዳ ዋዴ ባንታ ሄራን
ዳዒያ ጉታ ኡባ ኪታ ዩዲደሶና። አሳይ ሃርጋንቸታ ኡባ ኢያኮ
ኤሂደሶና።

36 ሃርጋንቸታ ኢያ አፊላ ማጫራ ዓላላ ቦቻና ሚላ ዋሲደሶና።
ቦቹዳ ኡባይካ ፓዲደሶና።

15

አዋታ ዋጋባ (ማር 7:1-13)

1 ሄሳፌ ጉዩ፡ ኢሲ ኢሲ ፋሪሳዌቴኔ ሂጌ አስታማሬቴ
ዩሩሳላሚቴ ዩሱሳኩ ዩዲ፡

2 «ኔ ታማራቴ አይሰ ኑ አዋታ ዋጋ ሜንሶና? ኤንቴ ካላ
ማናቴ ሲንጭ ባንታ ኩሺያ ሜጩቶኮና» ያገረዱ አይቺደሶና።

3 ዩሱሲ ዛሪዲ፡ «ሂንቴ፡ ሂንቴ ዋጋ ገሾ ያሳ ኪታ ፖሌይሳ
አይሰ አጃቴ?

4 አይሰ ገኩ፡ ያሳይ፡ «ኔ አዋኔ ኔ አደው ቦንቻ። ኢ ባ አዋ
ዋይኮ ባ አደው ጫዩይሲ ሃይቆ ገቤኔ?» ያገለገለ።

5 ሺን ሂንቴ፡ ኢሲ አሲ ባ አዋ ዋይኮ ባ አደው ማዳናባይ
ዳዒሺን፡ «ሃይሳ ታ ያሳሰ ያርሻሰ ገኩ፡

6 ባ አዋ ዋይኮ ባ አደው ቦንቻናው በሌና) ያጌታ። ያቴዲ
ሂንቴ፡ ሂንቴ ዋጋ ፖላናው ያሳ ቃላ ሜንጮታ።

7 ሂንቴኖ፡ ጩቦቶ፡ ኢሳያሲ ሂንቴባ ሊኬ ኦዲሰ፡
8 « ሃ አሳይ ታና ባንታ ደናን ቦንቹሰ፡

15:4 ኬሳ 20:12፤ ዛሬ 5:16፤ ኬሳ 21:17፤ ለዌ 20:9

ሺን ኤንታ ዎዛናይ ታፔ ሃሆን ዳዔስ።
 9 አሳይ ታና ጮ ጎይኖሶና፤
 ኤንቲ አሲ ሜዲዳ ኪታ
 ፆሳ ሂጌ ዳኒሲዲ ታማርሶሶና ጊስ» ያጊስ።

አሴ ቱኒሲያባታ
 (ማር 7:14-23)

10 ዬሱሲ ዳር አሳ ባኮ ጭጊዲ፥ «ሲዒቴ! አኬኪቴ!
 11 አሴ ቱኒሲያባይ ደናራ ጌሊያባ ጊደናሺን ደናፔ ኬያባ»
 ያጊስ።
 12 ሄሳፌ ጉዬ፥ ዬሱሳ ታማሬቲ ኢያኮ ዩዲ፥ «ፋሪሳዌቲ ኔኒ
 ጊዳይሳ ሲዒዲ ቆቤቲዳይሳ አኬካይ?» ያጊደሶና።
 13 ሺን ዬሱሲ ኤንታው ዛሪዲ፥ «ሳሉዎን ዳዒያ ታ አዎይ
 ቶኪቦና ሚላይ ኡባይ ሾዴታና።
 14 ኤንታባ ሂርጎፊቴ፤ ኤንቲ ቆቄ ካሌሊያ ቆቄታ። ቆቄይ ቆቄ
 ካሌሊኮ፥ ናምዓይካ ኦላን ኩንዳና» ያጊስ።
 15 ጳዒርሲ ዛሪዲ፥ «ሃ ለሚሱዎ ቢርሼላ ኑስ ኦዳርኪ»
 ያጊስ።
 16 ዬሱሲ ኤንታኮ፥ «ሂንቲወካ ሃዒ ጋካናው ጌሊቤን?
 17 ደናራ ጌሊያባ ኡባይ ኡሎ ጌሊዲ ካሬ ኬዬይሳ ኤሬኬቴ?
 18 ሺን ደናራ ኬያባይ ዎዛናፔ ኬዬስ። አሴ ቱኒሲያባቲ ሄሳታ።

19 ኤንቲካ አሳ ዎዛና ጊደፌ ኬያ ኢታ ቆፋ፥ ዎጶ፥ ላይማቴሊ፥
 ኢታ ኦሶ፥ ካይሶ፥ ዎርዶ ማርካቴሊ፥ ጫሼ።
 20 ሄሳ ዳኒያባቲ አሴ ቱኒሴሲፔ አቲን ሜጨቶና ኩሼራ
 ሚይሲ ቱኒሴና» ያጊስ።

ኢሲ ማጨሴ አማኑዎ
 (ማር 7:24-30)

21 ሄሳፌ ጉዬ፥ ዬሱሲ ያፔ ኬዩዲ ዒርሳኔ ሲደና ካታማቲ
 ዳዒያ ቢታ ቢስ።
 22 ኢሲ ካናኔ ቢታ ማጨሴ ዬሱሳኮ ያዳ፥ ባ ቃላ ጶቄ ኦላዳ፥
 «ጎዳው፥ ዳዊቲ ናዒው፥ ታው ቃጶታርኪ፤ ታ ናዒው ቱና አያናይ
 ኦይኪዲ ኢታ ዋይሴስ» ያጋሱ።
 23 ሺን ዬሱሲ ኢሲ ቃላካ ዛሮና ሲዒ ጊስ። ዬሱሳ ታማሬቲ
 ኢያኮ ዩዲ፥ «ሃ ማጨሴያ ኑ ጌዶ ካላ ካላዳ፥ ዎሳወሱ። ሄሳ
 ጊሾ፥ ኔኒ ኢዮ ሞይዛርኪ» ያጊዲ ዎሲደሶና።

24 ዩሱሲ ዛሪዲ፡ «ታኒ ዉዳፔ ጳዩዳ ዶርሳዳ ኢሰራዔሌ ከፋፌ ጳዩዳ አሳታ ፃላላሰ ከቲታሰ» ያገሰ።

25 ሺን ኢያ፡ ኢያ ሲንፋን ኩንዳዳ፡ «ጎዳው፡ ታና ማዳርኪ?» ያገሰ።

26 ኢ ዛሪዲ፡ «ናይታ ካሌ ኤኪዲ ካናታሰ ዩጌይሲ ሎዖ ጊዳና» ያገሰ።

27 ማጫሲያካ፡ «ጎዳው፡ ሄሲ ቱማ፡ ሺን ሃሪ አቶሺን ካናቲ ባንታ ጎዳቲ ሚሺን፡ ጋይታፔ ዎጂያ ቲፊያ ሞሶና» ያገሰ።

28 ዩሱሲ ዛሪዲ፡ «ሃ ማጫሴቲ፡ ኔ አማኖይ ጊታ፤ ኔ ኮዩዳይሳዳ ኔው ሃኖ» ያገሰ። ኢ ናዔያ ኢራካ ፓፃ አጋሱ።

ዩሱሲ ዳር ሃርጋንቸታ ፓሊሰ

29 ዩሱሲ ያፔ ዳንዲዲ ጋሊላ አባ ማቲ ቢሰ። ኢሲ ዳሬ ቦላ ከዩዲ፡ ያን ኡቲሰ።

30 ዳር አሳይ ባንታራ፡ ዎቤታ፡ ቆቂታ፡ ኩናታ፡ ዶና ሙሜታኔ፡ ሃራ ዳር ሃርጋንቸታ ኤኪዲ፡ ኢያኮ ኤሂዲ ኢያ ሲንፋን ዎሊዶሶና። ዩሱሲ ኤንታና ፓሊሰ።

31 ሂሳ ጊሾ፡ ሙሜቲ ኦዳቲሺን፡ ኩናቲ ፒዲ ጊሺን፡ ዎቤቲ ሃሙቲሺን፡ ቆቂቲ ዩሊሺን አሳይ ቤዒዲ ማላሌቲዲ፡ ኢሰራዔሌ ያሳ ጋላቲዶሶና።

ዩሱሲ ኦይዲ ሙኩሉ አሳ ሙዚሰ (ማር 8:1-10)

32 ዩሱሲ ባ ታማሪታ ባኮ ዩጊዲ፡ «ሃ ዳር አሳይ ታራ ሄዡ ጋላሰ ጋሞዒዳ ጊሾኔ ኤንታው ሃዒ ሚያባይ ባይና ጊሾ ታኒ ኤንታው ቃጂታይሰ። ኤንቲ ኦጌን ዳቡሪዲ ኩንዶና ሜላ አይኮ ሙዘና ኤንታ ሜላ ዩዳናው ኮዩኬ» ያገሰ።

33 ኢያ ታማሪቲ ዛሪዲ፡ «ኦኒ ሃ ባዙዎን ሃይሳ ከና አሳሰ ጊዲያ ካሌ አዉፔ ዳማኔ?» ያገሰ።

34 ዩሱሲ ኤንታኮ፡ «ሂንቲው አፑን ኡይሌ ዳዒ?» ያገሰ ኦይቸሰ።

ኤንቲ ዛሪዲ፡ «ላፑን ኡይሌኔ ላፋ ሞሎታፔ ጉሌ ዳዔሰ» ያገሰ።

35 ዩሱሲ ዳሪያ ሳዓን ኡቲቲ ያገሰ ከቲሰ።

36 ሄሳፌ ጉዬ፡ ሄ ላፑን ኡይላኔ ሞሎዎ ኤኪዲ ያሳ ጋላቲሰ። ሜንሊዲ ባ ታማሪታሰ አሚሰ። ኢያ ታማሪቲ አሳሰ ጊሺዶሶና።

37 አሳይ ኡባይ ሚዲ ካሊዶሶና። ኢያ ታማሪቲ፡ ሚሺን አቲዳ ቲፊያ ላፑን ጊታ ጋይታ ኩሜሌ ዳንሊዶሶና።

38 ሚዳ አሳይ ማጫሲኔ ናዓ ፓይዶና አዴ ፃላሊ ኦይዱ ሙኩሉ።

39 ዩሱሲ ዴሪያ ዩዲዳፔ ጉዬ ዋሳሉዋን ጌሊዲ ማጌዶና ጊያ ቢታ ቢሰ።

16

ሳሎፔ ማላ ቤዓናው ኦይቺዳ ኦይሻ
(ማር 8:11-13፤ ሉቃ 12:54-56)

1 ፋሪሳዌቲኔ ሳዲቃዌቲ ዩሱሳኮ ዩዶሶና። ኢያ ፓጫናው ኮዩዲ፣ ባንታና ሳሎፔ ማላታ ቤሶ ጊዲ ኦይቺዶሶና።

2 ሺን ኢ ኤንታኮ፣ «ሳዲ ኦማርሲያ ዋዴ ሳሎይ ዘዲዳ ጊሾ ዋንቶ ቦቃላና» ያጌታ።

3 ዋንቲያ ዋዴ፣ ሳሎይ ዘዲዳ ሻራቲዳ ጊሾ ኢራይ ቡካና ያጌታ። ያቲን ሂንቲ ሳሎ ማላ ቤዲዲ ኤሬታ፣ ሺን ዋዲያ ማላ ኤራናው ዳንዳዲቤኬታ።

4 ኢታኔ አማኖና ዩሌቴላይ ማላታ ኮዩሰ። ሺን ኢያው ዮናሳ ማላታፔ ሃራ ማላቲ ኢሜቴና» ያጌሰ። ሃሳፌ ጉዬ፣ ኤንታና ያን ኣጊዲ ሃራ ሶ ቢሰ።

ፋሪሳዌታኔ ሳዲቃዌታ ኢርሹዋ
(ማር 8:14-21)

5 ኤንቲ አባፌ ሄፊንሊ ፒኒዳ ዋዴ ዳቦ ኤኪዲ ያናይሳ ደጊዶሶና።

6 ዩሱሲ ኤንታኮ፣ «ፋሪሳዌታፔኔ ሳዲቃዌታ ኢርሹዋፌ ናጌቲቲ» ያጌሰ።

7 ኤንቲካ ባንታ ጋርሳን፣ «ኢ ሃሳ ጊዳይ ኦ ዳቦ ኤኪዲ ዮና ጊሾሳ ጊዳና» ያጌዶሶና።

8 ዩሱሰ ኤንታ ቆፋ ኤሪዲ፣ «ሂንቲኖ፣ አማኖይ ፓጩዳይሳቶ! ዳቦ ኤኮና ዩዳ ጊሾ ዋሊ ጊዶን አይሰ ኦዴቲቲ?»

9 ሃዒካ ሂንቲ ኣኬኬቲ? ኢቻሹ ሙኩሉ አሳሰ ኢቻሹ ኡይላ ጊሺዳይሳኔ ኤንቲ ሚዲ ካሊን ሂንቲ አፑን ጋይታ ኩሚሊ ዴንሊዳኮ ደጊዳቲ?»

10 ሂሳዳካ፣ ሳፑን ኡይላ ኦይዲ ሙኩሉ አሳሰ ጊሺዳይሳኔ ኤንቲ ሚዲ ካሊን፣ ሂንቲ አፑን ጊታ ጋይታ ኩሚሊ ዴንሊዳኮ ኣኬኬኬቲ?»

16:1 ማቶ 12:38፤ ሉቃ 11:16 16:4 ማቶ 12:39፤ ሉቃ 11:29 16:6 ሉቃ 12:1 16:9 ማቶ 14:17 16:10 ማቶ 15:34

11 ሂዛ፣ ታኒ ፋሪሳዊታኔ ሳዲቃዊታ ኢርሹዋፊ ናጌቲቲ ጋዳ ኦዴይሲ ዳቦባ ጊደናይሳ ኣኬኬኬቲ?» ያጊሰ።

12 ያቲን፣ ኢያ ታማሬቲ ዩሱሲ ኦዴይ ሙኑቃ ዴንፋናው ዩጌቲያ ኢርሹባ ጊደናሺን ፋሪሳዊታኔ ሳዲቃዊታ ቲሚርቲያፊ ናጌታናይሳ ጊዴይሳ ኣኬኪደሶና።

ጳውሎስ ዩሱሳባ ኦዲሰ
(ማር 8:27-30፤ ሉቃ 9:18-21)

13 ዩሱሲ ቁሳሪያ ፊልጶሳ ቢታ ጋኪዳ ዋዴ ባ ታማሬታኮ፣ «ኣሳይ፣ ኣሳ ናባ ኦና ጎና?» ያጊዲ ኦይቹሰ።

14 ኤንቲካ፣ «ኢሶቲ ኢሶቲ ፃማቂያ ዮሃንሳ፣ ሃራቲ ኤሊያሳ ቃሲ ሃንኮቲ ኤርሚያሳ ዋይኮ ናቤታፔ ኢሱዋ ጎሶና» ያጊደሶና።

15 ዩሱሲ ዛሪዲ፣ «ያቲን፣ ሂንቲ ታና ኦና ጌቲ» ጊዲ ኤንታ ኦይቹሰ።

16 ሲሞና ጳውሎስ ዛሪዲ፣ «ኔኒ ኪሪሰቶሳ፣ ዴያ ያሳ ናባ» ያጊሰ።

17 ዩሱሲ ጳውሎስ፣ «ዮና ናባ ሲሞና፣ ኔኒ ኣንጃቲዳይሳ! ሃይሳ ኔው ቆንጨሲዳይ ሳሉዋን ዴቢያ ታ ኣዋፔ ኣቲን ኣሴ ጊዴና።

18 ታ ኔው ኦዲይሰ ጳውሎስ፣ ኔኒ ዛላ! ታኒ ሃ ዛላ ቦላ ታ ዋሳ ኬፋ ኬፃና። ሃይቆ ዋልቃቲካ ኢዮ ያኖኮና።

19 ሳሎ ካዋቲፋ ቁልፔታ ታ ኔው ኢማና። ሳባን ኔኒ ዲጊያባይ ኡባይ ሳሎን ያሳ ማታን ዲጌቲዳባ ጊደና። ሳባን ኔኒ ሃኖ ጊያባይ ኡባይ ሳሎን ያሳ ማታን ሃኒዳባ ጊደና» ያጊሰ።

20 ሃሳፊ ጉዬ፣ ኢ፣ ኪሪሰቶሳ ጊዴይሳ ኦዴሰካ ኦደና ማላ ባ ታማሬታ ሚንፊዲ ኪቲሰ።

ዩሱሲ ባና ጋካና ዋያ ኦዲሰ

21 ሄ ዋዲያፔ ደሚዲ ዩሱሲ ባ ታማሬታሰ፣ «ታኒ ዩሩሳላሚ ባናው ቤሴሰ። ያን ዴሪያ ጨማታን፣ ካሂኔ ሃላቃታኔ ሂጌ ኣሰታማሬታ ኩሸን ዋዬ ኤካናው ቤሴሰ። ኤንቲ ታና ዋዳና፣ ሺን ታኒ ሄቫንፉ ጋላሰ ሃይቆፔ ዴንዳና» ያጊዲ ቆንጨሲሰ።

22 ጳውሎስ ዩሱሳ ጋፃ ኬሲዲ፣ «ጎዳው፣ ሄሲ ሃኔና! ሃሳ ማላባይ ኔና ኡባራካ ጋኮፎ!» ያጊዲ ሃንቁቲሰ።

23 ዩሱሲ ጳጳርሳኮ ጉዬ ሲሚዲ፥ «ሃ ፃላሂያው፥ ታፔ ሃካ! ኔኒ አሳ ቆፋ ቆፓሳፔ አቴን ጾሳ ቆፋ ቆፖና ጊሾ ታው ጴቤ ጊዳሳ» ያገሰ።

24 ሄሳፌ ጉዬ፥ ዩሱሲ ባ ታማሬታኮ፥ «አኒካ ታና ካላናው ኮያባ ጊዲኮ ባና ካዶ፥ ባ ማሰቃሊያ ቶኪዲ ታና ካሎ።

25 ባ ዴዑቀ አሻናው ኮያ ኡባይ ጳይሴስ። ሺን ባ ዴዑቀ ታ ጊሾ ጊዲ አሉ ኢሜይሲ አሼስ።

26 አሲ አላሜ ኩሜላ ባባ ኦሊዲ፥ ጊደሺን ባ ሸምፑቀ ጳይሴኮ ኢያ አይ ማዲ? ዋይኮ አሲ ባ ሸምፑቀ ላሜ አይ ኢማናው ዳንዳዒ?

27 አሳ ናዓይ ባ አዋ ቦንቹዋን ባ ኪታንቸታራ ያና። ሄ ዋዴ ኢሲ ኢሲ ኡራስ ኢያ ኦሱዋዳ ኢማና።

28 ታ ቱማ ኦዳይስ፤ አሳ ናዓይ ካዋ ጊዲዲ ሲሜይሳ ቤዓና ጋካናው ሃይሳን ኤቁዳ አሳፔ ሃይቆናይሳቴ ዴጾሶና» ያገሰ።

17

ዩሱሳ ማላይ ላሜቲስ (ማር 9:2-13፤ ሉቃ 9:28-36)

1 ኡሱፑን ጋላሳፔ ጉዬ ዩሱሲ፥ ጳጳርሳ፥ ያይቆባኔ ኢያ አሻ የሃኒሳ ባራ ኤኪዲ ባንታርካ ጊዳናው ዴሪያ ቦላ ኬዩስ።

2 ያን ኤንታ ሲንሳን ዩሱሳ ማላይ ኩሜሊ ላሜቲስ፤ ኢያ ሶምጾይካ አዋዳ ያልቁስ። ኢያ ማጾይካ ዳሮ ቦዲስ።

3 ሄኮ፥ ሙሴይኔ ኤሊያሲ ኢያራ ኦዴቲሺን ቤዒዶሶና።

4 ጳጳርሲ ዩሱሳኮ፥ «ኦኒ ሃይሳ ሃሹ ዩዳ። ኔ ኮይኮ ኢሲኖ ኔው፥ ኢሲኖ ሙሴስ፥ ኢሲኖ ኤሊያሳስ ሃይሳን ሄቸ ሻቃራ ሻቃራና» ያገሰ።

5 ጳጳርሲ ሄሳ ቡሮ ኦዲሺን ቦላ ሻራይ ኤንታና ካሚስ። ሻራ ጊዶራ፥ «ታና ኡፋይሴያ፥ ታ ዶሲያ ናዓይ ሃይሳ፥ ኢያ ሲዒቲ!» ያገያ ቃላይ ዩስ።

6 ዩሱሳ ታማሬቲ ሄሳ ሲዒዳ ዋዴ ዳጋሚዲ ባንታ ሶምዑዋራ ሳዓን ኩንዲዶሶና።

16:24 ማቶ 10:38፤ ሉቃ 14:27 16:25 ማቶ 10:39፤ ሉቃ 17:33፤ የሃ 12:25 16:27 ማቶ 25:31፤ ማዝ 62:12፤ ሮሜ 2:6 17:1 2ጴጌ 1:17-18
17:5 ሜዴ 22:2፤ ማዝ 2:7፤ ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22፤ ዛሬ 18:15

7 ሺን ዩሱሲ ከንታኮ ሸቂዲ ከንታ ቦቺዲ፡ «ዴንዲቴ፡ ያዮፊቴ!» ያገሰ።

8 ከንቲ ቶቁ ጊዲ ቤዲያ ዎዴ ዩሱሳፕ ሃራ ኦናካ ቤዲቦኮና።

9 ከንቲ ዴሪያፕ ዎጲሺን ዩሱሲ ከንታኮ፡ «ኣሳ ናዓይ ሃይቆፕ ዴንዲና ጋካናው ሃ ሂንቲ ቤዲዳባ ኦዴሰካ ኦደፒቴ» ጊዲ ከቲሰ።

10 ዩሱሳ ታማሬቴ፡ «ያቴን፡ ሂጌ ኣሰታማሬቴ ኤሊያሲ ከሪሰቶሳፕ ካሴቲዲ ያና ጊዳይ ኣይቢሴ?» ያገዲ ኦይቺደሶና።

11 ዩሱሲ ዛሪዲ፡ «ኤ! ኤሊያሲ ካሴቲ ዩዲ ኡባባ ገገሳና።

12 ሺን ታ ሂንቲው ቱማ ኦዳይሰ፤ ኤሊያሲ ካሴቲዲ ዩሰ። ከንቲካ ኢያ ቦላ ኮዩዳባ ኦሊደሶናፕ ኣቲን ኢያ ሻኪ ኤሪቦኮና። ሄሳዳ ኣሳ ናዓይ ከንታ ኩሼን ዎዴታና» ያገሰ።

13 ሄ ዎዴ ዩሱሲ ጊዳይ ዓማቂያ ዮሃኒሳባ ገዴይሳ ኣኬኪደሶና።

ዩሱሲ ቱና ኣያናይ ኦይኪዳ ናዓ ፓሊሰ
(ማር 9:14-29፤ ሉቃ 9:37-43)

14 ከንቲ ዴሪያፕ ኣሳኮ ሰሚያ ዎዴ ኢሲ ኣሲ ዩሱሳ ሰንፋን ጉልባቲዲ፡

15 «ሳዳው፡ ሃያና ታ ናዓሰ ቃቆታርኪ፤ ኢያ ሾጪዲ ዩጊያ ሃርጌይ ዳር ኡንዔሌዲ ታማኒኔ ሃፋን ዩጌሰ።

16 ኔ ታማሬታኮ ኤሃሰ፡ ሺን ከንቲ ፓላናው ዳንዳዒቦኮና» ያገሰ።

17 ዩሱሲ ዛሪዲ፡ «ሂንቲኖ፡ ኣማኖና ጌላ ዩሌቴፋው ኣዉዴ ጋካናው ታ ሂንቲራ ዳኔ? ኣዉዴ ጋካናው ታ ሂንቲና ዳንዳዓኔ? ኣኔ ናዓ ሃ ኤኪ ዩቴ» ያገሰ።

18 ዩሱሲ ቱና ኣያና ሃንቂን፡ ቱና ኣያናይ ናዓፕ ኬዩሰ፤ ሄ ሳቴንካ ናዓይ ፓዲሰ።

19 ሄሳፌ ጉዩ፡ ዩሱሳ ታማሬቴ ባንታርካ ኢያኮ ሸቂዲ፡ «ኦኒ ቱና ኣያና ኬሳናው ዳንዳዒቦናይ ኣይቢሴ?» ያገዲ ኦይቺደሶና።

20 ኢ ከንታኮ፡ «ሂንቲው ኣማኖይ ላፊዳ ገሾሳ። ታ ሂንቲው ቱማ ኦዳይሰ፤ ጋሼ ኣይፌ ሜላ ኣማኖይ ሂንቲው ዴዒኮ ሃ ዴሪያ ሃይሳፌ ዴንዳዳ ጌዴ ኣቆ) ገኮ ሂንቲው ከቲታና። ሂንቲው ዳንዳዔቶናባይ ዴና።

21 [ሺን ሄሳ ማለይ ዋሳፔኔ ምጥፔ አቲን ሃራን ከዬና]» ያገሰ።
*

ዬሱሲ ባ ሃይቁዋባ ዛሪ ኦዲሰ
(ማር 9:30-32፤ ሉቃ 9:43-45)

22 ዬሱሳ ታማራቲ ጋሊላን ሸቀዲ ዴዲሺን ዬሱሲ ኤንታኮ፣
«አሳ ናዓይ አሳ ኩሼን አቋዲ አሜታና።

23 ኤንቲ ኢያ ዋቋና፣ ሺን ኢ ሄቫንሉ ጋላስ ሃይቆፔ ዴንዳና»
ያገሰ።
ኢያ ታማራቲካ ዳር ቁርቲዶሶና።

ፆሳ ከላ ገራ

24 ዬሱሳራኔ ኢያ ታማራታራ ቂፊርናሆሜ ካታማ ጋኪዳ ዋዴ
ፆሳ ከላ ገራ ቃንግሴይሳቲ ጳዲርሳኮ ዩዲ፣ «ሂንቲ አስታማሪይ
ፆሳ ከላ ገራ ገሪ?» ያገዲ ኦይቸዶሶና።

25 ጳዲርሲ ዛሪዲ፣ «ገሪሰ» ያገሰ። ጳዲርሲ ሶ ጌሊያ ዋዴ
ዬሱሲ ካሴቲዲ፣ «ጳዲርሳ፣ ኔው አይ ዳኒ? ሃ ሳዓ ካዋቲላቲ
ቃራፃኔ ገራ አፔ ኤኮና? ጋዴ አሳፔዬ ዋይኮ አሳ ጋዴ አሳፔ?»
† ያገዲ ኦይቸሰ።

26 ጳዲርሲ «አሳ ጋዴ አሳፔ» ገዲ ዛሪሰ።

ዬሱሲ ዛሪዲ፣ «ጋዴ አሳይ ገራ ገርኮና ጉሱ።

27 ሺን ኤንቲ ቆቤቶና ሜላ አባ ባዳ ሞሉዋ ኦይኪያ ማንፃቆ
ዬጋ። ኮይር ኔ ኦይኪያ ሞሉዋ ዶና ዶያዳ ገራሰ ገዲያ ሚሺያ
ኔ ገሺኔ ታ ገሺ ኤፋዳ ገራ» ያገሰ።

18

ኡባፌ አጼይ ኦኔ?

(ማር 9:33-37፤ ሉቃ 9:46-48)

1 ሄ ዋዴ ዬሱሳ ታማራቲ ዩዲ፣ «ሳሎ ካዋቲላን ኡባፌ አጼይ
ኦኔ?» ያገዲ ኦይቸዶሶና።

2 ዬሱሲ ኢሲ ጉላ ናዓ ፃገዲ ኤንታ ገዶን ኤሲዲ ሃይሳዳ
ያገሰ።

17:21 ማቶ 21:21፤ ማር 11:23፤ 1ቆር 13:2 * 17:21 ኢሲ ኢሲ ቤኒ
ማፃፋታን ፓይዶ 21 ዴና። 17:24 ከሳ 30:13 † 17:25 ጋዴ አሳፔዬ
ዋይኮ አሳ ጋዴ አሳፔ? ሄ ዋዴ ካዋቲላቲ ባንታ ጋዴ አሳፔ ገራ ኤኮኮና።
18:1 ሉቃ 22:24

3 «ታኒ ሂንቲው ቱማ ኦዲይስ፤ ሂንቲ ላሜቶናኔ ጉላ ናይታዳ ሃናና ኢዲኮ ሳሎ ካዎቱላ ኡባራካ ጌላናው ዳንዳዔኬታ።

4 ሂዛ፡ ሃ ጉላ ናዓዳ ባና ካዉሺያ ኦኒካ ሳሎ ካዎቱላን ኡባሬ ኣዲይሳ ገዳና።

5 ሃይሳ ማላ ናዓ ታ ሱንላን ሞኪያ ኦኒካ ታና ሞኬስ።

6 «ሺን ታናን ኣማኒያ ሃ ጉላታፔ ኢሱዋ ናጋራ ኦላና ማላ ቆቤ ገዲያ ኦኒካ ገታ ጋቻ ዋፃ ባ ቆዴን ቃቺዲ ጨሞ ኣባን ማቲቲኮ ኢያው ሎ።

7 ኣላሚን ኣሳይ ናጋራ ኦላና ማላ ኦሊያባቲ ዴዒያ ገሾ ኣላሚያ ኣዬ። ሃሳ ማላባቲ ዮና ኣቲና፡ ሺን ቆቤይ ኢያ ጋሶን ያ ኡራ ኣዬ።

8 «ኔ ኩሼይ ዋይኮ ኔ ቶሆይ ኔና ባሌሊኮ ኔፔ ቃንፃ ዬጋ። ኔኒ ናምዑ ኩሼራ ዋይኮ ናምዑ ቶሆራ ማሪና ታማን ዬጌታናይሳፊ ኩሼ ዋይኮ ቶሆ ዲፃ ገዲዳ ማሪና ዴፃ ዴሚይሲ ኔው ሎ።

9 ቃሲ ኔ ኣይፊይ ኔና ባሌሊኮ ኢዮ ዋጫ ኬሳዳ ዋራ ሆላ። ኔኒ ኣገዲ ኣይፊራ ጋናሚ ታማን ዬጌቲይሳፊ ኢሲ ኣይፊራ ማሪና ዴዑዋ ጌሌይሲ ኔው ሎ።

10 «ታ ሂንቲው ኦዲይስ፤ ሳሎን ዴዒያ ኤንታ ናገያ ኪታንቸቲ ኡባ ዋዴ ሳሎን ዴዒያ ታ ኣዋ ሲንላን ዴዒያ ገሾ ሂንቲ ሃ ጉላታፔ ኢሱዋካ ካዶና ማላ ናጌቲቲ።

11 ኣሳ ናዓይ ቆይዳይሳታ ኣሻናው ዪስ» * ያገሲ።

ቆይዳ ዶርሳ ሌሚሶ
(ሉቃ 15:3-7)

12 ቃሲ ዬሱስ፡ «ሂንቲው ኣይ ዳኒ? ኢሲ ኡራስ ፃፔ ዶርሳቲ ዴዒይሳታፔ ኢሶይ ቆይኮ ኡዲፋን ታማኔ ኡዲፋናታ ዴሪያ ቦላ ዬጌ ኣገዲ ሃ ቆይዳይሳ ኮያናው ቤኔ?

13 ታ ቱማ ኦዲይስ፤ ኢ ዴሚዳ ዋዴ ኡዲፋን ታማኔ ኡዲፋናታፔ ኣሊዲ ቆይዲ ቤንቲዳ ኢሲ ዶርሳን ኡፋይቲስ።

14 ሂሳዳካ፡ ሳሎን ዴዒያ ሂንቲ ኣዋይ ሃ ጉላታፔ ኢሶይ ቆይና ማላ ኮዬና።

ቆሂዳ ኣሲ ዋታኔ?

15 «ኔ ኢሻይ ኔና ቆሂኮ ኔርካ ኢያኮ ባዳ ኢያ ባላ ኢያው ኦዳ። ኢ ኔና ሲዒኮ ኔ ኢሻ ኔው ኢሻ ኦላ።

18:3 ማር 10:15፤ ሉቃ 18:17 18:8 ማቶ 5:30 18:9 ማቶ 5:29
18:10 ሉቃ 19:10 * 18:11 ኣሳ ናዓይ ቆይዳይሳታ ኣሻናው ዪስ፡ ኢሲ ኢሲ ቤኒ ማፃፋቲ ፓይዶ 11 ጉጅሶና። 18:15 ሉቃ 17:3

16 ሺን ኢ ኔና ሲዖና ኢዲኮ፡ ናምዑ ወይኮ ሄዡ ኣሳ ማርካን ሞቶይ ላሴቲያ ገሾ ኢሲ ወይኮ ናምዑ ኣሲ ኤካዳ ኢያኮ ባ።

17 ኢ ኤንታና ሲዖና ኢዲኮ፡ ዋሳ ኬላሰ ኦዳ። ዋሳ ኬላ ጊያባ ሲዖና ኢዲኮ ኣማኖና ኣሳዳ ወይኮ ቃራፃ ቃንዲሲያ ኣሳዳ ኢያ ፓይዳ።

18 «ታ ሂንቲው ቱማ ኦዳይሰ፤ ሳዓን ሂንቲ ዲጊያባቲ ኡባይ ሳሎን ፆሳ ማታን ዲጌቲዳባ ጊዳና። ሳዓን ሂንቲ ሃኖ ጊያባቲ ኡባይ ሳሎን ፆሳ ማታን ሂንዳባ ጊዳና።

19 «ቃሲካ ታ ሂንቲው ኦዳይሰ፤ ሳዓን ሂንቲፌ ናምዓይ ባንታ ዋሲያባሰ ኢሲ ዋዛናን ጊዲዲ ፆሳ ዋሲያባ ጊዲኮ ሳሎን ዳዒያ ታ ኣዋይ ሂንቲው ኦዳና።

20 ታና ካሌይሳታፔ ናምዓ ወይኮ ሄዡ ጊዲዲ ሸቂያ ቤሳን ታኒ ኤንታ ጊዲን ቤንታና» ያጊሰ።

ኣቶ ጉሳባ

21 ሄ ወዳ ጳዲርሲ ዬሱሳኮ ዪዲ፡ «ጎዳው፡ ታ ኢሻይ ታና ቆሂኮ ኣፑን ቶሆ ታኒ ኣቶ ጋናው ቤሲ? ላፑን ቶሆ ጋካናሴዬ?» ጊዲ ኦይቸሰ።

22 ዬሱሲ ዛሪዲ፡ «ጊዳና፡ ላፑን ታው ቶሆ ላፑናፔ ኣቲን ላፑን ቶሆ ጊዳና።

23 «ሄሳ ጊሾ፡ ፆሳ ካዎቲላይ ባ ኦሳንቸታራ ባ ሚሼይ ፓጩዳኮኔ ፓላሂዳኮ ቤዓናው ቆፒዳ ካወዋ ዳኔሰ።

24 ሄ ካዎይ ሚሼይ ፓጩዳኮኔ ፓላሂዳኮ ቤዒያ ወዳ ዳር ጊንዲጊንዳ ኣጮይ ዳዒያ ኢሲ ኡራ ኢያኮ ኤሂደሶና።

25 ሺን ሄ ኣይሌይ ኣጩዋ ቃንፃናው ፆኔቲን ኢያራ፡ ኢያ ማቸራ፡ ኢያ ናይቲኔ ኢያው ዳዒያባይ ኡባይ ባይዘቲዲ ኣጮይ ጨጌታና ማላ ኢያ ጎዳይ ከቲሰ።

26 ያቲን ኣይሌይ ባ ጎዳ ቶሁዋ ቦላ ጉልባቲዲ፡ ታ ጎዳው፡ ሃያና ጉላ ወዳ ታካርኪ፡ ታ ኣጩዋ ኡባ ታ ጨጋና) ያጊዲ ዋሲሰ።

27 ካዎይ ኢያው ቃጴቲዲ፡ ዬዲ ኣጊሰ፤ ኢያ ኣጩዋ ማሪሰ።

28 «ሺን ሄ ኣይሌይ ከዪ ቢዲ ባ ላጌ ኦሳንቸታፔ ኢሶይ ባፔ ዳር ጉላ ሚሼ ታልዒዳይሳ፡ ሪ ቦላ ዳዒያ ታ ሚሼያ ታው ጨጋ) ጊዲ ቆጴ ኦይከሰ።

29 «ሄ ኢያ ላጌ ኣይሌይ ኢያ ሲንላን ጉልባቲዲ፡ ሃያና ጉላ ወዳ ታካርኪ ታኒ ታ ኣጩዋ ኡባ ጨጋና) ያጊዲ ዋሲሰ።

18:16 ዛሬ 19:15 18:18 ማቶ 16:19፤ ዮሃ 20:23 18:21 ሉቃ 17:3-4
18:22 ሜዴ 4:24

30 «ሺን ኢጲዲ ኤኪ ኤፊዲ ባ ላጌይ ኣጩዋ ቃንፃና ጋካናው ቃሾ ኩሊ ጌልሲስ።

31 ሄሳ ጊሾ፣ ሃራ ላጌ ኦሳንቸቲ ሄሳ ቤዒዳ ዋዴ ዳር ዩሎቲዲ፣ ቢዲ ባንታ ጎዳስ ኢ ኦሊዳባ ኡባ ኦዲደሶና።

32 «ያቲን ካዎይ ሄ ኣይሊያ ፀጊሲዲ፣ «ሃ ኢታ ኣይሊያው፣ ኔኒ ታና ዋሲዳ ጊሾ ታ ኔ ኣጩዋ ኡባ ኔው ማራስ።

33 ያቲን፣ ታኒ ኔ ኣጩዋ ማሪዳይሳዳ ኔኒ ኔ ላጌ ኣይሊያ ኣጩዋ ማራናው ኔው ቤሴኔ?» ያጊሰ።

34 ሄሳ ጊሾ፣ ካዎይ ዳር ዩሎቲዲ፣ ኢ ባ ኣጩዋ ኡባ ጨጋና ጋካናው ፓፃ ካዔታና ሜላ ቃሾ ኩላን ዩጊሰ።

35 «ሄሳዳካ፣ ሂንቲ ኢሶይ ኢሶይ ሂንቲ ኢሻ ዋዛናፔ ማርና ኢጻኮ ሳሎን ዴዒያ ታ ኣዋይ ሂንቲና ሄሳዳ ኦላና» ያጊሰ።

19

ኤኮ ጌሎባ (ማር 10:1-12)

1 ዩሱሲ ሄሳ ኦዲ ኦንጊዳፔ ጉዩ ጋሊላፔ ዴንዲዲ ዮርዳኖሴ ሻፋፔ ሄፊንላን ዴዒያ ዩሁዳ ቢታ ቢስ።

2 ዳር ኣሳይ ኢያ ካሊዲ ቢን ኤንታ ጊዶፊ ሃርጋንቸታ ፓሊስ።

3 ፋሪሳዊቲ ኢያ ፓጫናው ኮዩዲ ኢያኮ ዩዲ፣ «ኢሲ ኣሲ ኣይ ጋሶንካ ባ ማቸው ዩዳናው ቤስ?» ያጊዲ ኦይቺደሶና።

4 ዩሱሲ ዛሪዲ፣ «ዎሳይ ኮይር ኣዴኔ ማጫስ ኦሊ ሜዲዳይሳ ሂንቲ ናባቢቤኬቲ?

5 «ሄሳ ጊሾ፣ ኢሲ ኣሲ ባ ኣዋኔ ባ ኣዩው ኣጊዲ ባ ማቺራ ኢሲኖ ጊዴስ፣ ናምዓይካ ኢሲ ኣሾ ጊደሶና።»

6 ሄሳ ጊሾ፣ ኤንቲ ኢሲ ኣሾ ጊደሶናፔ ኣቲን ናምዓ ጊደኮና። ሂዛ፣ ያሲ ቃቸዳይሳ ኣሲ ሻኮፎ» ያጊሰ።

7 ፋሪሳዊቲ፣ «ያቲን፣ ሙሴይ ኢሲ ኣሲ ኣንጅ ዋርቃቲ ኢሚዲ ዩዳና ሜላ ኣይስ ከቲዴ?» ያጊዲ ኦይቺደሶና።

8 ዩሱሲ ዛሪዲ፣ «ሂንቲ፣ ሂንቲ ማቺታ ዩዳና ሜላ ሙሴይ ሂንቲና ከቲዳይ፣ ሂንቲ ዋዛና ሚኖቴላ ጊሾፔ ኣቲን ኮይርፔ ሄሳ ሜላ ጊዴና።

9 ታ ሂንቲው ኦዳይስ፤ ባ ማቺያ ላይማቶና ዴዒሺን ዩዲዲ ሃራ ኤኪያ ኦኒካ ላሚስ» ያጊሰ።

19:4 ሜዴ 1:27፤ 5:1 19:5 ሜዴ 2:24 19:7 ሜዴ 24:1 19:9 ማቶ 5:32፤ 1ፋር 7:10

10 ኢያ ታማሬቲ ኢያኮ፡ «አዚናባይኔ ማቸባይ ሄሳ ሜላ ጊዲኮ ኤኮ ገሎይ ኣቲኮ ሎዎ» ያጊደሶና።

11 ዩሱሲ ዛሪዲ፡ «ሄሳ ሜላ ቲሚርቲይ ያሳይ ዳንዳባ ኢሚዳይሳታሳፌ ኣቲን ኣሳ ኡባሳ ጊዳና።

12 ሂዛ፡ ዩሌቲሼ ሹፋ ጊዲዲ ዩሌቲዳይሳቲ ዳዎሶና፡ ቃሲ ኣሲ ቃራቲዳይሳቲ ዳዎሶና፡ ቃሲ ሳሎ ካዎቲፋ ጊሾ ጊዲ ባንታና ሹፋይዳይሳቲ ዳዎሶና። ሄሳ ጊሾ፡ ሃይሳ ኤካናው ዳንዳባ ኦኒካ ኤኮ» ያጊሰ።

ዩሱሲ ጉፋ ናይታ ኣንጂሰ
(ማር 10:13-16፤ ሉቃ 18:15-17)

13 ዩሱሲ ባ ኩሺያ ጉፋ ናይታ ቦላ ዎሊዲ ኤንታው ዎሳና ሜላ ኢሲ ኢሲ ኣሳይ ናይታ ኢያኮ ኤሂደሶና። ሺን ኢያ ታማሬቲ ኣሳ ሃንቁቲደሶና።

14 ሺን ዩሱሲ፡ «ያሳ ካዎቲፋይ ሃይሳታ ሜላሳ ጊዲያ ጊሾ ጉፋ ናይቲ ታኾ ዩይሳ ዲጎፊቲ፤ ዮ ጊቲ» ያጊሰ።

15 ባ ኩሺያ ኤንታ ቦላ ዎሊዲ፤ ጉዬ ሄ ቤሳፌ ኣጊዲ ቢሰ።

ናባቲፋ ዲሬ ኡራ
(ማር 10:17-31፤ ሉቃ 18:18-30)

16 ኢሲ ጋላሰ ኢሲ ኡራይ ዩሱሳኮ ዩዲ፡ «ኣሰታማሪያው፡ ታኒ ሜሪና ዳዎ ዳማናው ኣይ ሎዎባ ኦሉ?» ያጊሰ።

17 ዩሱሲ ኢያኮ፡ «ሎዎባ ኔ ታና ኣይሰ ኦይቻይ? ኢሲ ያሳፌ ኣቲን ሃሪ ሎዎይ ባዎ። ሺን ኔኒ ሜሪና ዳዎ-ዎ ኤካናው ኮይኮ ኪታታ ናጋ» ያጊሰ።

18 ኡራይ ዛሪዲ፡ «ኣዉሳ ኪታታ» ያጊዲ ኦይቸሰ።

ዩሱሲ ዛሪዲ፡ «ዎጵፓ፡ ላይማቶፓ፡ ካይሶቶፓ፡ ዎርዶ ማርካቶፋ፡

19 ኔ ኣዎኔ ኔ ኣዩው ቦንቻ፡ ኔ ሾሩዎ ኔ ሁዒያሉ ደሳ» ያጊሰ።

20 ሄ ናባቲፋይ፡ «ታኒ ሃይሳታ ኡባ ናባቲፋፌ ደማዳ ናጋሰ። ያቲን፡ ሃሪ ታው ፓጨያባይ ኣይቤ?» ያጊዲ ኦይቸሰ።

21 ዩሱሲ ዛሪዲ፡ «ኔኒ ፖሎ ጊዳናው ኮይኮ ባዳ ኔው ዳዒያባ ባይዛዳ ማንቆታሰ ኢማ፤ ኔኒ ሳሎን ዲሬታና። ያታ ሲማ ያዳ ታና ካላ» ያጊሰ።

19:18 ኬሳ 20:13-16፤ ዛሬ 5:17-20 19:19 ኬሳ 20:12፤ ዛሬ 5:16፤ ሉዌ 19:18

22 ሺን ሄ ናቴላ ኡራይ ዳሮ ዱሬ ጊዲያ ገሾ ሄሳ ሲዲዳ ዋዴ አዛኒሼ አጊዲ ቢሰ።

23 ሄሳፌ ጉዬ፥ ዬሱሲ ባ ታማሬታ፥ «ታኒ ሂንቴው ቱማ ኦዳይሰ፤ ዱሬይ ሳሎ ካዎቴላ ጌላናይሲ ዳሮ ሜቶ።

24 ዱሬ አሲ ያሳ ካዎቴላ ጌላናይሳፌ ገማሌይ ማርፔ ሉሆራ አጫይሲ ካዉዬሰ» ያገሰ።

25 ዬሱሳ ታማሬቲ ሄሳ ሲዲዲ ማላሌቲዲ፥ «ያቲን፥ ኦኒ አታናው ዳንዳዲ?» ያገዲ ኦይቸደሶና።

26 ዬሱሲ ኤንታ ጫዲ ጃሊዲ፥ «ሃይሲ አሳሰ ዳንዳዌቴና፥ ሺን ያሳሰ ኡባይ ዳንዳዌቴሰ» ያገሰ።

27 ጳጳርሲ ዛሪዲ፥ «ኦኒ ኡባባ አጊዲ ኔና ካሊዲ። ያቲን፥ ኦኒ አይ ዳማኔ?» ያገሰ።

28 ዬሱሲ ኤንታኮ ሃይሳዳ ያገሰ፥ «ታኒ ሂንቴው ቱማ ኦዳይሰ፤ አሳ ናዓይ ያና አላሚያን ባ ቦንቾ አራታን ኡቲያ ዋዴ ሂንቴ ታማኔ ናምዓቲ፥ ታና ካሊዳይሳቲ፥ ታማኔ ናምዑ አራታን ኡቲዲ ታማኔ ናምዑ ኢሰራዌሌ ዜሬላታ ቦላ ፒርዳና።

29 ታ ሱንላ ገሾ ከሌ ዋይኮ ኢሻታ ዋይኮ ሚቹታ ዋይኮ አዎ ዋይኮ አዩው ዋይኮ ናይታ ዋይኮ ጋዲያ አጊዳይ ኦኒካ ጭቱ ኩሼ ኤካና። ቃሲ ሜሪና ዳዑዋካ ኤካና።

30 ሺን ዳርቲ ሃዲ ዳላን ሲንሌ ጊዲዳይሳቲ ጉዬ ጊዳና፥ ቃሲ ጉዬ ጊዲዳይሳቲ ሲንሌ ጊዳና» ያገሰ።

20

ዋይኒያ ጊዳን ኦሊያ ኦሳንቾታ ለሚሶ

1 «ያሳ ካዎቴላይ ባ ዋይኒያ ጊዳን ኦሳንቾታ ከራ ኦሲሳናው ዋንታ ጉራ ከዪዳ ከላዎ ዳኔሰ።

2 ኢ ሄ ኦሳንቾታሰ ሃቹ ሃቹ ኢሲ ዲናሬ * ቃንፃናው ኤንታራ ገጊዲ፥ ኤንታ ባ ዋይኒያ ጊዳ ዬዲሰ።

3 «ቃሲ ዋንታፌ ሄቹ ሳቲ ጊዲሺን ከዪዲ ኦሶ ጳዪዲ ጊያ ቦላ ኤቁዳ ሃራ አሳታ ዳሚሰ።

4 ኢ ኤንታኮ፥ «ሂንቴካ ታ ዋይኒያ ጊዳ ቢዲ ኦሊቴ፥ ታኒ ሂንቴው ቤሲያ ጋቲያ ቃንፃና» ያገሰ።

5 ኤንቲካ ቢደሶና። ቃሲካ ኢ ኡሱፑን ሳቲኒኔ ኡዲፋን ሳቲን ከዪዲ ሄሳዳ ኦሊሰ።

19:28 ማቶ 25:31፤ ሉቃ 22:30 19:30 ማቶ 20:16፤ ሉቃ 13:30 * 20:2 ኢሲ ዲናሬ፥ ኢሲ አሲ ኢሲ ጋላሰ ኦሊ ፕዒዲ ኤኪያ ሚሼ።

6 ታማኔ አሲ ሳቲ ገዲሺን ኢ ኬያ ዎዴ ሃራቲ ያን ኤቁዳይሳታ ዴሚዲ፣ ሳንቲ ኦሶ ኦፍ ጋላስ ኩሜሌ ሃይሳን ኣይስ ኤቁዲ ፔራዴቲ?) ያገሰ።

7 «ኤንቲ ዛሪዲ፣ ኦና ኬራ ኦሲሲያ ኣሲ ቆዩዳ ገሾሳ) ያገደሶና።

«ኢካ፣ ሳንቲካ ታ ዎይኒያ ገዶ ቢዲ ኦሌቴ» ያገሰ።

8 «ሳሲ ኦማርሲን፣ ዎይኒያ ጎዳይ ኦሳንቸታ ሃላቃኮ፣ ሳንቲካቸታ ዪጋዳ ዉርሴላን ኦሶ ጌሊዳይሳታፔ ዶማዳ ኮይሮ ጌሊዳይሳታ ጋካናው ኤንታ ጋቲያ ቃንፃ» ያገሰ።

9 ታማኔ አሲ ሳቲን ኦሶ ኦይኪዳይሳቲ ዩዲ፣ ሁዔን ሁዔን አሲ አሲ ዲናሬ ኤኪደሶና።

10 ኮይሮ ኦሶ ኦይኪዳይሳቲ ዩዲ፣ ባንታው ዳሮ ኢሜታና ገዲ ቆፒደሶና። ሺን ኤንቲካ ሁዔን ሁዔን አሲ አሲ ዲናሬ ኤኪደሶና።

11 ባንታ ሚሺያ ኤኪ ሲሚዲ ኬላዎ ቦላ ዙሙደሶና።

12 ሳይሳቲ ጉዬፔ ዩዲ አሲ ሳቲ ፃላላ ኦሌደሶና። ሺን ጋላስ ኩሜሌ ኣዎ ሱላን ዳቡሪዲ ፔራዳ ኦራ ኤንቲ ዎኒዲ አሲኖ ገደና) ያገደሶና።

13 «ዎይኒያ ኬላዎይ ኦሳንቸታፔ ኢሱዎኮ፣ ሓ ኢሻው፣ ታኒ ኦና ቆሃቢኬ፤ ኔ ታራ ገገዳይ አሲ ዲናሬሳ ገዴኔ?»

14 ኔ ሚሺያ ኤካዳ ኔ ሶ ባ። ታ ኦማርሲ ዩዳይሳሰካ ኔይሳ ማላ ኢማናው ኮያይስ።

15 ታኒ ታ ሚሺያን ኮዩዳባ ኦፋናው ታው ማቲ ባዌ? ዎይኮ ታኒ ኬሃ ገዲዳ ገሾ ኔኒ ቃናታይ?) ያገሰ።

16 «ሃሳዳ ሃሲ ዳላን ጉዬ ገዲዳይሳቲ ሲንላታና፣ ሲንላቲዳይሳቲ ቃሲ ጉዬታና» ያገሰ።

ዩሱሲ ባ ሃይቁዎባ ሄቫንላ ኦዲስ
(ማር 10:32-34፤ ሉቃ 18:31-34)

17 ዩሱሲ ዩሩሳላሜ ቢሹ፣ ታማኔ ናምቡ ታማሬታ ዲማ ጋፃ ኬሲዲ ኤንታኮ ያገሰ።

18 «ሄኮ፣ ኦኒ ሃሲ ዩሩሳላሜ ቡሳ ቦላ ዴዎስ። ያን ኣሳ ናዓይ ካሂኔ ሃላቃታሲኔ ሂጌ ኣስታማሬታስ ኣቋ ኢሜታና። ኤንቲካ ኢያ ቦላ ሃይቆ ፒርዳ ፒርዳና።

19 ኢያ ኣይሁዴ ገደና ዴሪያስ ኣሌ ኢማና። ኤንቲ ኢያ ካዉሻና፣ ጋራፋና፣ ያቲዲ ኢያ ማስቃሊያ ቦላ ካቃና። ሺን ኢ ሄቫንላ ጋላስ ሃይቆፔ ዴንዳና» ያገሰ።

ዛብዲዮሳ ናይታ ኣዬ ዋሳ
(ማር 10:35-45)

20 ሄ ዎዴ ዛብዲዮሳ ማቺያ ባ ናምዑ ኣዴ ናይታራ ዬሱሳኮ ያዳ፣ ኢያ ሲንጻን ጉልባታዳ ኢሲባ ኢያ ዋሳሱ።

21 ዬሱሱ ኢኮ፣ «ኔ ኣይ ኮያይ?» ያገሰ።

ኢያ ዛራዳ፣ «ኔ ካዎቲጻን ሃ ታ ናምዑ ናይቲ ኢሶይ ኔ ኡሻቻን ኢሶይ ኔ ሃዲርሳን ኡቶ ጋርኪ!» ያጋሱ።

22 ሺን ዬሱሱ ናይታኮ ዛሪዲ፣ «ሂንቴ ኣይ ዎሲያኮ ኤሬኬታ፤ ታኒ ኡያናው ዴዲያ ዋዬ ፀዓ ኡያናው ዳንዳዔቲ?» ያገሰ።

ኤንቲካ፣ «ኤ ዳንዳዎሰ» ያገደሶና።

23 ዬሱሱ፣ «ቴማካ ታኒ ኡያናው ዴዲያ ፀዓፔ ሂንቴ ኡያና። ሺን ታ ኡሻቻኒ ነ ሃዲርሳን ኡታናይሳታ ዶሬይ ታና ገዲኬ። ሄ ቤሳይ ኢሜቴይ፣ ታ ኣዎይ ኢማናው ገገሲዳ ኣሳታሳ» ያገሰ።

24 ኣቲዳ ታሙ ኢያ ታማሬቲ ሄሳ ሲዒዳ ዎዴ ናምዑ ኢሻታ ቦላ ሃንቁቲደሶና።

25 ሺን ዬሱሱ ኤንታ ኡባ ጸገዲ ሃይሳዳ ያገሰ። «ኣይሁዴ ገደና ኣሳ ሃሬይሳቲ ባንታ ኣሳ ቦላ ጎዳቴይሳኔ ኤንታ ካሌሌይሳቲ ዎልቃን ሃሬይሳ ሂንቴ ኤሬታ።

26 ሺን ሂንቴ ገደን ሃሳዳ ገደፖ። ሂንቴፌ ገታታናው ኮያ ኦኒካ ሂንቴው ኣይሌ ገደ።

27 ሂንቴ ገደን ኡባፌ ቦላ ገደናው ኮያ ኦኒካ ሂንቴው ኣይሌ ገደናው ቤሱሰ።

28 ሃሳዳካ፣ ኣሳ ናዓይ ኣሴ ሃጋዛናውኔ ዳር ኣሳ ዎዛናው ባ ሹምፑዎ ኢማናው ዪሲፔ ኣቲን ኣሳን ሃጋዜታናው ዪቤና» ያገሰ።

ዬሱሱ ናምዑ ቆቁታ ፓሊስ
(ማር 10:46-52፤ ሉቃ 18:35-43)

29 ሃሳፌ ጉዬ፣ ዬሱሱ ባ ታማሬታራ ኢያርኮፌ ኮዪዲ ቢሺን፣ ዳር ኣሳይ ኤንታና ካሊደሶና።

30 ኦጌ ጋዩን ኡቲዳ ናምዑ ቆቁቲ ዬሱሱ ያራ ኣጴይሳ ሲዒዲ፣ «ጎዳው፣ ዳዊቲ ናዓው፣ ኮሰ ቃጴታርኪ» ያገዲ ዋሲደሶና።

31 ዳር ኣሳይ ኤንታና፣ «ሃይዚቴ» ያገዲ ካጪደሶና። ሺን ኤንቲ፣ «ጎዳው፣ ዳዊቲ ናዓው፣ ኮሰ ቃጴታርኪ» ገዲ ጉጂ ዋሲደሶና።

32 ዬሱሱ ኤቁዲ፣ ኤንታ ጸገዲ፣ «ታ ሂንቴው ኣይ ኦፋና ማላ ኮዬቲ?» ያገዲ ኦይቺሰ።

33 ኤንቲካ፣ «ጎዳው፣ ኑ ኣይፊይ ያላና ማላ ኮኖስ» ያጊደሶና።

34 ዩሱሲ ኤንታው ቃጂቲዲ፣ ኤንታ ኣይፊያ ቦቺሶ። ኤሌሲዲ ኤንታ ኣይፊይ ያሊሰ፤ ኤንቲ ኢያ ካሊዲ ቢደሶና።

21

ዩሱሲ ገታ ቦንቸን ዩሩሳላሜ ጌሊሰ
(ማር 11:1-11፤ ሉቃ 19:28-40፤ ዮሃ 12:12-19)

1 ዩሱሳራኔ ኢያ ታማሬታራ ዩሩሳላሜ ማቲዲ፣ ሻማሆ ዳሪያ ቦላ ዳዲያ ቤቴፋጌ ጊያ ጉታ ጋኪሼ፣ ዩሱሲ ባ ታማሬታፔ ናምዓታ ባፔ ሲንጼ ያጊዲ ከቲሰ።

2 «ሂንቴፊ ሲንጻን ዳዲያ ጉታ ቢቴ። ያን ኢሲ ሃሪይ ቃሾን ዳዲያር ኢ ማራራ ሂንቴ ሶሁዋራ ዳማና። ኤንታ ቢሊዲ ሃ ኤኪ ዩቴ።

3 ኦኒካ ሂንቴና ኦይቸኮ፣ ሳዳይ ኤንታና ኮዩስ» ያጊቴ። ኢ ኤንታና ኢራካ ዩዲ ኣጋና» ያጊሰ።

4 ሂሲካ ናቤይ፣

5 «ዲዮኔ ካታማሰ፣

ሂኮ፣ ኔ ካዎይ ኣሽኬ ጊዲዲ፣ ሃሪ ቦላኔ

ሃሪ ማራ ቦላ ኡቲዲ፣ ኔኮ ዩስ» ያጊቴ።

ያጊዲ ያፊዲይሲ ፖሌታና ማላ ሂሲ ሃኒሰ።

6 ኢያ ታማሬቲ ቢዲ ዩሱሲ ኤንታ ከቲዳይሳዳ ኦሊደሶና።

7 ሃሪጫኔ ሃሪ ማራ ኤሂዲ ቦላራ ማዲዳ ባንታ ማዑዋ ኤንታ ዘኮን ዩጊደሶና። ዩሱሲ ማዖታ ቦላ ኡቲሰ።

8 ዳር ኣሳይ ባንታ ማዑዋ ኦጊያን ሂዲደሶና። ሃራቲ ቦንጮ ታሽዲ ኦጊያ ቦላ ዩጊደሶና።

9 ዩሱሳላፔ ሲንጻራ ሃሙቴይሳቲኔ ኢያፔ ጉዩራ ካሊያ ዳር ኣሳይ፣

«ሆሳና! * ዳዊቴ ናዓይ ጋላቴቶ!

ጎዳ ሱንጻን ዩይሲ ኣንጃቲዳይሳ!

ቦንቸይ ኡባፊ ጶቃ ሳሉዋን ያሳሰ ጊደ!»

ያጊዲ ዋሲደሶና።

10 ዩሱሲ ዩሩሳላሜ ካታማ ጌሊዳ ዎዴ ሄ ካታማን ዳዲያ ኣሳ ኡባይ፣ «ሃይሲ ኦኔ?» ያጊዲ ያርኪደሶና።

21:5 ዛካ 9:9 * 21:9 ሆሳና፡ ኢብራይስጭ ደናን ሆሳና ጉሳይ «ኦና ኣሻ ጉሰ። ቃሲ ኣሳይ ያሳ ጋላታናው ጎዳቲያ ቃላ። 21:9 ማዝ 118:25

11 አሳይ፥ «ሃይሲ ጋሊላን ዳዊያ ናዚሬቴ ካታማፔ ዪዳ ናቢያ ዬሱሳ» ያገደሱና።

ዬሱሲ ያሳ ኬሊ ጌሊሰ
(ማር 11:15-19፤ ሉቃ 19:45-48፤ ዮሃ 2:13-22)

12 ዬሱሲ ያሳ ኬሊ ጌሊዲ፥ ያን ባይዜይሳታኔ ሻሜይሳታ ኡባ ካሬ ጎዲሰ። ሚሼ ላሜይሳታ ፃርጴዛታኔ ሆሌታ ባይዚያ ኦይዳታ ሺሪ ዬገሰ።

13 ኢካ ኤንታኮ፥ «ያሳ ቃላን፥ ታ ኬላይ ያሳ ዎሲያ ኬሊ ጌቴታና ጌቴቲ ፃፊቴሰ። ሺን ሂንቴ ፓንጋቲ ቆሴቲያ ጎንጎሎ ኦሊዳታ» ያገደሱና።

14 ዬሱሲ ያሳ ኬላን ዳዊሺን ቆቄቲኔ ጉንዳቲ ኢያኮ ዪን ኤንታ ፓሊሰ።

15 ሺን ካሂኔ ሃላቃቲኔ ሂጌ አሰታማሬቲ ዬሱሲ ኦሊዳ ማላሊሲያባታ ቤዲዲይሳሲኔ ጉላ ናይቲ ያሳ ኬላን፥ «ዳዊቴ ናባይ፥ ጋላቴቶ» ያገደሱ ዋሴይሳ ሲዲዲ ሃንቁቲደሶና።

16 ኤንቲ ዬሱሳኮ፥ «ሃይሳቲ ጌይሳ ኔ ሲባይ?» ያገደሱና። ዬሱሲ፥ «ኤ ሲባይሰ፥ ያሳ ቃላን፥ ርጉላ ናይታ ደናኒኔ ቋሚያ ናይታ ደናን ጋላታ ዋላዳሳ ጌቴቲዲ ፃፊቴዳይሳ ሂንቴ ናባቢቤኬቲ?» ያገደሱና።

17 ኤንታና ያን ኣገዲ ቢታኒያ ካታማ ቢዲ አቂሰ።

ጎዳይ ባዲዳ ባላሴ ሚሊው
(ማር 11:12-14፥ 20-24)

18 ዬሱሲ ዎንታ ጉራ ካታማ ሲሚዲ ዪሼ ኮሻቲሰ።

19 ኦጌ ጋፃን ኢሲ ባላሴ ሚሊ ቤዲዲ ኢኮ ቢሰ። ሺን ሃይላፊ አቲን ሃራ አይኮካ ዳሚቤና። ሄሳ ጊሾ፥ ኢዮ፥ «ሂዛፔ ናምዓንሶ አይፊ አይፎፓ!» ያገደሱ። ሄ ባላሴ ሚሊያ ኤሌሳዳ ማላ ኣጋሱ።

20 ኢያ ታማሬቲ ሄሳ ቤዲዲ፥ «ሃ ባላሲያ ዋናዳ ኤሌሳ ማላዳ?» ያገደሱ ማላሌቲደሶና።

21 ዬሱሲ ዛሪዲ፥ «ታኒ ሂንቴው ቱማ ኦዳይሰ፤ ሂንቴው አማኖይ ዳዊኮ፥ ቃሲ ሂንቴ ሲዶና ኢዲኮ ባላሴ ቦላ ታኒ ኦሊዲይሳ ማላ ፃላላ ኦሌኬታ፥ ሺን ሳ ዳሪያ ሾዳታዳ አባን ዎቆ» ያገኩ ሃናና።

22 አማኒዲ ሂንቴ ዎሲያባ አይቢባ ገዲኮካ ሂንቴ ኤካና» ያገደሱ።

ዩሱሳ ማታይ ኦይሽቲስ
(ማር 11:27-33፤ ሉቃ 20:1-8)

23 ዩሱሱ ያሳ ከጻ ጌሊዲ ታማርሲሽን፡ ካሂኔ ሃላቃቲኔ ኣይሁዳ ጨማቲ ኢያኮ ዩዲ፡ «ኔኒ ሃይሳ ኦሳና ማላ ኔው ኣይ ማቲ ዴዒ? ኔው ሃ ማታ ኢሚዳይ ኦኔ?» ያጊዲ ኦይቺዶሶና።

24 ዩሱሱ ኤንታኮ፡ «ታኒካ ሂንቴና ኢሲባ ኦይቻይስ፤ ሂንቴ ታው ሄሳ ዛሪኮ፡ ታኒ ኣይ ማታን ኦሊያኮ ሂንቴው ኦዲና።

25 ዮሃንሲ ፃማቃና ማላ ማታይ ኣዉፔ ኢሜቲዴ? ያሳፊዬ ኣሳፔ?» ያጊሱ።

ኤንቲ ባንታ ጊዶን ዛሪቲዲ፡ «ኮኒ፡ (ያሳፊ) ጊኮ፡ ኢ ኦና፡ (ያቲን ኣይስ ኣማኒቤኬቲ?) ያጋና።

26 ኮኒ፡ (ኣሳፔ) ጊኮ፡ ኣሳ ኡባይ ዮሃንሳ ናቤ ኦሊ ያሊያ ጊሾ ኣሳ ያዮሰ» ያጊዶሶና።

27 ሄሳ ጊሾ፡ «ኮኒ ኤርኮ» ያጊዲ ዛሪዶሶና።
ኢካ፡ «ሂዛ፡ ታኒካ ሃይሳ ኣይ ማታን ኦሊያኮ ሂንቴው ኦዲኬ» ያጊሱ።

ናምዑ ናይታ ለሚሶ

28 «ዩሱሱ ካሊዲካ ሃይሳዳ ያጊሱ፡ ናምዑ ኣዴ ናይቲ ዴዒያ ኢሲ ኡሪይ ዴዴስ። ሄ ኡሪይ ባይራ ናባኮ ቢዲ፡ ታ ናባው፡ ሃቺ ዋይኒያ ጊዶ ባዳ ኦላ» ያጊሱ።

29 ናባይ ዛሪዲ፡ (ኣቶ ቢኬ) ያጊሱ። ሽን ጉዬፔ ባ ዎዛናን ቆፒ ኤኪዲ ኦላናው ቢሱ።

30 ኣዋይ ባ ካሎ ናባኮ ቢዲ፡ ባ ባይራ ናባኮ ጊዳይሳዳ ኪቲስ። ኢካ፡ (ኤር፡ ታ ኣዋው) ያጊሱ። ሽን ቢቤንና።

31 ሃ ናምዑ ናይታፔ ባ ኣዋሰ ኪቲቲዳይሲ ኣዉሴ?» ያጊሱ።
ኤንቲካ፡ «ባይራ» ያጊዶሶና።

ዩሱሱ ኤንታኮ፡ «ታ ሂንቴው ቱማ ኦዲይስ፤ ቃራፃ ቃንዲሴይሳቲኔ ላይማቴይሳቲ ሂንቴፊ ሲንላቲዲ ያሳ ካዎቴላ ጌላና።

32 ፃማቂያ ዮሃንሲ ሱሬ ኦጊያ ታማርሲሽ ዩን ኢ ጌይሳ ኣማኒቤኬታ። ሽን ቃራፃ ቃንዲሴይሳቲኔ ላይማቴይሳቲ ኣማኒዶሶና። ሂንቴ ሃሪ ኣቶሽን፡ ኤንታ ቤዒዲካ ሂንቴ ናጋራፔ ሲሚዲ ኣማኒቤኬታ» ያጊሱ።

ዋይኒያ ጊዶን ኦሊያ ጎሻንቸታ ለሚሶ
(ማር 12:1-12፤ ሉቃ 20:9-19)

33 ቃሲካ ዩሱሲ ሃይሳዳ ያገሰ፤ «ሃራ ለሚሶ ሲዲቱ፣ ዋይኔ ቶኩዳ ኢሲ ኡራይ ዴዔሰ። ሄ ዋይኒያ ዩቩዋ ዲሪሰ። ዋይኒያ ጉምዒያ ኦላካ ቦኪሰ። ዋይኒያ ናጋናው ሻኮካ ሻኪሰ። ሄሳፌ ጉዬ፣ ጋዲያ ኮሌ ኢሚዲ ሃራ ቢታ ቢሰ።

34 ዋይኔ ኣይፊያ ማዲያ ዋይይ ጋኪን ባና ጋኪያ ባጋ ኤኪዲ ያና ማላ ባ ኣይሌታ ኤንታኮ ዩዲሰ።

35 ኮሌ ኣዋቲ ኢያ ኣይሌታ ኦይኪዲ ኢሱዋ ዋዲዶሶና፣ ሃንኩዋ ዋዲዶሶና ቃሲ ኣቲዳይሳ ሹቻን ጫዲዶሶና።

36 ዋይኔ ኣታኪልቲያ ጎዳይ ካሴይሳታፔ ዳሪያ ሃራ ኣይሌታ ከቲሰ። ኮሌ ኣዋቲ ኤንታ ቦላካ ሃንኮይሳታ ቦላ ኣሌዳይሳዳ ኣሌዶሶና።

37 ወርሴላን ኢ፣ «ታ ናዓ ኤንቲ ቦንቻና!» ያገዲ ባ ናዓ ኤንታኮ ከቲሰ።

38 «ሺን ኮሌ ኣዋቲ ናዓ ቤዒዲ ባንታ ገደን ጋዲያ ላታናይሲ ሃይሳ፣ ኢያ ዋዲዲ ጋዲያ ኦኒ ላቶሰ!» ያገደሶና።

39 ናዓ ኦይኪዲ ዋይኒያ ገደፌ ጋዓ ኪሲዲ ዋዲዶሶና።

40 «ሂዛ፣ ዋይኔ ኣታኪልቲያ ጎዳይ ያ ዋይ ሄ ኮሌ ኣዋታ ዋታኔ?» ያገዲ ኦይቸሰ።

41 ኤንቲ ዛሪዲ፣ «ኢ ሄ ኢታ ኣሳታ ኢታ ዋዶ ዋዲዲ፣ ዋይኔይ ኣይፊያ ዋይ ኢያ ጋኪያ ባጋ ዋይን ዋይን ኢሚያ ሃራ ኮሌ ኣዋታሰ ኢማና» ያገደሶና።

42 ዩሱሲ ዛሪዲ ኤንታኮ፣ ዖሳ ቃላን፣ « ገምቤይሳቲ ቦሪዲ ኢዲያ ሹቻይ፣ ጎዳ ዓጹዋ ሚንሌያ፣ ኡባፌ ኣዲያ ሹቻ ገዲሰ።

ሃይሲ ጎዳይ ኣሌዳባ፤ ኑ ኣይፊያሰ ማላሊሲያባ) ጌቲቲዲ ዓፌቲዳይሳ ናባቢቤኬቲ?

43 «ሃሳ ገሹ፣ ታኒ ሂንቲው ኦዳይሰ፤ ዖሳ ካዋቲሳይ ሂንቲፌ ኤኬቲዲ ሎዖ ኣይፌ ኣይፊያ ኣሳታሰ ኢሚታና።

44 [ሃ ሹቻ ቦላ ኩንዲያ ኡባይ ማቄሬታና። ቃሲ ሄ ሹቻይ ኢያ ቦላ ዋዲያ ኡሪይካ ጋጩታና]» † ያገሰ።

45 ካሂኔ ሃላቃቲኔ ፋሪሳዌቲ ዩሱሲ ኦዲዳ ለሚሱዋን ባንታና ኦዲዳይሳ ኤሪዶሶና።

46 ኤንቲ ዩሱሳ ኦይካናው ኮዩዶሶና፣ ሺን ኣሳይ ዩሱሳ ናቤ ኣሌዲ ዪሊያ ገሹ ኣሳሰ ያዩዶሶና።

21:33 ኢሳ 5:1-2 21:42 ማዝ 118:22 † 21:44 ኢሲ ኢሲ ቤኒ ማፃፋቲ ፓይዶ 44 ጉጆሶና (ሉቃ 20:18 ያለቲ)።

22

ያጋኖ ዌሳ ለሚሶ

(ሉቃ 14:15-24)

- 1 ዩሱሲ አሳስ ዛሪዲ ሃይሳዳ ያጊዲ ለሚሶ ኦዲስ።
- 2 «የሳ ካዎቴላይ ባ ናሳስ ያጋኖ ጊጊሲዳ ካወዋ ዳኔስ።
- 3 ሄ ካዎይ ያጋኖ ያና ሜላ ኦዲ ዎሊዳ አሳታ ዌጋናው ባ አይሌታ ኪቲስ። ሺን አሳቲ ያናው ኮዪቦኮና።
- 4 ቃሲ ሃራ አይሌታ ዌጊዲ፣ ዌጌቲዳ አሳታኮ ቢዲ፣ ሓኒ ታ ሳንጋታኔ ዎዲዳ ጋታርሜንሉታ ሹካስ፤ ኡባባይ ጊጊስ። ታ ያጋኑዎ ሃ ዪቲ ያጊቲ» ያጊዲ ኪቲስ።
- 5 ሺን ዌጌቲዳይሳቲ ዌሳ ኢዌዲ፣ ባንታ ኦሶስ ኦሶስ ቢደሶና። ኢሶይ ባ ጎሻስ፣ ሃንኮይ ባ ዛልዒያስ ቢስ።
- 6 ሃራቲ ቃሲ ካወዋ አይሌታ ኦይኪዲ፣ ካወሺ ዎዲዳ ዎዲደሶና።
- 7 «ካዎይ ዳር ዪሎቲዲ፣ ባ ዎታዳሬታ ዩዲዲ ሸዎፖ ዎዲዳይሳታ ዎዲሲስ፣ ኤንታ ካታማካ ፀጊስ።
- 8 ሃሳፌ ጉዬ፣ ባ አይሌታኮ፣ ለያጋኖይ ጊጊስ፣ ሺን ዌጌቲዳይሳቲ ያጋኑዎስ ቤሲያ አሲ ጊደኮና።
- 9 ሃሳ ጊሹ፣ ዎጋ ኦጌታ ቢዲ፣ ዳሚዳ አሲ ኡባ ያጋኑዎ ያና ሜላ ዌጊቲ» ያጊስ።
- 10 አይሌቲ ኦጊያ ቦላ ቢዲ ባንታ ዳሚዳ አሲ ኡባ ሎፖታኔ ኢታታ ኤሂዲ ያጋኖ ሻቃራ ጌልሲዲ ኩንሉደሶና።
- 11 «ሺን ካዎይ ካላ ማናው ኡቲዳ አሳ ቤዓናው ጌሊዳ ዎዳ ያጋኖ ማፖ ማዒቦና ኢሲ አሲ ዳሚስ።
- 12 ኢያኮ፣ ላ፣ ኔ ያጋኖ ማፖ ማፖና ዎናዳ ሃይሳ ጌላዲ?» ያጊስ። ሺን ኡራይ ሲዒ ጊስ።
- 13 «ካዎይ ባ አይሌታኮ፣ ላ ሡራ ኩሺያኔ ቶሁዎ ቃቺዲ፣ ካሬ ዲማ ኬሲ ዩጌቲ። ያን ኢያው ዩሆኔ አቻ ጋርጨዳ ጊደና» ያጊስ።
- 14 «ሃሳዳካ፣ ያሳ ካዎቴላስ ዌጌቲዳይሳቲ ዳር ሺን ዳሬቲዳይሳቲ ጉላ» ያጊስ።

ጊራባ

(ማር 12:13-17፤ ሉቃ 20:20-26)

- 15 ሃሳፌ ጉዬ፣ ፋሪሳዌቲ ቢዲ፣ ዩሱሳ ዎቲ ኦዳን ኦይካኔኮ ዘሬቲደሶና።

16 ባንታ ታማሪታኔ ሄሮዲሳ ባጋታፔ ኢሶታ ኢሶታ ከተደሰና።
ኤንቲካ፣ «አስታማሪያው፣ ኔ ቱማ ኦዴይሳ ኑ ኤሮስ። ኔኒ አሳፔ
አሴ ሻካካ፣ አሳ ዋይጋንዴስ ጋዳ አይኮካ ኦላካ፣ ያሳ ኦጊያ
ቱማቲላን ታማርሳሳ።

17 እኔ ኑስ ኦዳ፣ ኑኒ ሮሜ ካወዋስ ገራ ገራናው ቤሲ
ቤሴኔ?» ያጊደሰና።

18 ሺን ዬሱሲ ኤንታ ኢታ ቆፋ ኤሪዲ፣ «ሃ ጩቦቶ፣ ታና አይስ
ፓጩቲ?»

19 ገራ ገሪያ ሚሺያ ታና ቤሲቲ» ያጊሰ። ኤንቲካ ኢያው
ሳንቲሜ ኤሂደሰና።

20 ኢ፣ «ሃ ስንገላይኔ ማላይ ኦዴባዬ?» ያጊሰ።

21 ኤንቲ፣ «ሮሜ ካወዋይሳ» ያጊደሰና።

ያቲን ዬሱሲ ኤንታኮ፣ «ሂዛ፣ ካወዋስ ቤሴይሳ ካወዋስ፣ ያሳስ
ቤሴይሳ ያሳስ አሚቲ» ያጊሰ።

22 ኤንቲ ሄሳ ሰዒዳ ዋዴ ማላሌቲዲ ኢያ ማታፔ አጊዲ
ቢደሰና።

ሃይቆፔ ዴንደባ

(ማር 12:18-27፤ ሉቃ 20:27-40)

23 ሄ ጋላስ ሃይቆፔ ዴንደይ ባዋ ያጊያ ሳዱቃዌቲ ዬሱሳኮ
ዪዲ፣ ያጊዲ ኢያ ኦይቺደሰና።

24 «አስታማሪያው፣ ምሴይ፣ ኢሲ አሲ ናዓ ዬሎና ሃይቂኮ፣
ሄ ሃይቂዳይሳ አሻይ ኢያ ማቺው ኤኪዲ፣ ባ አሻስ ናዓ ዬሎ»
ያጊዲ ከቲሰ።

25 ኑ ኤሪያ ላፑን አሻቲ ዴፖሰና። ባይራይ ማቾ ኤኪዲ ናዓ
ዬሎና ሃይቂሰ። ኢያ ማቺው ኢያ ካሎ አሻይ ኤኪሰ።

26 ሄሳዳካ፣ ሄ ማጫሲው ኤኪዳ ናምዓንጾይካ፣ ሄቫንጾይካ፣
ቢዲ ላፑናቲ ዉራና ጋካናው ኡባይ ሃይቂደሰና።

27 ኡባፌ ጉዬ ሄ ማጫሲያ ሃይቃሱ።

28 ያቲን፣ ላፑናቲ ኡባይ ኢዮ ኤኪዳ ጊሾ ሃይቆፔ ዴንዲያ
ጋላስ፣ ሄ ማጫሲያ ላፑናታፔ አዉሳስ ማቾ ጊዳኔ?» ያጊደሰና።

29 ዬሱሲ ዛሪዲ፣ «ሂንቲ ያሳ ቃላይ ታማርሲያባ ዋይኮ ኢያ
ዋልቃ ኤሮና ጊሾ ባሌታ።

30 አሳይ ሃይቆፔ ዴንዲያ ዋዴ ሳሎን ዴዒያ ከታንቾታ ሜላ
ጊዳናፔ አቲን ኤኮኮና ጌሎኮና።

31 ቃሲ ሃይቂዳ አሳቲ ሃይቆፔ ዴንዳናባ ያሳይ ሂንቲው
ኦዲዲይሳ ናባቢቤኬቲ?

32 ያሳይ፡ ጥኒ ኣብራሃሜ ያሳ፡ ዩሳቃ ያሳ፡ ያይቆባ ያሳ፡ ያገሰ፡ ሄሳ ገሹ፡ ያሳይ ፓፃ ዴዴሳታ ያሳፊ ኣቲን ሃይቁዳይሳታ ያሳ ገዴና» * ያገሰ፡፡

33 ዳሮ ኣሳይ ሄሳ ሲዒዲ፡ ኢያ ቲሚርቲያን ማላሌቲዶሶና፡፡

ኡባፌ ባይራቲያ ኪታ
(ማር 12:28-34፤ ሉቃ 10:25-28)

34 ዩሱሲ ሳዲቃዊታሰ ጋናባ ጳይሲዳይሳ ፋሪሳዊቲ ሲዒዲ ዎዴ ኢሲፌ ሸቁዶሶና፡፡

35 ኤንታ ገዶፌ ኢሲ ሃጌ ኣስታማሬይ ዩሱሳ ፓጩ ኦይሾ ኦይቸሰ፡፡

36 «ኣስታማሪያው፡ ሃጌ ኡባፌ ኣጼይሲ ኣዉስ?» ያገዲ ኦይቸሰ፡፡

37 ዩሱሲ ዛሪዲ፡ « ሳ ኅዳ፡ ኔ ያሳ፡ ኔ ኩሜላ ዎዛና፡ ኔ ኩሜላ ሸምፑዎፌ፡ ኔ ኩሜላ ቆፋፔ ዶሳ፡፡

38 ኡባፌ ኣጼይሲኔ ባይራ ኪታይ ሃይሳ፡፡

39 ናምዓንሉ ኡባፌ ኣጼያ ኪታይ፡ ኣሴ ኡባ ኔ ሁዒያ ኔ ዶሴይሳዳ ዶሳ» ያገይሳ፡፡

40 ሙሴ ሃጌይኔ ናቤታ ቲሚርቲይ ኡባይ ሃ ኪታታ ቦላ ካቶሶና» ያገሰ፡፡

ኪሪሰቶሳባ ኦይቸዳ ኦይሻ
(ማር 12:35-37፤ ሉቃ 20:41-44)

41 ፋሪሳዊቲ ኢሲ ቦላ ሸቁዲ ዴሲሺን፡ ዩሱሲ ኤንታና፡፡

42 «ኪሪሰቶሳባ ሃንቲ ዎይጌቲ? ኢ ኦዴ ናዔ?» ያገዲ ኦይቸሰ፡፡

ኤንቲ፡ «ኢ ካዉዎ ዳዊቲ ናዓ» ያገዲ ዛሪዶሶና፡፡

43 ዩሱሲ ኤንታኮ፡ «ያቲን፡ ዳዊቲይ ጌሻ ኣያናን ገዲዲ ዎቲዲ ኪሪሰቶሳ፡ ሳዳ) ገዲ ጃጊ? ዳዊቲይ ገሹ፡፡

44 ሳዳ ያሳይ፡ ታ ጎዳኮ፡ †
ኔ ሞርኬታ ኔ ቶሆይ ዩጲያሶ ኦላና ጋካናው፡
ሃይሳን ታፔ ኡሻቻ ባጋን ‡ ኡታ) ገሰ፡፡

* 22:32 ያሳይ ፓፃ ዴዴሳታ ያሳፊ ኣቲን ሃይቁዳይሳታ ያሳ ገዴና፡ ዩሱሲ ሃ ቤሳን ኦዴይ ያሳይ ሃ ሃይቁዳ ሄሻታሰ ያሴ ገዲኮ ኤንቲ ዴዶን ዴዶሶና ያገይሳ፡፡ 22:32 ኬሳ 3:6 22:37 ዛሪ 6:5 22:39 ሉዌ 19:18 22:40 ሉቃ 10:25-28 † 22:44 ታ ጎዳኮ፡ ሃ ቤሳን ዳዊቲይ ታ ጎዳ ገዲ ጃጌይ ኪሪሰቶሳ፡፡ 22:44 ማዝ 110:1 ‡ 22:44 ኡሻቻ ባጋን፡ ማታኔ ቦንቾ ቤሴ፡፡ 22:44 ማዝ 110:1

45 ሂዛ፡ ዳዊቴይ ከሪስቶስ ጎዳ ገዲ ያገኘ፡ ዋኒዲ ከሪስቶስ ዳዊቴ ናዓ ገዲ?»

ያገሰ።

46 ዩሱሳስ ኢሲ ቃላ ዛራናው ዳንዳዒዳ አሲ ኦኒካ ባዋ። ቃሲ ሄ ጋላሳፔ ደሚዲ ሃራ ኦይሻ ኦይቻናው ኦኒካ ዳንዳዒቤና።

23

ሂጌ አስታማሪታኔ ፋሪሳዊታ ኢታቴላ

(ማር 12:38-39፤ ሉቃ 11:43-46፤ 20:45-46)

1 ሄሳፌ ጉዩ፡ ዩሱሲ ሸቂዳ አሳሲኔ ባ ታማሪታስ ሃይሳዳ ያገሰ።

2 «ሂጌ አስታማሪታኔ ፋሪሳዊቲ ሙሴ ሂገያ ቢላናው ማታራ ዴዖሶና።

3 ሄሳ ገሾ፡ ኤንቲ ሂንቴና ከቲያ ኡባ ኦሊቴኔ ናገቴ። ሸን ኤንቲ ኦሊቴሳዳ ኦሎቴ። ኦይስ ገኦ፡ ኤንቲ ኦይይሳዳ ኦሎኮና።

4 ኤንቲ ቶካናው ዳንዳዒቶና ቶሆ ቃቺዲ አሳ ቶሶሶና። ሸን ባንታው ሃሪ አቶሸን፡ ሄ ቶሁዋ አሳይ ቶኪያ ዎዴ ቢራጴ ያራን ቦቻናው ኮዮኮና።

5 «ሸን ኤንቲ ባንታ ኦሶ ኡባ አሲ ቤዓና ማላ ኦሎሶና። ባንታ ሶምዖኒኔ ቄሴን ቃቺያ ማፃፋ ዊቄሴይ ዴዒያ ከታፌ ዳልገሶሶና፡ ባንታ ማዑዋ ማጫራካ ኦዲሶሶና። *

6 ሞኬቲያ ቤሳን ቦንቾ ቤሲኔ ኦይሁዴ ዎሳ ኬላታን ዳሮ ሎዒያ ኦይዴ ደሶሶና።

7 አሳይ ገያን ኤንታና ቦንቾን ሳርላናይሳኔ (አስታማሪያው) ገዲ ያገናይሳ ኮዮሶና።

8 «ሸን ሂንቴ አስታማሪይ ኢሱዋ ፃላላ ገዲዳ ገሾኔ ሂንቴ ኡባይ አሻታ ገዲዳ ገሾ (አስታማሪያው) ጌቴቲዲ ያጌቶፊቴ።

9 ሂንቴው ሳሎን ኢሲ አዋ ፃላሊ ዴዒያ ገሾ ሃ ሳዓን ኦናካ (አዋው) ገዲ ያጎገገቴ።

10 ሂንቴው ኢሲ ጎዳይ ከሪስቶስ ፃላሊ ዴዒያ ገሾ (ጎዳው) ጌቴቲ ያጌቶፊቴ።

11 ሂንቴ ገደን ባይራቴይ ሂንቴ ኦይሌ ገደ።

* 23:5 ሶምዖኒኔ ቄሴን ቃቺያ ማፃፋ... ማዑዋ ማጫራ ኦዲሶሶና፡ ሄሳ ኤንቲ ኦሊይ ያሳስ ታ ኦሜታስ ገያ ማላ ቤሳናሳ (ዛሬ 15:37-41)። 23:5 ማቶ 6:1፤ ዛሬ 6:8፤ ታይ 15:38 23:11 ማቶ 20:26

12 ባና ገታያ ኦኒካ ካዉያና፤ ባና ካዉሺያ ኦኒካ ገታታና።

ሂጌ አስታማራቲኔ ፋሪሳዊቲ ቦራቲዶሶና
(ማር 12:40፤ ሉቃ 11:39-42፤ 44፤ 52፤ 20:47)

13 «ሂንቴኖ፣ ጨቦቶ፣ ሂጌ አስታማራቶኔ ፋሪሳዊቶ፣ አሳ ሲንላን ሳሎ ካዎቴላ ጎርዳይሳቶ ሂንቴና አዬ። ሂንቴ፣ ሂንቴ ሁዑን ጌሌኬታ ቃሲ ሃራታካ ጌልሴኬታ።

14 [«ሂንቴኖ ጨቦቶ፣ ሂጌ አስታማራቶኔ፣ ፋሪሳዊቶ፣ አምዔታ ኬላ ሂንቴ ቦንቁሽ፣ አሲ ቤያ ጊዲ ዎሳ አዲሴታ። ሄሳ ገሾ፣ ሂንቴና አዬ። ኡባሬ አጲያ ፒርዳይ ሂንቴና ናጌሰ።] †

15 «ሂንቴኖ፣ ጨቦቶ፣ ሂጌ አስታማራቶኔ ፋሪሳዊቶ፣ ሂንቴ ኢሲ ኡራ አማንላናው አባራኔ ሳዓራ ዩዩታ። ሺን ሂንቴ ኢያ አማንላዲ ዎዴ ሄ ኡራ ሂንቴሬ አሉዲ ጋናሜሰ ገጌቲዳይሳ ኦሊያ ገሾ ሂንቴና አዬ።

16 «ኦኒካ ያሳ ኬላን ጫቂኮ አይኮይካ ባዎ። ሺን ያሳ ኬላን ዴዒያ ዎርቃን ጫቂኮ፣ ሄ ጫቆይ ኢያ ጎማና ጊያ ቆቄቶ፣ ሂንቴው ቆቄዲ ሃራታ ካሌሌይሳቶ፣ ሂንቴና አዬ።

17 ሂንቴኖ፣ ኤያቶ፣ ቆቄቶ፣ ዎርቃይ አጲዬ? ዎርቂያ ያሳሰ ዲማያ ያሳ ኬላይ አጲ?

18 ቃሲ ሐኒካ ያርሾ ያርሺያ ቤሳን ጫቂኮ፣ አይኮይካ ባዎ። ሺን ኦኒካ ኢያ ቦላ ዴዒያ ያርሹዎን ጫቂኮ፣ ሄ ጫቆይ ኢያ ጎማና) ያጊዲ ታማርሴታ።

19 ሂንቴኖ፣ ቆቄቶ፣ ያርሾይ አጲዬ? ያርሹዎ ያሳሰ ዲማያ ቤሳይ አጲ?

20 ሄሳ ገሾ፣ ያርሾ ቤሳን ጫቂያ ኡራይ፣ ሄ ያርሾ ቤሳኒኔ ኢያ ቦላ ዴዒያ ኡባባን ጫቂሰ።

21 ያሳ ኬላን ጫቂያ ኡራይ፣ ሄ ያሳ ኬላኒኔ ኢያን ዴዒያ ያሳን ጫቂሰ።

22 ሳሎን ጫቂያ ኡራይ ያሳ አራታኒኔ ሄ አራታ ቦላ ኡቲያ ያሳን ጫቂሰ።

23 «ሂንቴኖ፣ ጨቦቶ፣ ሂጌ አስታማራቶኔ ፋሪሳዊቶ፣ ሂንቴና አዬ። ሂንቴ ካሬላ ሳዎፔ፣ ናቲሮፔኔ ኦካሽፔ አሰራታ ኬሴታ። ሺን ሂጊያን ዴዒያ አጲ ኮሽይሳታ አጊዴታ። ሄሲካ ሱሬ ፒርዳ፣ ቃቆቴሊኔ ኡባባን አማኔቴሊ። ሃራታካ አጎናሺን ሃይሳታ ሂንቴ ኦላናው ቤሴሰ።

23:12 ሉቃ 14:11፤ 18:14 † 23:14 ኢሲ ኢሲ ቤኒ ማፃፋቲ ፓይዶ 14 ጉጆሶና። 23:22 ኢሳ 66:1፤ ማቶ 5:34 23:23 ሉዌ 27:30

24 ሂንቴው ቆቂዲ ሃራ አሲ ካሌሌይሳቶ፣ ሂንቴ ኡሻፌ ኡዲንጭ ኬሲዲ ገማሌ ማቴታ።

25 «ሂንቴኖ፣ ጨቦቶ፣ ሂንቴ አስታማሬቶኔ ፋሪሳዊቶ፣ ሂንቴና አዬ። ሂንቴ ሻቲያሲኔ ኬሪያሰ ሶላ ባጋ ጌሼታ። ሺን ኤንታው ጋርሳን ሶንቄይኔ ኡዜቴሌ ኩሚ ኡቲሰ።

26 ኔኖ ቆቆ ፋሪሳዊያው፣ ሻቲያሲኔ ኬሪያሰ ጋርሳ ካሴታዳ ጌሻ። ሃሳፌ ጉዬ፣ ሶላ ባጋይካ ጌሺ ጊዳና።

27 «ሂንቴኖ፣ ጨቦቶ፣ ሂንቴ አስታማሬቶኔ ፋሪሳዊቶ፣ ሂንቴና አዬ። ካሬ ባጋራ ቃላማ ተዬተዲ ሎዲዲ፣ ጊደን ሜቁሌኔ ዋቂዳባይ ኩሚዳ ዲፎታ ዳኔታ።

28 ሃሳዳካ፣ ሶላ ባጋራ አሳሰ ሎፆ ዳኔታ። ሺን ሂንቴ ጋርሳን ጨቦቴሌኔ ኢታቴሌ ኩሚሰ።

29 «ሂንቴኖ፣ ጨቦቶ፣ ሂንቴ አስታማሬቶኔ ፋሪሳዊቶ፣ ሂንቴና አዬ። ሂንቴ ናቤታሰ ዲፎ ከጭታ፣ ቃሲ ዓሎታ ዲፋዋካ ሎይሴታ።

30 ቃሲ ሂንቴ፣ ሱኒ ቤኒ ኑ አዋታ ዋዴ ዴዲዳባ ጊዲያኮ፣ ኤንታራ ኢሲፌ ናቤታ ሱላ ጉሶኮሺን) ያጌታ።

31 ሃሳ ጊሹ፣ ሂንቴ ናቤታ ዋዲዳ አሳ ናይታ ጊዴይሳ ሂንቴ ሂንቴ ሁዔን ማርካቴታ።

32 ሂዛ፣ ሂንቴ አዋቲ ደሚዳይሳ ሂንቴ ፖሊቴ።

33 «ሃ ሾሻቶ፣ ሾሻ ናይቶ፣ ሂንቴ ጋናሜ ፐርዳፌ ዋኒዲ አታኔ?

34 ሃሳ ጊሹ፣ ታ ኡዴይሳ ሲዲቴ፤ ታኒ ናቤታ፣ ጨንጫ አሳታኔ አስታማሬታ ሂንቴኮ ኪታና። ኤንታፌ ኢሶታ ኢሶታ ሂንቴ ዋዲናኔ ማሰቃሊያ ሶላ ካቃና። ባጋታ አይሁዴ ዋሳ ከላታን ሊሶን ጋራፋናኔ ካታማፔ ካታማ ሳዳና።

35 ሃሳ ጊሹ፣ ዓሎዋ አቤላ ዋዲዳ ዋዲያፔ ደሚዲ፣ ያሳ ከላሰኔ ያርሾ ቤሳፌ ጊደን ሂንቴ ዋዲዳ ባራኪያ ናዓ ዛካሪያሳ ዋዴ ጋካናው ሃይቁዳ ዓሎ አሳ ኡባ ጊሾ ሂንቴ ሴሬታና።

36 ታኒ ሂንቴው ቱማ ኡዳይሰ፤ ሂንቴኔ ሂንቴ አዋቲ አሊዳ ባላሰ ሃ ፐርዳ ኡባይ ሃ ዬሌቴላ ሶላ ጋካና።

ዬሱሲ ዬሩሳላሜስ ዬኪሰ

(ሉቃ 13:34-35)

37 «ዬሩሳላሜ፣ ዬሩሳላሜ፣ ናቤታ ዋዲያፌ! ያሳይ ኔኮ ከቲዳይሳታ ሹቻን ጫዲያፌ! ኩቶይ ባ ናይታ ባ ቂፌን ሃጺይሳዳ ታኒ ኔ አሳ ታ ቂሲያን ጌቻናው አፑን ቶሆ ኮያዲና! ሺን ታና ዲጋዳሳ።

38 ሂዛ፣ ሂንቴ ያሳ ከላይ ካይሲ ገደና።
 39 ታኒ ሂንቴው ኦዲይስ፤ ሳዳ ሱንላን ዩይሲ አንጃተዳይሳ) ሂንቴ ጋና ጋካናው ናምዓንሎ ታና በዔኬታ» ያገሰ።

24

ዩሱሲ ያሳ ከላይ ላሌታናይሳ ካሴቲዲ ኦዲስ
 (ማር 13:1-2፤ ሉቃ 21:5-6)

1 ዩሱሲ ያሳ ከላፊ ከዩዲ በሺን፣ ኢያ ታማሬቲ ኢያኮ ዩዲ፣ ማላሌቲዲ ያሳ ከላ ገምቢያ በሲዶሶና።
 2 ዩሱሲ ኤንታኮ ዛሪዲ፣ «ኤ! ሃይሳ ኡባ በዔቲ? ታኒ ሂንቴው ቱማ ኦዲይስ፤ ሹቺ ሹቻ ቦላ ገምቤቲዳ ማላ ላሌቶና አቴና» ያገሰ።

ሲንላፊ ሃናናባታ
 (ማር 13:3-13፤ ሉቃ 21:7-19)

3 ዩሱሲ ሻማሆ ዳሪያ ቦላ ኡቲዳሺን፣ ኢያ ታማሬቲ ባንታርካ ኢያኮ ዩዲ፣ «ሂሲ አወዴ ሃናኔኮ ኑስ ኦዲ። ቃሲ ኔ ዩሳሲኔ ዎዲያ ወርሴላስ ማላታይ አይቤ?» ያገዲ ኦይቺዶሶና።
 4 ዩሱሲ ዛሪዲ፣ «ሂንቴና ኦኒካ ባሌሶና ማላ ናጌቲቲ!
 5 አይስ ገኮ፣ ዳሮ አሳቲ ታ ሱንላን፣ ታኒ ኪሪስቶሳ፣ ያሳይ አሳ አሻናው ከቲዳይሳ) ያገሺ ዩዲ ዳሮ አሳ ባሌሶና።
 6 ማታን ዴዲያ ኦላ ገርሳ፣ ሃሆን ዴዲያ ኦላ ዎሬ ሲዳናው ዴዴታ። ሄሳ ማላባይ ሃናናው በሲያ ገሾ ሂርጎፊቲ። ሺን ወርሴላይ ቡሮና።
 7 ዴሬይ ዳሪያራ፣ ኢሲ ካዎቴላይ ሃራ ካዎቴላራ ኦሌታና። ኮሻይኔ ቢታ ቃይይ ኡባ በሳን ሃናና።
 8 ሂሲ ኡባይ ዩሎ ኢቆላስ ዞኬ ማላ።
 9 «ሂ ዎዴ አሳይ ሂንቴና ዎዩስ አሌ ኢማና፣ ቃቻናኔ ዎሳና። ታ ሱንላ ገሾ አሳ ኡባይ ሂንቴና ኢፃና።
 10 ሂ ዎዴ ዳሮቲ አማኖ አጋና። ባንታ ገደን ኢሶይ ኢሱዎ አሌዲ ኢማና፣ ኢሶይ ኢሱዎ ኢፃና።
 11 ቃሲ ዳሮ ዎርዶ ናቤቲ ዴንዲዲ ዳሮታ ባሌሶና።
 12 ጌላቴሌ ዳሪያ ገሾ ዳሮ አሳ ሲቆይ ኢርፃና።
 13 ሺን ወርሴሌ ጋካናው ጌንጨያ ኡራይ አታና።

14 አሳ ኡባስ ማርካ ጊዳና ሜላ ያሳ ካዎቴላ ዎንጌላይ ቢታ ኡባን ኦዴታና። ሄሳፌ ጉዬ፣ ዉርሴላይ ያና።

ቱና ባሻ
(ማር 13:14-23፤ ሉቃ 21:20-24)

15 «ሄሳ ጊሾ፣ ናቢያ ዳኔሊ ኦዲዳ ባሻ ቱናቴላይ ጌሻ ቤሳን ኤቂዳይሳ ሂንቴ ቤዓና። (አኬኪሶ፡ ሄሲ ዎይ ጉሴኮ ናባቤይሲ አኬኮ!)

16 ሄ ዎዴ ዪሁዳ ቢታን ዴዔይሳቲ ዴሪያኮ ባቃቶ።

17 ኬላ ሁዔን ዴዒያ ኡራይ ባ ሶን ዴዒያባ ኤካናው ሶ ጌሎና ባቃቶ።

18 ጋዴን ዴዔይሲ ባ ማዑዎ ኤካናው ጉዬ ሲዎፎ።

19 ሄ ዎዴ ቃንላ ማጫሳታሲኔ ቋንሊያ ማጫሳታስ ዳሮ ኡንዓ ጊዳና።

20 ባልሳን ዎይኮ ሳምባታን ሂንቴ ባቃቶይ ጊዳና ሜላ ያሳ ዎሲቴ።

21 አይስ ጊኮ፣ ሳዒ ሜዴቶሳፔ ሃቺ ጋካናው ሃናናባይ፣ ቃሲ ሲንላፊካ ኡባራካ ሃናና ዎዬይ ሄ ዎዴ ሃናና።

22 ያሳይ ሄ ጋላሳታ ታይቡዎ ጉላናኮ አሴ ጊዲዳ ኦኒካ አቴና። ሺን ኢ ባ ዶሪዳ አሳታ ጊሾ ሄ ጋላሳታ ታይቡዎ ጉላና።

23 «ሄ ዎዴ ኦኒካ ሂንቴና፣ ሂኮ፣ ኪሪስቶሲ ሃይሳን» ዎይኮ ሂንጊ ዴዔሰ» ያጊኮ አማኖፒቴ።

24 አይስ ጊኮ፣ ዎርዶ ኪሪስቶሳቲኔ ዎርዶ ናቤቲ ዴንዳና። ኤንታው ዳንዳዔቲኮ፣ ሃሪ አቶሺን ያሳይ ዶሪዳይሳታካ ባሌላናው ጊታ ማላታታኔ ማላሊሲያባታ ኦላና።

25 አኬኪቴ፣ ታኒ ሂንቴው ሃይሳ ካሴታዳ ኦዳስ።

26 «ሄሳ ጊሾ፣ አሳይ ሂንቴኮ፣ ሂኮ፣ ኪሪስቶሲ ባዘን ዴዔሰ» ጊኮ፣ ያ ቦፒቴ። ዎይኮ ሂንቴኮ፣ ሂኮ፣ ቆልዓን ዴዔሰ» ጊኮ፣ ኤንታባ አማኖፒቴ።

27 አይስ ጊኮ፣ ዎልዓንሊ ሳሎን ዎልዓሚዲ፣ ዶሎሃፔ ዉሎሃ ጋካናው ቤንቴይሳዳ፣ አሳ ናዓ ዩሳይ ሄሳዳ ሃናና።

28 «ባዉቲ ዴዒይሶን አንኮቲ ሺቃና።

ኪሪስቶሲ ናምዓንሉ ያና
(ማር 13:24-27፤ ሉቃ 21:25-28)

29 «ሄ ዎዴ ሄ ዎዬ ጋላሳታፔ ጉዬ፣

ሶሁዋራ አዋይ ዳማና፤
አጌናይ ባ ፖዑዋ ዲጋና።
ያለንቶቲ ሳሎፔ ዋዳና፤

ቃሲ ሳሎን ዳዒያ ዋልቃቲ ቡቄታና።
30 ሄ ዋዴ አሳ ናዓ ዩሳ ማላይ ሳሎዋ ቦላ ቤንታና። ሳዓን ዳዒያ
አሲ ኡባይ ዩካና። ቃሲ አሳ ናዓይ፤ ዋልቃራኔ ገታ ቦንቹዋራ
ሳሎዋ ሻራ ገደራ ዩሺን ኤንቲ ቤዓና።

31 ኢ ባ ኪታንቸታ ገታ ቸኒያ ሞይዜራ ኪታና። ኤንቲ ሳዓ ኦይዱ
ባጋ ቢዲ፤ ሃ ጋፀፔ ያ ጋፀ ጋካናው ዳዒያ ኢያው ደሬቲዳይሳታ
ሺሻና።

ጎዳይ ያና ጋላሳ ማላታ
(ማር 13:28-31፤ ሉቃ 21:29-33)

32 «ባላሴ ሚላፌ ታማሪቲ። ኢ አጪዲ ሃይዒያ ዋዴ ቶርቹይ
ማታቲዳይሳ ሂንቲ ኤሬታ።

33 ሄሳዳካ፤ ሂንቲ ሃ ኡባባ ቤዒያ ዋዴ ዩሱሲ ማቲዲ ፔንጌን
ዳዒይሳ ኤሬቲ።

34 ታኒ ሂንቲው ቱማ ኦዳይስ፤ ሃ ኡባባይ ፖሌታና ጋካናው፤
ሃ ዩሌቲላይ አዴና።

35 ሳሎይኔ ሳዓይ አዳና፤ ሺን ታ ቃላይ ኡባካ አዴና።

ጎዳይ ያና ጋላሳ ኦኒካ ኤሬና
(ማር 13:32-37፤ ሉቃ 17:26-30፤ 34-36)

36 «ሄ ጋላሳኔ ሄ ሳቲያ ሳሎን ዳዒያ ታ አዋፔ አቲን ሃሪ ሳሎ
ኪታንቸታ ገዲን ዋይኮ ናዓ ገዲን ኦኒካ ኤሬና።

37 አሳ ናዓ ዩሳይ፤ ሮሄ ዋዴ ሃኒዳይሳ ሜላ ገዳና።

38 ሄ ዋዴ ዳዮ ሃላይ ያናፔ ሲንፌ ሮሄይ ማርካቢያን ጌሊዳ
ጋላሳ ጋካናው፤ አሳይ ሚሼኔ ኡዩሼ፤ ኤኪሼኔ ጌሊሼ ጋምዒሰ።

39 ባሻ ሃላይ ዩዲ፤ ኤንታ ኡባ ዳይሳና ጋካናው አኬኪቦኮና።
አሳ ናዓ ዩሳይካ ሄሳዳ ሃናና።

40 «ሄ ዋዴ ናምዑ አሳቲ ጋዴን ኦላና። ኤንታፌ ኢሶይ ኤኬታና፤
ሃንኮይ አታና።

41 ናምዑ ማጫሳቲ ኢሲፌ ጋጫና። ኤንታፌ ኢሲኒያ ኤኬታና
ሃንኪያ አታና።

42 «ሂዛ፤ ሂንቲ ጎዳይ አይ ጋላስ ያኔኮ ሂንቲ ኤሮና ገሾ
ሚኒዲ ናጌቲ።

43 ሺን ካይሶይ ቃማፌ ኣይ ሳቴን ያነኮ ከላዋይ ኤሪያኮ፡ ባ ከላይ ቦኬቶና ሜላ ባርኪዲ ናጋናሺን።

44 ሄሳዳካ፡ ኣሳ ናዓይ ሂንቴ ቆፖና ሳቴን ያና ጊሾ ሂንቴካ ጊሊዲ ዳዒቴ።

ኢታኔ ሎዖ ኣይሌታ ሌሚሶ
(ሉቃ 12:41-48)

45 «ያቲን፡ ባ ሶ ኣሳሰ ካላ ኮሺያ ዋዲያን ኢማና ሜላ ኢያ ጎዳይ ደሪዳ ኣማንሐይሲኔ ዋዛናማ ኣይሌይ ኦነ?»

46 ኢ ባ ጎዳይ ከተዳይሳ ኦላሺን ኢያ ጎዳይ ዪዲ ዳሚያ ኣይሌይ ኣንጃተዳይሳ።

47 ታኒ ሂንቴው ቱማ ኦዳይሰ፤ ጎዳይ ሄ ኣይሌያ ባባ ኡባ ቦላ ሹማና።

48 ሺን ሄ ኣይሌይ ኢታ ጊዲኮ፡ ሓ ጎዳይ ጋምዒዲ ያና) ያጊዲ ባ ዋዛናን ቆፒዲ።

49 ባ ላጌ ኦሳንቸታ ዋቶ ደሚኮ፡ ማላቴይሳታራ ሚኮኔ ኡዪኮ፡

50 ሄ ኣይሌያ ጎዳይ ኢ ቆፖና ጋላሲኔ ኢ ኤሮና ሳቴን።

51 ዪዲ ኢያ ቃንጻሬላና። ኢያ ቃዳ ጨቦታራ ኦላና። ሄ ቤሳን ኢያው ዩሆኔ ኣቼ ጋርጨላ ጊዳና።

25

ታሙ ጌላዖታ ሌሚሶ

1 «ሄ ዋዳ ሳሎ ካዋቴላይ ባንታ ኩራዚያ ኦይኪዲ፡ ማቸ ኤሃናው ቢዳ ኣዲያ ሞካናው ከዪዳ ታሙ ጌላዖታ ዳኔሰ።

2 ኤንታፌ ኢቻሻተ ኤያ፡ ቃሲ ኢቻሻተ ጨንጫ።

3 ኤያቲ ኩራዜ ኦይኪደሶና፡ ሺን ሃራ ላምባ ኦይኪቦኮና።

4 ሺን ጨንጫቲ ባንታ ኩራዚያኔ ሃራ ጉዣ ላምባ ኦይኪደሶና።

5 ማቸው ኤኬይሲ ጋምዒን፡ ሄ ጌላዖቲ ባንታና ጲሰኮይ ኦይኪን ጲሰኪደሶና።

6 «ጊዲ ቢላሄ ጊዲያ ዋዳ ሓኮ፡ ማቸው ኤሄይሲ ጋኪሰ፡ ኢያ ሞካናው ከዪቴ) ያጊያ ጊታ ጨቦይ ሲዔቴሰ።

7 «ሄ ዋዳ ሄ ጌላዖቲ ኡባይ ባርኪዲ፡ ባንታ ኩራዚያ ጊሊዲደሶና።

8 ኤያቲ ጨንጫታኮ፡ ሓ ኩራዜይ ቶዓና ሃኒያ ጊሾ ሂንቴ ላምባፌ ኦሰ ኢማርኬቲ) ያጊደሶና።

9 «ሺን ጨንጨቲ ኤንታኮ ዛሪዲ፣ ላካይ፣ ኑሲኔ ሂንቴሰ ጊዲያ ላምቢ ባዋ። ሄሳ ጊሾ፣ ሂንቴው ቢዲ ሻሚዲ ኤኪቴ) ያጊደሶና።

10 ኤያ ጌላዖቲ ላምባ ሻማናው ቢን፣ ማቸው ኤኬይሲ ፑቱ ጊሰ። ጊጌቲ ኡቲዳ ኢቻሹ ጌላዖቲ ኢያራ ኢሲፌ ያጋኖ ከላ ጌሊደሶና፤ ካሬይካ ጎርዴቲ ኣጊሰ።

11 «ጉዬፔ ሃንኮ ጌላዖቲ ዩዲ፣ ጎዳው፣ ጎዳው፣ ኑሰ ደያርኪ) ያጊደሶና።

12 «ሺን ኢ ኤንታኮ ዛሪዲ፣ ጎታኒ ሂንቴው ቱማ ኦዳይሰ፤ ታ ሂንቴና ኤሪኬ!»

13 «ሂዛ፣ ኣሳ ናዓይ ያና ጋላሳ ዋይኮ ሳቲያ ሂንቴ ኤሮና ጊሾ ባርኪዲ ናጊቴ።

ሄቭ ኦሳንቸታ ለሚሶ (ሉቃ 19:11-27)

14 «ጾሳ ካዋቴላይ ባ ኦሳንቸታ ጭጊዲ ባው ደዒያባ ኤንታው ሹዲዲ ኦጌ ባናው ከዩዳ ኡራ ዳኔሰ።

15 ኤንታው ሁዒን ሁዒን ኤንታ ዋልቃ ሜላ ኢሱዋሰ ኢቻሹ ካርዒቴ ቢራ፣ ኢሱዋሰ ናምዑ ካርዒቴ ቢራ ቃሲ ኢሱዋሰ ኢሲ ካርዒቴ ቢራ ኢሚዲ ባ ኦጊያ ቢሰ።

16 ኢቻሹ ካርዒቴ ቢራ ኤኪዳ ኣይሌይ ሶሁዋራ ቢዲ ዛልዒዲ፣ ሃራ ኢቻሹ ካርዒቴ ቢራ ዋዲሲሰ።

17 ሄሳዳካ፣ ቃሲ ናምዑ ካርዒቴ ቢራ ኤኪዳ ኣይሌይ ሃራ ናምዑ ካርዒቴ ቢራ ዋዲሲሰ።

18 ሺን ኢሲ ካርዒቴ ቢራ ኤኪዳይሲ ቢዲ፣ ኦላ ቦኪዲ፣ ባ ጎዳ ሚሺያ ሞጊሰ።

19 «ዳር ዋዴፔ ጉዬ ሄ ኣይሌታ ጎዳይ ዩዲ፣ ባ ሚሺያ ኤንታራ ሳላዒሰ።

20 ኢቻሹ ካርዒቴ ቢራ ኤኪዳ ኣይሌይ ዩዲ፣ ሃራ ኢቻሹ ካርዒቴ ቢራ ኤሂዲ፣ ጎታ ጎዳው፣ ኔኒ ታው ኢቻሹ ካርዒቴ ቢራ ኢማዳሳ። ሺን ታኒ ሃራ ኢቻሹ ካርዒቴ ቢራ ዋዲሲሰ) ያጊሰ።

21 ኢያ ጎዳይ፣ ሐምቦይ! ኔኒ ሎዖኔ ኣማንሱያ ኣይሌ፤ ኔኒ ጉላባን ኣማኔታዳሳ። ታኒ ኔና ዳርባ ቦላ ሹማና፤ ሃ ጌላዳ ኔ ጎዳራ ኡፋይታ) ያጊሰ።

22 «ቃሲ ናምዑ ካርዒቴ ቢራ ኤኪዳይሲ ዩዲ፣ ጎታ ጎዳው፣ ኔኒ ታው ናምዑ ካርዒቴ ቢራ ኢማዳሳ። ሺን ታኒ ሃራ ናምዑ ካርዒቴ ቢራ ዋዲሲሰ) ያጊሰ።

23 ኢያ ጎዳይ፡ «ዛምቦይ! ኔኒ ሎዎኔ ኣማንሉያ ኣይሌ፤ ኔኒ ጉላባን ኣማኔታዳጎ። ታኒ ኔና ዳርባ ቦላ ሹማና፤ ሃ ጌላዳ ኔ ጎዳራ ኡፋይታ» ያጊሰ።

24 «ቃሲ ኢሲ ካርዒቲ ቢራ ኤኪዳይሲ ዩዲ፡ ሓታ ጎዳው፡ ኔኒ ዜርና ቤሳፌ ጫኬይሳኔ ቆርጮና ቤሳፌ ማዒያ ኢታ ኣሲ ጊዳይሳ ታኒ ኤራይሰ።

25 ሄሳ ጊሾ፡ ያያዳ ኔ ቢራ ቢታን ሞጋሰ። ኔ ሚሼይ ሃይሲሽ» ያጊሰ።

26 «ኢያ ጎዳይ ዛሪዲ፡ «ሃ ኢታ ኣዛላ ኣይሊያው፡ ታኒ ዜርና ቤሳፌ ጫኬይሳኔ ቆርጮና ቤሳፌ ማዒያ ኣሲ ጊዳይሳ ኤራዳጎ።

27 ያቲን፡ ኔኒ ታ ሚሺያ ባንኬን ዎሊዳባ ጊዲያኮ፡ ታኒ ሰሚያ ዎዴ ታ ሚሺያ ዎዴራ ኤካናይሳ ዲጋዳጎ።

28 ሄሳ ጊሾ፡ ሚሺያ ኢያፔ ኤኪዲ፡ ታሙ ካርዒቲ ቢራ ዴዔይሳሰ ኣሚቲ።

29 ኣይሰ ጊኮ፡ ዴዒያ ኡባሰ ጉዜታና ኔ ዳራና። ሺን ባይናይሳፌ ሃሪ ኣቶሺን፡ ሄ ኢያው ዴዒያ ጉሊያካ ኤኬታና።

30 ሃ ማዶና ኣይሊያ ካሬ ቆማ ኬሲ ዩጊቲ። ያን ኢያው ዩሆኔ ኣቶ ጋርጮሉ ጊዳና» ያጊሰ።

ዎዲያ ወርሴላን ሃናና ፒርዳ

31 «ኣሳ ናዓይ፡ ኪታንቸ ኡባታራ፡ ባ ቦንቹዎራ ያ ዎዴ ኢ ባ ቦንቸ ካዎታ ኣራታ ቦላ ኡታና።

32 ቢታን ዴዒያ ኣሲ ኡባይ ኢያ ሲንጮ ሺቃና። ሄንላንቸይ ደርሳታ ዴሻታፔ ሻኬይሳዳ ኢ ሄ ኣሳ ናምዓን ሻካና።

33 ቃሲ ደርሳታ ኡሻቻ ባጋራ ዴሻታ ሃዲርሳ ባጋራ ኤሳና።

34 «ሄሳፌ ጉዬ፡ ካዎይ ኡሻቻ ባጋራ ዴዔይሳታኮ ሃይሳዳ ያጋና፡ ሓታ ኣዎይ ኣንጂዳይሳቶ፡ ሃ ዩዲ ሳዓይ ሜዴቲያ ዎዴ ሂንቲው ጊጊዳ ካዎቲላ ሳቲቲ።

35 ኣይሰ ጊኮ፡ ታኒ ኮሻቲን ሙዚዴታ፡ ሳሞቲን ኡሺዴታ፡ ኤዕቶና ኣማላ ኣሲ ጊዳዳ ቢን ሞኪዴታ፡

36 ካሎቲን ማይዚዴታ፡ ሃርጌቲን ሃርጊሲዴታ፡ ቃሼቲን ታና ኣይቹዴታ» ያጋና።

37 «ሄሳፌ ጉዬ፡ ዒሎቲ ዛሪዲ፡ ሳዳው፡ ኔኒ ኮሻቲን ኣዉዴ ቤዒዲ ሙዚዴ? ዎይኮ ኔኒ ሳሞቲን ኣዉዴ ቤዒዲ ኡሺዴ?

25:29 ማቶ 13:12፤ ማር 4:25፤ ሉቃ 8:18 25:30 ማቶ 8:12፤ 22:13፤ ሉቃ 13:28 25:31 ማቶ 16:27፤ ማቶ 19:28

38 ነኒ ኢማጼ ጊዳዳ ዪን አዉዴ ቤዒዲ ሞኪዶ? ዎይኮ ነኒ ካሎቲን አዉዴ ማይዚዶ?

39 ነኒ ሃርጊን ዎይኮ ቃሼቲን ነኮ ቢዲ ኔና አዉዴ ኦይቺዶ?) ያጋና።

40 ካዎይ ዛሪዲ፣ ታኒ ሂንቴው ቱማ ኦዳይሰ፤ ሂንቴ ታና ካሊያ ሃ ኡባፌ ጉዳይሳሰ ኦሊዳይሳ ታው ኦሊዳታ) ያጋና።

41 «ሄ ዎዴ ሃዲርሳ ባጋራ ዴዔይሳታኮ፣ ሃ ቃንጌቲዳይሳቶ፣ ታ ማታፔ ሃኪቴ። ፃላሄሲኔ ኢያ ኪታንቾታሰ ጊጊዳ ሜሪና ታማን ቢቴ።

42 አይሰ ጊኮ፣ ኮሻቲን ታና ሙዚቤኬታ፤ ሳሞቲን ኡሽቤኬታ።

43 ታኒ ኢማጼ ጊዳዳ ቢን ታና ሞኪቤኬታ፣ ካሎቲን ማይዚቤኬታ፣ ሃርጊኔ ቃሼቲን ታና ኦይቺቤኬታ) ያጋና።

44 «ሄ ዎዴ ኤንቴ፣ ሳዳው፣ ነኒ ኮሻቲን ዎይኮ ሳሞቲን ዎይኮ ኢማጼ ጊዳዳ ቢን ዎይኮ ካሎቲን ዎይኮ ሃርጊን ዎይኮ ቃሼቲን ቤዒዲ ኔና አዉዴ ማዶና ኢዲዶ?» ያጊዲ ዛራና።

45 «ሄ ዎዴ ካዎይ ዛሪዲ ኤንታኮ፣ ታኒ ሂንቴው ቱማ ኦዳይሰ፤ ሂንቴ ታና ካሊያ ሃ ኡባፌ ጉዳይሳ ማዶና ኢዲዳይሰ፣ ታና ማዶና ኢዲዳይሳ) ያጋና።

46 ሄሳ ጊሾ፣ ሄ አሳቲ ሜሪና ፒርዳሰ ቃሲ ዲሎቲ ሜሪና ዴዑዋሰ ባና» ያጊሰ።

26

ዬሱሳ ቦላ ማቄቲዶሶና

(ማር 14:1-2፤ ሉቃ 22:1-2፤ ዮሃ 11:45-53)

1 ዬሱሲ ሃ ቲሚርቲያ ኡባ ዉርሲዳ ዎዴ ባ ታማሬታኮ፣

2 «ናሞው ጋላሳፔ ጉዬ፣ ፓሲካ ባሌ ቦንቺያ ጋላሰ ጊዴይሳ ኤሬታ። ሄ ጋላሰ አሳ ናዓይ ማሰቃሊያ ቦላ ካቄታናው አሳ ኩሼን አዲ ኢሜታና» ያጊሰ።

3 ሄ ዎዴ ካሂኔ ሃላቃቲኔ ጨማቲ፣ ቃያፋ ጊያ ካሂኔ ሃላቃ ኬላን ሽቂዲ፣

4 አሲ ኤሮና ዬሱሳ ኦይኪዲ፣ ዎዳናው ማቄቲዶሶና።

5 ሺን ኤንቴ፣ «አሳይ ኦሺ ኬሶና ሜላ ጊዲ፣ ፓሲካ ቦንቺያ ጋላሰ ሄሳ ኦሎኮ» ያጊዶሶና።

ኢሲ ማጫሲያ ዩሱሳ ሺቶ ቲያሱ
(ማር 14:3-9፤ ዮሃ 12:1-8)

- 6 ዩሱሲ ቢታኒያ ካታማን ባር ሃርጊዳ ሲሞና ሶን ዴዔስ።
- 7 ዩሱሲ ኢማቱዋ ቦላ ዴዒሺን ኢሲ ማጫሲያ አልባሰዲርሴ ጸልቃዔ ኩሜላ ዳር አልዎ ሺቶ ኤካ ያዳ ዩሱሳ ሁዔን ቲጋሱ።
- 8 ሺን ዩሱሳ ታማሬቲ ሄሳ ቤዒዲ ሃንቄቲዲ፡ «ሃ ሺቶይ ጮ ኢቲይ አይቢሴ?»
- 9 ሃ ሺቶይ አልዎ ጋቲን ባይዜቲዲ፡ ሚሼይ ማንቆታሰ ኢማታናው ዳንዳዔቲስ» ያጊደሶና።
- 10 ዩሱሲ ኤንቲ ጌይሳ ኤሪዲ፡ ኤንታኮ፡ «ሃ ማጫሲው አይሰ ዋይሴቲ? ኢያ ታው ሎዎባ ኦላሱ።
- 11 ማንቆቲ ኡባ ዋዴ ሂንቴራ ዳና። ሺን ታኒ ሂንቴራ ኡባ ዋዴ ዴዒኮ።
- 12 ኢያ ሃ ሺቱዋ ታ ቦላ ቲጊዳይሲ ታና ሞጋናው ጊጊሳናሳ።
- 13 ታኒ ሂንቴው ቱማ ኦዳይስ፤ ቢታ ኡባን ሃ ዋንጌላይ ሳባኬቲያ ቤሳን አዉንካ፡ አሳይ ኢዮ ሃሳያና ማላ ኢያ ኦሊዳይሲ ኦዴታና» ያጊሰ።

ዩሁዲ ዩሱሳ አሊዲ ኢማናው ጊጌቲስ
(ማር 14:10-11፤ ሉቃ 22:3-6)

- 14 ሄ ዋዴ ታማኔ ናሞው ዩሱሳ ታማሬታፔ ኢሶይ፡ አስቆርታ ዩሁዲ ጌቲቴይሲ ካሂኔ ሃለቃታኮ፡
- 15 ቢዲ፡ «ታኒ ሂንቴው ዩሱሳ አላ ኢሚኮ፡ ሂንቴ ታው አይ ኢማኔ?» ያጊዲ ኤንታ ኦይቺሰ። ኤንቲ ዞሬቲዲ ሃስታው ቢራ ሳንቲሚ *† ኢሚደሶና።
- 16 ሄሳፌ ጉዬ፡ ዩሁዲ ዩሱሳ አሊዲ ኢማናው ኢንጄቲያ ዋዴ ዋቺስ።

ዩሱሲ ፓሲካ ካሁዋ ባ ሃዋሬታራ ሚስ
(ማር 14:12-21፤ ሉቃ 22:7-14፤ 21-23፤ ዮሃ 13:21-30)

- 17 ኡይላ ባሌ ቦንቺያ ኮይር ጋላስ፡ ዩሱሳ ታማሬቲ ኢያኮ ዩዲ፡ «ፓሲካ ቦንቺያ ጋላስ ኔኒ ማና ካሊ ኦኒ አዉን ጊጊሲኖ?» ያጊደሶና።

26:7 ሉቃ 7:37 26:11 ዛሬ 15:11 26:15 ዛካ 11:12 * 26:15 ቢራ ሳንቲሚ፡ አይኮይካ ጉዜቲቦና ጌሻ ቢራ ጉሱ። † 26:15 ሃስታው ቢራ ሳንቲሚ፡ ሃስታው ቢራ ሳንቲሚይ ኢስራዔል ቢታን አይሌይ ሻሜቲያኔ ባይዜቲያ ጋቲ።

18 ዩሱሲ ኤንታኮ፡ «ካታማን ደዒያ ኣዲያኮ ቢዲ፡ ላስታማሬይ፡ ታው ዋዳይ ጋኪዳ ጊሾ ታ ታማሬታራ ፓሲካ ቦንቺያ ጋላሳ ኔ ሶን ኣላና ያጌሰ) ያጌቲ» ያጌሰ።

19 ኢያ ታማሬቲ ዩሱሲ ባንታና ኪቲዳይሳዳ ኦሌዲ፡ ፓሲካ ባሌ ጋላሰ ማና ካላ ገጊሲደሶና።

20 ሳዓይ ኦማርሲያ ዋዳ ዩሱሲ ታማኔ ናምዑ ሃዋሬታራ ካሊ ማናው ኡቲሰ።

21 ኤንቲ ሚሺን፡ ዩሱሲ ኤንታኮ፡ «ታኒ ሂንቲው ቱማ ኦዳይሰ፤ ሂንቲፌ ኢሲ ኡራይ ታና ኣሌዲ ኢማና» ያጌሰ።

22 ኤንቲ ዳር ዳጋሚዲ፡ ሁዔን ሁዔን፡ «ጎዳው፡ ቱማ ታኔሻ?» ጌዲ ኢያ ኦይቺደሶና።

23 ዩሱሲ ዛሪዲ፡ «ባ ኩሺያ ታራ ኢሲፌ ሻቲያን ዩዳይሲ ኢ ታና ኣሌዲ ኢማና።

24 ኣሳ ናዓይ፡ ያሳ ቃላን ኢያው ፃፊቲዳይሳዳ ሃይቃና። ሺን ኣሳ ናዓ ኣሌዲ ኢማያ ኡራ ኣዬ፤ ሄ ኡራይ ዩሌቶና ኣቲዳኮ ኢያው ሎፖሺን» ያጌሰ።

25 ኢያ ኣሊ ኢማናው ደዒያ ዪሁዲ ዛሪዲ፡ «ኣስታማሪያው፡ ኔኒ ጌይ ታኔዬ?» ያጌሰ።

ዩሱሲ ዛሪዲ፡ «ኔኒ ኔ ሁዔን ጋዳሳ» ያጌሰ።

ጎዳ ካሁዋ

(ማር 14:22-26፤ ሉቃ 22:15-20፤ 1ቆር 11:23-25)

26 ኤንቲ ሚሺን፡ ዩሱሲ ኡይላ ኤኪዲ ያሳ ጋላቲሰ። ሄ ኡይላ ማንሊዲ ባ ታማሬታሰ ኢሚዲ፡ «ሄዒቲ፡ ሚቲ፡ ሃይሲ ታ ኣሹዋ» ያጌሰ።

27 ፀዓ ኤኪዲ፡ ያሳ ጋላቲሰ። ኤንታው ኢሚዲ፡ «ኡባይ ሃይሳፌ ኡዩቲ።

28 ሃይሲ ዳር ኣሳ ናጋራይ ኣቶ ጌቲታና ሜላ ጉኪያ ታ ሱላ። ሃ ሱላይ ያሳይ ሂንቲራ ጌሊያ ጫቁዋ ማንሊይሳ።

29 ሺን ታኒ ሂንቲው ኦዳይሰ፤ ታኒ ታ ኣዋ ካዋቲላን ኦራላ ዋይኔ ኡሻ ሂንቲራ ኡያና ጋላሳ ጋካናው ናምዓንሉ ሃ ዋይኔ ኡሻ ኡዩኬ» ያጌሰ።

30 ጋላታ ማዘሙሬ ዩዲዳይሳፌ ጉዬ ሻማሆ ዳሪያ ቢደሶና።

ዩሱሲ ጳዳርሲ ካዳናይሳ ኮይርቲዲ ኦዲሰ

(ማር 14:27-31፤ ሉቃ 22:31-34፤ ዮሃ 13:36-38)

31 ሄ ዋዳ ዩሱሲ ኤንታኮ፡

« (የሳይ ሄንጻንቸዋ ሾጫና ደርሳቲካ ላሌታና) ጌቲቲዲ ያሳ ቃላን ፃፊቲዳይሳ ሜላ ሃቺ ቃማ ሂንቴ ኡባይ ታና ኣጊዲ ባቃታና።

32 ሺን ታኒ ሃይቆፔ ዴንዲዳፔ ጉዬ ሂንቴፌ ሲንጻታዳ ጋሊላ ባና» ያጊሰ።

33 ጳዲሮሲ ዛሪዲ፥ «ኤንቲ ኡባይ ኔና ኣጊዲ ባቃቲኮካ፥ ታኒ ኔና ኣጊኬ» ያጊሰ።

34 ዬሱሲ ጳዲሮሳኮ፥ «ታኒ ኔው ቱማ ኦዳይስ፤ ሃቺ ቃማ ኩቶይ ዋሳናፔ ሲንጻ ኔኒ ታና ሂቹ ቶሆ ካዳና» ያጊሰ።

35 ጳዲሮሲ ዛሪዲ፥ «ታኒ ኔራ ኢሲፌ ሃይቆፔ ኣቲን ኔና ኡባካ ካዲኬ» ያጊሰ።

ሃንኮ ኢያ ታማሬቲ ኡባይካ ሄሳዳ ጊዶሶና።

ዬሱሲ ጌቲሴማኔን ዋሲሰ (ማር 14:32-42፤ ሉቃ 22:39-46)

36 ያቲዲ፥ ዬሱሲ ባ ታማሬታራ ጌቲሴማኔ ጊያ ቤሳ ቢዲ፥ ኤንታኮ፥ «ታኒ ሂኒ ባዳ ያሳ ዋሳሻና፥ ሂንቴ ሃይሳን ኡቲቱ» ያጊሰ።

37 ጳዲሮሳኔ ዛብዲዮሳ ናይታ ናምዓታ ባራ ኤኪ ቢዲ ዳር ኣዛኖኔ ኤንዔቴሉ ደሚሰ።

38 ቃሲካ ኤንታኮ፥ «ታኒ ሃይቆሰ ጋሊያ ኤንዓ ኤንዔታሰ። ሃይሳን ታራ ጋምዒቲኔ ሚኒዲ ናጊቲ» ያጊሰ።

39 ጉሉ ሲንጻ ቢዲ ቢታን ጉፋኒዲ፥ «ታ ኣዋው፥ ዳንዳዔቲያባ ጊዲኮ ሃ ዋዬ ፀዓ ታፔ ዲጋ። ሺን ኔ ሼኔይ ሃኖፔ ኣቲን ታ ሼኔይ ሃኖፖ» ያጊዲ ያሳ ዋሲሰ።

40 ዬሱሲ ባ ታማሬታኮ ሰሚ ዩዲ ኤንቲ ጴስኪዳሺን ዴሚሰ። ጳዲሮሳኮ፥ «ሂንቴ ኢሲ ሳቲኮኔ ጴስኮና ታራ ሚናናው ዳንዳዒቤኬቲ?»

41 ፓጩን ሂንቴ ጌሎና ሜላ ባርኪዲ ናጊቲኔ ያሳ ዋሲቲ። ሂንቴው ሎያ ኣዋይ ዴዔሰ፥ ሺን ሂንቴ ዳቡራንቸ ኣሲ» ያጊሰ።

42 ዬሱሲ ቃሲ ናምዓንጾ ቢዲ፥ «ታ ኣዋው፥ ታኒ ሃ ዋዬ ፀዓፔ ኡዮና ዴዒሼ ኣጳናው ዳንዳዔቶናባ ጊዲኮ ኔ ሼኔይ ሃኖ» ያጊዲ ያሳ ዋሲሰ።

43 ቃሲካ ሰሚ ያ ዋዴ ኢያ ታማሬታ ኣይፊያ ጴስኮይ ጎዚን፥ ዚንዒዳሺን ዴሚሰ።

- 44 ቃሲካ ኤንታ ኣጊ ቢዲ፡ ካሴ ቃላ ዛሪ ሄቫንሉ ዋሲስ።
- 45 ሄሳፌ ጉዬ፡ ባ ታማሬታኮ ዩዲ፡ «ሃሲ ጋካናው ጲስኬቲኔ ሸምፔቲ? ሄኮ፡ ኣሳ ናዓይ፡ ናጋራንቸታ ኩሹን ኣጲ ኢሜቲያ ሳቲይ ጋኪስ።
- 46 ዴንዲዲ ዬጲቲ፡ ታና ኣሉዲ ኢሜይሲ ሃይሲሽ ጋኪስ» ያጊስ።

ዬሱሲ ባ ሞርኬታን ኦይኬቲስ
 (ማር 14:43-50፤ ሉቃ 22:47-53፤ ዮሃ 18:3-12)

- 47 ዬሱሲ ቡር ሄሳ ሃሳዩሽን፡ ታማኔ ናምዑ ታማሬታፔ ኢሶይ፡ ዩሁዲ ጋኪ ዋጲስ። ካሂኔ ሃላቃቲኔ ዴሪያ ጨማቲ ኪቲዳ ዳር ኣሳቲ ማሼኔ ፃምዓ ኦይኪዲ ኢያራ ኢሲፌ ዩደሶና።
- 48 ዬሱሳ ኣሉ ኢሚያ ዩሁዲ ሄ ዳር ኣሳኮ፡ «ታኒ ዬሬይሲ ሂንቲ ኮዬይሲ ኢያ፡ ኢያ ኦይኪቲ» ያጊዲ ማላ ኢሚ ዋሉስ።
- 49 ኢራካ ዬሱሳኮ ሸቂዲ፡ «ኣስታማሪያው፡ ሳር ዴዓይ» ያጊዲ ኢያ ዬሪስ።
- 50 ዬሱሲ ኢያኮ፡ «ታ ላጊያው፡ ኔኒ ኦላናባ ኦላ ኣጋ» † ያጊስ። ሄሳፌ ጉዬ፡ ሸቂዲ፡ ዬሱሳ ኦይኪደሶና።
- 51 ዬሱሳራ ዴዓይሳታፔ ኢሶይ ባ ማሻ ሾዲዲ ካሂኔ ሃላቃ ኣይሊያ ሾጨዲ፡ ኢያ ሃይላ ቃንፃዲ ዬጊስ።
- 52 ሺን ዬሱሲ፡ «ኔ ማሻ ጉዬ ሾሁዋን ዛራ። ኣይስ ጊኮ፡ ማሻ ሾዲያ ኡባይ ማሻን ሃይቃና።
- 53 ታ፡ ታ ኣዋ ዋሲያኮ ዳር ሙኩሉን ታይቤቲያ ኪታንቸታ ዬዳናው ዳንዳዖናባ ኔው ዳኒ?
- 54 ያቲን፡ ያሳ ቃላን ሄሳዳ ሃናናው ቤሴስ ጌቲቲዳይሲ ዋኒዲ ፖሌታኔ?» ያጊስ።
- 55 ሄ ሳቲያን፡ ዬሱሲ ሄ ሸቂዳ ዳር ኣሳኮ፡ «ታና ፓንጋ ኦሉዲ ኦይካናው ማሼኔ ፃምዓ ኦይኪዲ ዩዴቲ? ታኒ ያሳ ኬላን ጋላስ ጋላስ ታማርሳሽ ሂንቲራ ዴዒያ ዋዴ ታና ኦይኪቤኬታ።
- 56 ሺን ሃይሲ ኡባይ ሃኒዳይሲ ናቤቲ ያሳ ቃላን ፃፊዳይሲ ፖሌታና ማላሳ» ያጊስ።

ሄ ዋዴ ኢያ ታማሬቲ ኡባይ ኢያ ኣጊዲ ባቃቲደሶና።

† 26:50 ታ ላጊያው፡ ኔኒ ኦላናባ ኦላ ኣጋ፡ ዋይኮ ሃራ ቢርሽላይ ታ ላጊያው፡ ኔ ሃይሳን ኣይ ኦላይ? 26:55 ሉቃ 19:47፤ 21:37

ዬሱሲ ፒርዳ ሻንጎ ሲንጼ ሺቁሰ

(ማር 14:53-65፤ ሉቃ 22:54-55፤ 63-71፤ ዮሃ 18:13-14፤ 19-24)

57 ዬሱሳ ኦይኪዳይሳቲ ካሂኔ ሃላቃ ቃያፋኮ ኢያ ኤፊደሶና። ያን ሂጌ ኣስታማሬቲኔ ቢታ ጨማቲ ሺቁዲ ዴዖሶና።

58 ሺን ጳጳርሲ ካሂኔ ሃላቃ ዛባ ጋካናው ሃሆን ኢያ ካሊሰ። ኢያ ወርሱላይ ሻኬታና ጋካናው ዛባ ጌሊዲ ናጌይሳታራ ኡቲሰ።

59 ካሂኔ ሃላቃቲኔ ሺቁዳ ኣሳ ኡባይ ዬሱሳ ዋጳናው ኢያ ቦላ ዋርዶ ማርካ ኮዩደሶና።

60 ዳርቲ ዩዲ ኢያ ቦላ ዋርዶ ማርካ ማርካቲደሶና፤ ሺን ኣይኮካ ዴሚሶኮና። ጉዩፔ ናምዑ ኣሳቲ ዩዲ፤

61 «ሃ ኡራይ፡ ታኒ ያሳ ኬላ ላላዳ ሃቹ ጋላሳን ዛራ ኬፃናው ዳንዳዒይሰ» ያጊሰ» ያጊደሶና።

62 ካሂኔታ ሃላቃይ ዴንዲ ኤቁዲ ዬሱሳኮ፡ «ሃይሳቲ ኔና ሞቲያ ሞቶሞስ ኔኒ ዛሪያባይ ባዌ?» ያጊሰ።

63 ሺን ዬሱሲ ሲዒ ጊሰ። ቃሲካ ካሂኔ ሃላቃይ፡ «ታኒ ኔና ዴዖ ያሳ ሱንጎን ኦይካይሰ፤ ኔኒ ያሳ ናዓ ኪሪሰቶሳ ጊዲኮ ኑሰ ኦዳ» ያጊሰ።

64 ዬሱሲ ዛሪዲ፡ «ኔኒ ኔ ሁዔንካ ጋዳሳ። ሺን ታኒ ሂንቲው ኡዳይሰ፤ ሂዛፔ ጉዩ፡ ኣሳ ናዓይ ዋልቃማ ያሳ ኡሻቻ ባጋን ኡቲዳሺን፡ ቃሲ ሳሎ ሻራራ ዩሺን ሂንቲ ቤዓና» ያጊሰ።

65 ሄ ዋዴ ካሂኔ ሃላቃይ ዳር ዩሎቲዲ ባ ማዑዋ ፔዲዲ፡ «ሃይሳ ቤዒቲ ያሳ ጫዩሰ! ኑና ሃራ ማርካ ኣይ ኮሺ? ኢ ሃዒ ጫዩዳይሳ ሂንቲ ሲዒዳታ።

66 ሂንቲ ቆፋይ ኣይቤ?» ያጊሰ።

ኤንቲካ፡ «ኢያው ሃይቆ ቤሴሰ» ያጊዲ ዛሪደሶና።

67 ያቲን፡ ኤንቲ ኢያ ሶምዖን ጨቲዲ ዴቺደሶና። ሃራቲ ኢያ ባቁዲ፤

68 «ኪሪሰቶሳ! ኔና ዴቺዳይ ኦኔ? ኣኔ ኑሰ ኦዳ» ያጊደሶና።

ጳጳርሲ ዬሱሳ ካዲሰ

(ማር 14:66-72፤ ሉቃ 22:56-62፤ ዮሃ 18:15-18፤ 25-27)

69 ጳጳርሲ ዛባን ኡቲዳሺን፡ ኢሲ ኣይሊያ ኢያኮ ያዳ፡ «ኔኒካ ጋሊላ ዬሱሳራ ኢሲፌ ዴዓሳ» ያጋሱ።

70 ሺን ኢ ኤንታ ኡባ ሲንላን ሄ አይሌኮ፡ «ኔኒ ጊያባይ አይቤኮ ታኒ ኤሪኬ» ያጊዲ ካዲሰ።

71 ቃሲ ቢዲ ዲርሳ ፔንጌኮ ጋኪሺን ሃራ አይሊያ ኢያ ቤዓዳ፡ ያን ደዒያ አሳኮ፡ «ሃ ኡራይ ናዚሬቴ ዩሱሳራ ዳዔሰ» ያጋሱ።

72 ጳዲሮሲ ናምዓንሉ ጫቂዲ፡ «ታኒ ሄ ኡራ ኤሪኬ!» ያጊሰ።

73 ጉሉ ጋምዒሺን፡ ያን ኤቂዳ አሳቲ ጳዲሮሳኮ ዩዲ፡ «ኔካ ቱማ ኤንታራ ኢሲፌ ዳዓሳ፤ ኔኒ ኔ ሃሳያን ኤሬታሳ» ያጊደሶና።

74 ሄሳፌ ጉዬ፡ ጳዲሮሲ፡ «ታኒ ሄ ኡራ ኤሪኬ!» ያጊዲ፡ ባና ቃንጌሲኔ ጫቆ ደሚሰ።

ሄ ዎዴ ኢራካ ኩቶይ ዋሲ አጊሰ።

75 ዩሱሲ ኢያኮ፡ «ኔኒ ኩቶይ ዋሳናፔ ሲንሌ ታና ሄቹ ቶሆ ካዳና» ጊዲይሳ ጳዲሮሲ አኬኪዲ፡ ካሬ ኬዩዲ ኢታ ዩሆ ዩኪሰ።

27

ዩሁዲ ባና ሱሊሰ

(ማር 15:1፤ ሉቃ 23:1-3፤ ዮሃ 18:28-32)

1 ዎንታ ጉራ ካሂኔ ሃላቃቲኔ ቢታ ጨማቲ ኡባይ ዩሱሳ ዎዲሳናው ማቂቲደሶና።

2 ኤንቲ ዩሱሳ ቃቺ ኤፊዲ ዳሪያ ሃሪያ ጲላዎሳሰ አሊዲ ኢሚደሶና።

3 ሄ ዎዴ ዩሱሳ ኦይሊዳ ዩሁዲ፡ ጲላዎሲ ዩሱሳ ቦላ ፒርዲዳይሳ ቤዒዲ፡ ቂሮቲዲ፡ ሄ ሃሰታሙ ቢራ ሳንቲሚያ ካሂኔ ሃላቃታሲኔ ዳሪያ ጨማታሰ ጉዬ ዛሪሰ።

4 «ታኒ ጂሎ አሲ ሃይቆሰ አላ ኢማዳ ናጋራ አላሰ» ያጊሰ።

ሺን ኤንቲ፡ «ሄሲ ኑ ሜቶ ጊዴና ኔ ሜቶ» ያጊደሶና።

5 ዩሁዲ ሚሺያ ያሳ ኬላን ዩጊ አጊዲ ኤንታ ማታፔ ቢዲ፡ ሱሌቲ ሃይቆሰ።

6 ካሂኔ ሃላቃቲ ሚሺያ ኤኪዲ፡ «ሃ ሚሺይ ሱላ ሚሺ ጊዲያ ጊሾ ኔኒ ያሳ ኬላ ሚሺያራ ጋሌይሲ ዎጋ ጊዴና» ያጊደሶና።

7 ሄሳፌ ጉዬ፡ ኢሲፌ ዙሬቲዲ፡ ቤቴ አሲ ዎጋናው ማና ቢታ ቫሚደሶና።

8 ሄሳ ጊሾ፡ ሄ ጋዴይ ሃቺ ጋካናው ሱላ ቢታ ጌቴቲ ቄጌቴሰ።

9 ናቢያ ኤርሚያሲ፡ «ኢሰራዔሌ አሳይ ኢያው ቃንፃናው ጋማቲዳ ሃሰታሙ ቢራ ሳንቲሜ ኤኪደሶና።

10 ጎዳይ ታና ከተዳይሳዳ ማና ቢታ ሻማናው ኢሚዶሶና»
ጊዳይሲ ሄ ዎዴ ፖሌቲስ።

ዩሱሲ ጲላዎሳ ሲንጻን

(ማር 15:2-5፤ ሉቃ 23:3-5፤ ዮሃ 18:33-38)

11 ዩሱሲ ዴሪያ ሃሪያ ጲላዎሳ ሲንጻ ሸቂን፣ ጲላዎሲ ኢያኮ፣
«ኔኒ አይሁዳ ካዎ?» ያጊዲ ኦይቺስ።

ዩሱሲ ዛሪዲ፣ «ኔ ጋዳሳ» ያጊስ።

12 ካሂኔ ሃላቃቲኔ ቢታ ጨማቲ ኢያ ሞቲያ ዎዴ ኤንታው
አይቢ ዛርካ ኢሚቤና።

13 ሄ ዎዴ ጲላዎሲ ዩሱሳኮ፣ «ሃይሳቲ ኔና ሞቲያ ሞቱዎ ኡባ
ሲዲኪ?» ያጊስ።

14 ዩሱሲ ሃሪ ኣቶሺን፣ ኢሲ ቃላካ ዛርና ኢዲን፣ ዴሪያ ሃሪይሲ
ዳሮ ማላሌቲስ።

ዩሱሳ ቦላ ሃይቆ ፒርዴቲስ

(ማር 15:6-15፤ ሉቃ 23:13-25፤ ዮሃ 18:39-40፤ 19:1-

16)

15 ዴሪያ ሃሪይሲ ላይጻን ላይጻን ፓሲካ ባሌ ቦንቺያ ጋላሳን፣
አሳይ ኮያ ኢሲ አሲ ቃሾፔ ቢርሺያ ዎጊ ዴዔስ።

16 ሄ ዎዴ ኢሲ ባርባና ዩሱሳ ጊያ ዳሮ ኤሬቲዳ ኢታ አሲ
ቃሾ ኬጻን ዴዔስ።

17 ሄሳ ጊሾ፣ ዳሮ አሳይ ሸቂዲ ዴዒሺን ጲላዎሲ፣ «ታኒ
ሂንቴው ባርባና ዩሱሳ ቢርሾዬ፣ ዎይኮ ዩሱሳ ጊያ ኪሪስቶሳ
ቢርሾ?» ያጊዲ አሳ ኦይቺስ።

18 ኢ ሄሳ ጊዳይ ኤንቲ ቃናቲዲ ዩሱሳ ኦይሌዳይሳ ኤሪያ
ጊሾሳ።

19 ጲላዎሲ ፒርዳ ኬጻን ኡቲዳሺን፣ ኢያ ማቺያ፣ «ታኒ ሃቺ
ቃማ አውሆን ኢያባ ዳሮ ዎዬታሼ ኣቂዳ ጊሾ ሄ ዲሎ ኡራ ቦላ
አይቢባካ ኦሶፋ» ያጋዳ ኪታሱ።

20 ሺን ካሂኔ ሃላቃቲኔ ዴሪያ ጨማቲ ጲላዎሲ ባርባና
ቢርሺዲ፣ ዩሱሳ ዎቆና ሜላ፣ አሳይ ኢያ ዎሳና ሜላ፣ አሳ
ጨሚዶሶና።

21 ጲላዎሲ ዛሪዲ ኤንታኮ፣ «ታኒ ኤንታ ናምዓፌ ሂንቴው ኦና
ቢላና ሜላ ኮዬቲ?» ያጊዲ ኦይቺስ።

ኤንቲ፣ «ባርባና ቢላና ሜላ ኮዮስ» ያጊዶሶና።

22 ጲላዎሲ፣ «ያቲን፣ ዩሱሳ ጊያ ኪሪስቶሳ ዎቶ?» ያጊዲ
ኤንታ ኦይቺስ።

ኡባይ ዛሪዲ፣ «ማስቃሊያ ቦላ ኢያ ካቃ» ያጊደሶና።

23 ጲላዖሲ አሳኮ፣ «አይሰ? ኢ አይ ኢታባ ኦሴዴ?» ያጊዲ ኦይቸሰ።

ሺን አሳይ ካሴይሳፊ አሲዲ፣ «ማስቃሊያ ቦላ ኢያ ካቃ» ጊዲ ዋሲደሶና።

24 ኦሺ ዴንጭፊ ሃራ አይቢባካ ኦላናው ዳንዳዔቶናይሳ ጲላዖሲ ቤዒዲ፣ ሃጮ ኤኪዲ፣ «ሃ ኡራ ሃይቁዋን ታኒ ዴዒኬ። ሄሳ ኦጭ ሂንቲና» ያጊዲ አሳ ሲንላን ባ ኩሺያ ሜጩቲሰ።

25 አሳ ኡባይ ዛሪዲ፣ «ኢያ ሱላ ጎሜይ ኑናኔ ኑ ናይታ ጋኮ» ያጊደሶና።

26 ያቲን፣ ጲላዖሲ ባርባና ኤንታው ቢሊዲ፣ ዬሱሳ ሊሶን ጋራፊዲ፣ ማስቃሊያ ቦላ ካቄቲዲ ሃይቃና ሜላ ኤንታው አሲዲ ኢሚሰ።

ዎታዳሬቲ ዬሱሳ ቁልቂሲደሶና
(ማር 15:16-20፤ ዮሃ 19:2-3)

27 ሄሳፊ ጉዬ፣ ጲላዖሳ ዎታዳሬቲ ዬሱሳ ዴሪያ ሃሬይሳ ሶ ኤኪ ኤፊን፣ ዎታዳሬቲ ኡባይ ኢያ ዩሹዋን ኤቁደሶና።

28 ኢያ አፊላ ቃሪ ኤኪዲ ዘዖ አፊላ * ማይዚደሶና።

29 ቃሲ አጉንላ ካላቻ ገጊሲዲ፣ ኢያ ሁዔን ዎሲደሶና። ኢያ ኡሻቻ ኩሺያን ማይሪ ፃምዓ ኦይሲዲ፣ ኢያ ሲንላን ጉልባቲዲ፣ «አይሁዴ ካዋው፣ ሙኩሉ ላይሴ ካዎታ!» ያጊዲ፣ ኢያ ቦላ ቁልቂሲደሶና።

30 ኢያ ቦላ ጩቲደሶና። ሄ ማይሪ ፃምዓ ኤኪዲ፣ ኢያ ሁዔን ሸጪደሶና።

31 ኤንቲ ኢያ ቦላ ቁልቂሲደይሳፊ ጉዬ ዘዖ አፊላ ኢያፔ ቃሪ ኤኪዲ፣ ኢያ አፊላ ኢያ ማይዚደሶና። ማስቃሊያ ቦላ ኢያ ካቃናው ኤኪ ኤፊደሶና።

ዬሱሳ ካቄቲላ
(ማር 15:21-32፤ ሉቃ 23:25-43፤ ዮሃ 19:17-27)

32 ኤንቲ ካሬ ኮዬዲ፣ ኢሲ ሲሞና ጊያ ቄሬና ቢታ አሲ ዴሚዲ፣ ዬሱሳ ማስቃሊያ ዎልቃን ቶሲደሶና።

33 ጎልጎታ ጊያ ቤሲ ጋኪደሶና። «ጎልጎታ» ጉሳይ «ጉጌ ቤሲ» ጉሱ።

27:24 ዛሬ 21:6 * 27:28 ዘዖ አፊላ፡ ቤኒ ዎዴ ካዎቲ ቦላራ ማዒያ አፊላ።

34 ሄሳን ኤንቲ ጨዬ ዋላኬተዳ ዎይኔ ኡሻ ኡዮ ጊዲ ኢያው ኢሚደሶና። ሺን ኢ ሄሳ ጋንዲ ኤኪዲ፣ ኡዮና ኢዲሰ።

35 ኤንቲ ማስቃሊያ ቦላ ኢያ ካቁዳይሳፊ ጉዬ ኢያ ኣፊላ ሻኪዲ፣ ሳማ ዩጊዲ ኤኪደሶና።

36 ሄሳፊ ጉዬ፣ ያን ኡተዲ ኢያ ናጊደሶና።

37 ቃሲ፣ «ሃይሲ ኣይሁዴ ካዉዋ ዩሱሳ» ያጊያ ሞቶ ፀፊያ ኢያ ሁዔ ሶን ዋሊደሶና።

38 ዩሱሳራ ሄ ዎዴ ናሞፀ ፓንጋታ ኢሱዋ ኢያፔ ኡሻቻ ባጋን፣ ሃንኩዋ ኢያፔ ሃዲርሳ ባጋራ፣ ማስቃሊያ ቦላ ካቁደሶና።

39 ኦጊያራ ኣጲያ ኣሳይ ዩሱሳ ቦሪዲ፣ ኢያ ቦላ ጨተሹ፣

40 «ዶሳ ኩላ ላላዳ ሄቩ ጋላሳ ጊደን ከዳይሶ፣ ኔና ኣሻ። ኔኒ ዶሳ ናዓ ጊዲኮ፣ ኣኔ ማስቃሊያ ቦላፊ ዎጳ» ያጊደሶና።

41 ሄሳዳካ፣ ካሂኔ ሃላቃቲ፣ ሂጌ ኣስታማሬቲኔ ቢታ ጨማቲ ኢሲፊ ዩሱሳ ቦላ ቁልቁሲደሶና። ሃይሳዳ ያጊደሶና።

42 «ሃራታ ኣሺሰ፣ ሺን ባና ኣሻናው ዳንዳዒቤና። ኢ ኢሰራዔሌ ካዎ ጊዲኮ፣ ኣኔ ማስቃሊያ ቦላፊ ሃዒ ዎጶ፣ ኑካ ኢያ ኣማናና።

43 ዶሳን ኢ ኣማኔቴሰ፣ ዶሳይ ኢያ ኣሻናው ኮይኮ ኣኔ ኣሹ። ኣይሰ ገኮ፣ ኢ ባና፣ «ታኒ ዶሳ ናዓ» ጌሰ» ያጊደሶና።

44 ቃሲ ሃሪ ኣቶሺን፣ ኢያራ ማስቃሊያ ቦላ ካቁተዳ ፓንጋቲካ ሄሳዳ ጊዲ ኢያ ቦላ ቁልቁሲደሶና።

ዩሱሳ ሃይቁዋ

(ማር 15:33-41፤ ሉቃ 23:44-49፤ ዮሃ 19:28-30)

45 ኡሱፑን ሳቴፔ ቢዲ፣ ኡዲፋን ሳቴ ጋካናው ቢታ ኡባይ ጶሚሰ።

46 ኡዲፋን ሳቴ ጊዲያ ዎዴ ዩሱሲ፣ «ኤሎሄ፣ ኤሎሄ፣ ሳማ ሳባቁታኒ?» ጊዲ ጌታ ዋሶ ዋሲሰ። «ኤሎሄ፣ ኤሎሄ፣ ሳማ ሳባቁታኒ?» ጌይሳ ቢርሼላይ «ታ ዶሳው፣ ታ ዶሳው፣ ታና ኣይሰ ኣጋዲ?» ጉሱ።

47 ሄሳን ኤቁዳ ኣሳፔ ኢሶቲ ኢሶቲ ሄሳ ሲዒዲ፣ «ሃ ኡራይ ኤሊያሳ ያጌሰ» ያጊደሶና።

48 ኢራ ኤንታፊ ኢሶይ ዎዲ ቢዲ፣ ኢሰፖንጆ ኤኪዲ፣ ጨላ ዎይኔ ኡሻ ኩንሉሰ። ሄሳ ማይሬ ፃሞዓ ዪራን ዋሊዲ ኡሻናው ኢያ ደናኮ ሺሺሰ።

27:34 ማዝ 69:21 27:35 ማዝ 22:18 27:39 ማዝ 22:7፤ 109:25
27:40 ማቶ 26:61፤ ዮሃ 2:19 27:43 ማዝ 22:8 27:46 ማዝ 22:1
27:48 ማዝ 69:21

49 ሺን ሃንኮቲ፡ «ናጋ፡ ኤሊያሲ ኢያ አሻናው ያኔኮ ኣኔ ቤዖስ» ያጊደሶና።

50 ዬሱሲ ናሞዓንሉ ጊታ ዋሶ ዋሲዲ፡ ሃይቂ ኣገሰ።

51 ሄ ሳቲን ዖሳ ከላን ካቂቲዳ ማጋራጅይ ቆሞፌ ዲጌ ጋካናው ናሞቡ ከዪዲ፡ ፔዴቲ ዋዲስ። ቢታይ ቃዲስ፡ ዛላይካ ጳልቂቲስ።

52 ዱፎቲ ዶዬቲን ዖሳ አሳታፔ ዳሮቲ ሃይቆፔ ዴንዲደሶና።

53 ኤንቲ ዱፎፔ ከዪዲ፡ ዬሱሲ ሃይቆፔ ዴንዲደሶሳፊ ጉዬ ጌሻ ካታማ ቢደሶና፤ ያን ኤንቲ ዳሮ አሳስ ቤንቲደሶና።

54 ማቶ ሃላቃይኔ ኢያራ ዬሱሳ ናጊያ ዋታዳሬቲ ቢታይ ቃዲደሶኣኔ ሄሳን ሃኒዳባ ቤዒዳ ዋዴ ዳሮ ያዪዲ «ቱማ ሃይሲ ዖሳ ናዓ» ያጊደሶና።

55 ሄሳን ዳሮ ማጫሳቲ፡ ጋሊላፔ ዶሚዲ ዬሱሳ ሃጋዚሼ ካሊዳይሳቲ ሃሆን ኤቂዲ ጌሎሶና።

56 ኤንታ ጊደን ማግዴላ ማይራማ፡ † ያይቆባኔ ዮሴፋ ኣያ ማይራማኔ ዛብዲዮሳ ማቺያ ዴዖሶና።

ዬሱሳ ሞጌቲሳ

(ማር 15:42-47፤ ሉቃ 23:50-56፤ ዮሃ 19:38-42)

57 ሳዓይ ኦማርሲያ ዋዴ ዮሴፋ ጊያ ኢሲ ዱሬ ኡራይ፡ አርማቲያሳ ካታማፔ ዪስ። ኢ ባ ሁዔንካ ዬሱሳ ካሊያ ኣሲ።

58 ዮሴፊ ጲላዖሳኮ ቢዲ፡ ዬሱሳ ኣሃ ኤካናው ዋሲስ። ጲላዖሲ ኣሃይ ዮሴፋስ ኢማታና ሜላ ከቲስ።

59 ዬሱሳ ኣሃ ኤከዲ፡ ጌሻ ሞጎ ኣፊላን ፃዲስ።

60 ባው ሞጌታናው ሹቻፌ ዋጪዳ ኦራላ ጎንጎሎን ኢያ ኣሃ ዋሊስ። ቃሲ ሄ ጎንጎሎዋ ዶናን ጊታ ሹቻ ጎንደርሲ ዋሊዲ ኣገ ቢስ።

61 ማግዴላ ማይራማኔ ሃንኮ ማይራማ ሄ ጎንጎሎዋኮ ሲሚዲ ኡቲደሶና።

62 ዋንቲሌ ሳሞባታ ጋላስ፡ ካሂኔ ሃላቃቲኔ ፋሪሳዌቲ ጲላዖሳኮ ዪዲ፡ ሃይሳዳ ያጊደሶና።

63 «ጎዳው፡ ሃ ዋርዳንቾይ ፓፃ ዴዒሼ፡ † ስኒ ሄቭ ጋላሳፔ ጉዬ ሃይቆፔ ዴንዳና» ያጊደሶሲ ኑስ ሃሳዬቲስ።

64 ሄሳ ጊሹ፡ ኢ ሞጌቲዳ ጎንጎሎዋ ሄቭ ጋላስ ጋካናው፡ ሚንሒ ናጋና ሜላ ከታርኪ። ሄሲ ሃኖና ኢዲኮ፡ ኢያ ታማሬቲ ቢዲ ኢያ

27:51 ከሳ 26:31 27:55 ሉቃ 8:2-3 † 27:56 ማግዴላ ማይራሞ፡ ጉሳይ ማግዴላ ካታማፔ ዪዳ ማይራሞ ጉሱ። 27:63 ማቶ 16:21፤ 17:23፤ 20:19፤ ማር 8:31፤ 9:31፤ 10:33

አሃ ካይሲ ዳይሲዲ፡ «ሃይቆፔ ዴንዲሰ» ያገዲ አሳሰ ኦዲኮ ናምዓንሉ ባሌሶይ ኮይሮይሳፊ ኡባ ሃ ኢታና» ያገደሶና።

65 ጲላፆሲ ኤንታኮ፡ «ሂንቲው ናጌይሳቲ ዴዎሶና፤ ቢዲ ሂንቲው ዳንዳዔቲዳ ሜላ ናጌሲቲ» ያገሰ።

66 ሄሳ ጊሾ፡ ኤንቲ ቢዲ ዲፎይ ቦሼቶና ሜላ ሹቻ ቦላ ማታሜ ዎሊዲ ዎታዳሬታን ናጌሲደሶና።

28

ዬሱሳ ሃይቆፔ ዴንዲዎ

(ማር 16:1-10፤ ሉቃ 24:1-12፤ ዮሃ 20:1-10)

1 ሳምባቲ አጂን ዎጋ ዎዴ ዎንታ ጉራ፡ ማግደላ ማይራማኔ ሃንኮ ማይራማ ዬሱሲ ሞጌቲዳ ጎንጎሉዎ ቤዓናው ቢደሶና።

2 ቆፖና ዎልቃማ ቢታ ቃይይ ሃኒሰ። ጎዳ ኪታንቾይ ሳሎፔ ዎጂዲ ዱፋዎ ደናን ዴዒያ ሹቻ ጎንደርሲዲ ኢያ ቦላ ኡቲሰ።

3 ኢያ ማላይ ዎልዓንሊ ዳኔሰ። ኢያ ማዎይካ ሻቻዳ ቦሊ።

4 ናጌይሳቲ ኪታንቾዎ ቤዒዲ፡ ያሻን ኮኮሪዲ፡ ሃይቂዳ አሳዳ ሃኒደሶና።

5 ኪታንቾይ ማጫሳታኮ፡ «ሂንቲ ማሰቃሊያ ቦላ ካቂቲዳ ዬሱሳ ኮዬይሳ ታኒ ኤሪያ ጊሾ ያዮፊቲ።

6 ኢ ካሴ ኦዲዲይሳ ሜላ ሃይቆፔ ዴንዲሰ፤ ሃይሳን ዴና። ሃ ዬዲ ኢያ ዚንዒሲዳ ቤሳ ቤዒቲ።

7 ሂንቲ ሃዒ ኤሌሲ ቢዲ፡ ኢያ ታማሬታሰ፡ «ዬሱሲ ሃይቆፔ ዴንዲሰ። ቃሲ ኢ ሂንቲፊ ሰንገቲዲ ጋለላ ባና፤ ሂንቲ ኢያ ያን ቤዓና» ያገዲ ኦዲቲ። ታኒ ሂንቲው ሃይሳ ኦዳናው ያሰ» ያገሰ።

8 ኤንቲ ያዩሼኔ ዳሮ ኡፋይቲሼ፡ ዱፋዎ ማታፔ ኤሌሲዲ ቢዲ፡ ኢያ ታማሬታሰ ኦዳናው ዎጂደሶና።

9 ቆፖና ዬሱሲ ኤንታራ ጋሄቲዲ ኤንታኮ፡ «ሳሮይ ሂንቲው ጊዶ» ያገሰ። ኤንቲ ኢያኮ ሸቂዲ፡ ኢያ ቶሁዎ ኦይኪዲ ኢያው ጎይኒደሶና።

10 ሄ ዎዴ ዬሱሲ ኤንታኮ፡ «ያዮፊቲ፤ ቢዲ ታ ታማሬቲ ጋለላ ባና ሜላ ኤንታው ኦዲቲ። ኤንቲ ያን ታና ቤዓና» ያገሰ።

11 ሄ ማጫሳቲ ቢሸን፡ ዱፋዎ ናጊያ ዎታዳሬታፔ ባጋቲ ካታማ ቢዲ፡ ሃኒዳባ ኡባ ካሂኔ ሃለቃታሰ ኦዲደሶና።

12 ካሂኔ ሃለቃቲኔ ጨማቲ ሸቂዲ ዘሬቲዲ፡ ዎታዳሬታሰ ዳሮ ሚሼ ኢሚዲ።

13 « ኮኒ ጂሰኪዳሺን ኢያ ታማሬቲ ቃማ ዬዲ፡ ኢያ አሃ ካይሲደሶና» ያገቲ።

14 ሃ ኦዳ ዳሪያ ሃሬይሲ ሲቢኮ፣ ሄሲ ሂንቴ ባላ ጊደናይሳ ኑኒ ኢያ ኦዲ አማንጻና። ሂንቴና አይቢካ ሂርጊሶፖ» ያጊደሶና።

15 ዋታዳሬቲ ሚሺያ ኤኪዲ፣ ኪቴቲዳይሳዳ ኦሴደሶና። ሃ ኦዳይ አይሁዳ ማታን ሃቺ ጋካናው ኦዳቲሼ ዳዔሰ።

ዩሱሲ ባ ታማሬታስ ቆንጩሰ

(ማር 16:14-18፤ ሉቃ 24:36-49፤ ዮሃ 20:19-23፤ ሃ.ኦ 1:6-8፤ 1ቆሮ 15:3-8)

16 ታማኔ ኢሲ ኢያ ታማሬቲ ዩሱሲ ባንታና ቤቴ ጊዳ ጋለላ ዳሪያ ቦላ ቢደሶና።

17 ያን ኤንቲ ኢያ ቤዒዳ ዋዴ ኢያው ጎይኒደሶና፣ ሺን ኤንታፊ ኢሶቲ ኢሶቲ ሲዲደሶና።

18 ዩሱሲ ኤንታኮ ሺቂዲ፣ «ጎሎኒኔ ሳዓን ማቲ ኡባይ ታው አሜቲሰ።

19 ሂዛ፣ ሂንቴ ኡባ ቤሲ ቢዲ፣ አዋ፣ ናዓ፣ ጌሻ ኢያና ሱንጻን አሴ ኡባ ፃማቂዲ ታና ካሌይሳታ ኦሴቴ።

20 ታኒ ሂንቴና ኪቲዳባ ኡባ ኤንቲ ናጋና ሜላ ኤንታ ታማርሲቴ። ታኒ ዋዲያ ዉርሴላ ጋካናው ኡባ ዋዴ ሂንቴራ ዳዓይሰ» ያጊሰ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5